

**SEVENTH LEGISLATIVE ASSEMBLY OF MIZORAM  
( FOURTH SESSION )**

**LIST OF BUSINESS**

FOR SIXTH SITTING ON TUESDAY, THE 18<sup>th</sup> NOVEMBER, 2014  
( Time 10:30 A.M. to 1:00 P.M. and 2:00 P.M. to 4:00 P.M. )

**QUESTIONS**

1. **Questions** entered in separate list to be asked and oral answers given.

**PRESENTATION OF REPORT**

2. **Pu JOHN SIAMKUNGA**, to present to the House the Third Report of Committee on Subordinate Legislation relating to :-
  - i) **The Mizoram Ancient Monuments and Archaeological Sites and Remains Rules, 2003**, under Art & Culture Department,
  - ii) **The Mizoram State Sports Council Rules, 2005**, under Sports & Youth Services Department  
and
  - iii) **The Mizoram Forest (Establishment & Regulation of Saw Mills and Other Wood Based Industries) Rules, 2010**, under Environment and Forests Department.

**FINANCIAL BUSINESS**

**GENERAL DISCUSSION ON THE BUDGET FOR THE YEAR 2014-2015**

3. General Discussion on the Budget for the year 2014-2015 (to be concluded).

NGURTHANZUALA  
Secretary

....

**SPEAKER** : Chutichuan, Pathian mithlan mithianghlim leh duhtakte angin lainatna thinlung te, ngilneihna te, inngaihtlawmna te, thuhnuairawlhna te, dawhtheihnate chuan inthuam rawh u. (Kolossa 3:12)

Starred Question No. 75-na kan la ang a, question neitu Pu Lalruatkima, MLA zahawm tak zawt turin i lo sawm ang.

**Pu LALRUATKIMA** : Pu Speaker, ka lawm e. Ka Starred Question No. 75 na Labour, Employment & Industrial Training Department changtu Minister zahawm tak chhan atan ka zawhna chu :-

- a) Building & Other Construction Workers Welfare Board-a Cess hi tu hmingin nge Account hawn a nih?
- b) Khawi Bank/Financial Institution-ah te nge Cess sum hi dah a nih?
- c) Account engzatnge hawn a nih?
- d) Tute nge Cess atanga sum tlingkhawm hmanga chhawmdawlina dawng thei?
- e) Mi engzatingnge chhawmdawlina dawng tawh a? Engzatnge Cess sum hi hman a nih tawh ?

**SPEAKER** : Chhang turin a changtu Minister zahawm tak Pu Lalrinmawia Ralte i lo sawm ang.

**Pu LALRINMAWIA RALTE, MINISTER** : Pu Speaker, Aizawl West – II bialtu Pu Lalruatkima zawhna - Starred Question No. 75 na chhanna chu - (a) Building & Other Construction Workers Welfare Board-a Cess hi tu hmingin nge Account hawn anih? tih chhanna chu - Secretary, Building & Other Construction Workers Welfare Board hminga Account hawn a ni a, Director, LE&IT nen Joint-a operate a ni.

- a) Khawi Bank/Financial Institution-ah te nge Cess sum hi dah anih? Tih chhanna chu : Cess sum hi a hnuai Bank-ah te hian dah a ni :
  - i) State Bank of India, Main Branch, Aizawl.
  - ii) Apex Bank, Dawrpui Branch, Aizawl.
  - iii) Mizoram Rural Bank, Aizawl Branch, Zarkawt.
  - iv) HDFC, Dawrpui, Aizawl.
  - v) Central Bank of India, Aizawl Branch, Chanmari.

- b) Account engzatnge hawn anih? tih chhanna chu Account 5 nos. (panga) hawn a ni.
- c) Tute nge Cess atanga Sum tlingkhawm hmanga chhawmdawlna dawng thei? tih chhanna chu - Welfare Board-a Building & Other Construction Workers in register, Welfare Scheme-in a huam ten chhawmdawlna an dawng thei tih a ni.
- d) Mi engzatingnge chhawmdawlna dawng tawh a? Engzatnge Cess sum hi hman anih tawh? tih chhanna chu - Chhawmdawlna hi mi 17092 ten an dawng tawh. November ni 7, 2014 thleng khan ₹ 16,28,39,438/- hman a ni tawh tih a ni.

**SPEAKER** : Zawhbelhna.

**Pu LALRUATKIMA** : Pu Speaker, ka lawm e. Cess Account hawnah khan Director thar khan Director hlui hnenah khan Account Operator nihna kha a hlan tawh em tih ka zawt a. Tin, Pu Speaker, Account hi Bank 5 laiah hawn a ni a, chutah chuan Scheduled Bank-ah General Financial Rules hian sorkar sum reng reng Bank-a vawn tur a nih chuan Scheduled Bank-ah a ti a. HDFC hi Schedule Bank a ni reng em tih ka zawt a. Tin, chubakah ka'n zawh belh leh duh chu hemi in a ken tel tho a ni ang chu Pu Speaker, SPIO hi Co-terminus in a lak theih reng em ni tih ka zawh belh e.

**SPEAKER** : Awle, a changtu Minister chhang turin i lo ko ang.

**Pu LALRINMAWIA RALTE, MINISTER** : Pu Speaker, Director hlui khan Director thar hnenah Account operate theihna a hlan tawh a; chu chu tihfel vek a ni tawh a. Tin, a rawn zawhna kha Scheduled Bank han tih lai kha; Nationalised Bank tih nen khan thuhmunah ka ngai a. Nationalised Bank chu niin ka hre lova HDFC hi. Kan danah hian ti ila, Supreme Court Direction zawk hian unspent balance reng reng chu Nationalised Bank ah dah tur a ni a ti a. Nationalised Bank lovah a lo awm avangin hei hi la chhuak a, Nationalised Bank ah dah turin Board-in kan ti a. Tunah hian transfer hi an ti mek a, an la lachhuak kim lo deuh niin ka hria a. Thawk leh khatah a crore bi han lakchhuah nawlh kha a lo rem lo deuh a, chumi information thleng chuan kan pe nghal law law a nge.

Co-terminus a lak theih leh theih loh tih chungchang kha chu a service rules hi kan la nei chiah lova. Amaherawhchu, Supreme Court khan hmanhmawh taka Welfare Board a thua lo din tawh hna thawk thei lova awm kha hna thawk theia siam a thawhtir vat a duh avang khan hmanhmawh deuhvin 'activate' a ngaih avangin Board khan hnathawktute kha an lo la a; chi thumin an la a ni: Co-terminus leh (chu chu Board awm hun chhung atan, kan hrethiam vek anga) Contract leh Muster Roll-in thawktute hi an lo la a ni. Chu chu ka chhan theih dan a ni e.

**SPEAKER** : Aw, Pu Ruatkima a chhang tawhin ka hria a,

**Pu LALRUATKIMA** : Aw, chhan fuh loh deuh a awmin ka hria a. SPIO hi RTI Act hnuai ami a ni a. Co-terminus in kan Office Directorate kalphung zawng zawng hria in kan thuruk engkim hria khan a awm theih a ni a. Ka hriat sual loh chuan SPIO ah khan Co-terminus kha dah a ni a. Chu chu enge a awmzia tih kha ka'n zawh belh a ni.

**SPEAKER** : Service Rules kan nei lova, a ti a, kha kha Minister-in han chhang leh teh se.

**Pu LALRINMAWIA RALTE, MINISTER** : Pu Speaker, Welfare Board bikah hi chuan Principal Secretary, Labour & Employment leh chu chu Administrative Department atangin. Tin, Director zel hi Member-Secretary an ni baw k a. A bak kha chu hemi Welfare Board bikah hi chuan thawktu nghet an awm lo reng reng tlat mai a ni. Chuvang chuan SPIO kha ruat a nih dawn kha chuan a buaithlak khawp anga, Director kha ama Directorate ah buaina a neih baw si kha chuan Welfare Board a khatia kan lo kal pawh kha Information te thup nan kan lo hmang em a nih loh chuan ngiahthiam deuh rih kan ngai em aw ka'n ti deuh a. Advisory Committee hi Dan angin ruat thar a ni tawh a, tunhnai mai ah hian. A hma khan a lo awm lo a. Chungte chuan min han vil zui anga, Advisory Committee vilvena hnuai ah Board pawh hian hna a thawk anga. Siamfel ngai pawh heng lo pawh hi a la awm mai thei. Pu Speaker, kan hre seng vek lova, khang kha chu Board thar hi vawi hnih kan thu tawh a. Kan han thu leh anga, khang ang chi pawh kha enfel ngai kan lo enquire anga, siamthat theih dan kawng kan lo zawng dawn nia, a tul a nih chuan.

**SPEAKER** : Awle, a chiang thawkhat e. Zawhna 76-naah kal ila, Pu Vanlalzawma, MLA zahawm takin han zawt sela.

**Pu VANLALZAWMA** : Pu Speaker, ka lawm e, ka zawhna Finance Minister zahawm takin a chhan atana ka han buatsaih chu hei hi a ni :

- a) K.Deposit-ah eng Department te sum nge dah a nih?
- b) K.Deposit ah engzatnge dah sak an nih? Engtik atanga dah nge an nih ?
- c) Department hrang hrangte sum heti zat hi engvanga K.Deposit a dah reng nge a nih ? Ka lawm e.

**SPEAKER** : Awle, Minister zahawm tak, Pu Sawta sawm ila.

**Pu LALSAWTA, MINISTER** : Pu Speaker, Pu Vanlalzawma, MLA zahawm tak zawhna chhanna chu hetiang hi a ni e:-

- a) K.Deposit-ah eng Department te sum nge dah a nih tih chhanna

chu - K-Deposit-ah a hnuaia Department te sum hi dah a ni :

- 1) Sports & Youth Services
- 2) Printing & Stationery
- 3) ICT
- 4) AH & Vety.
- 5) UD & PA
- 6) Economics & Statistics
- 7) PHQ - Police Headquarters tihna.
- 8) Industries
- 9) Sericulture
- 10) Agriculture (R&E)
- 11) GAD
- 12) Horticulture
- 13) Agriculture (CH)
- 14) DM&R
- 15) Rural Development
- 16) Art & Culture
- 17) Social Welfare
- 18) School Education
- 19) H&ME
- 20) Health Services
- 21) P&E
- 22) LADC
- 23) PWD

- b) K.Deposit a dah sak te kha a Department angin han sawi ta ila :-

- |                            |               |
|----------------------------|---------------|
| 1) Sports & Youth Services | 1087.69 lakhs |
| 2) Printing & Stationery   | 240.10 lakhs  |
| 3) ICT                     | 97.35 lakhs   |
| 4) AH&Vety                 | 8630.70 lakhs |

5)	UD&PA	2969.82 lakhs
6)	Economics & Statistics	50.00 lakhs
7)	PHQ	414.98 lakhs
8)	Industries	5016.01 lakhs
9)	Sericulture	574.00 lakhs
10)	Agriculture (R&E)	50.00 lakhs
11)	SAD	127.00 lakhs
12)	Horticulture	9739.36 lakhs
13)	Agriculture (CH)	10650.67 lakhs
14)	DM&R	170.00 lakhs
15)	Rural Development	2695.53 lakhs
16)	Art & Culture	80.00 lakhs
17)	Social Welfare	2932.53 lakhs
18)	School Education	55.82 lakhs
19)	H&ME	33.21 lakhs
20)	Health Services	2179.90 lakhs
21)	P&E	4222.12 lakhs
22)	LADC	752.51 lakhs
23)	PWD	<u>754.66 lakhs</u>
<b>TOTAL</b>		<b>53523.96 lakhs</b>

Kan sawifiah nghal law law ang a. Heng Department te ta bik hi K.Deposit-ah dah fin tur tih ni lovin, he zawhna zawh a nih laia heng Department te K.Deposit a dah tihna mai a ni a.

- C) K.Deposit a Department hrang hrangte sum dah hi sorkar pawisa bawmpui (Consolidated Fund of the State) atanga chhuak tawh, financial year tawp dawn a sorkar account-a cash balance in heng pawisa pek chhuah nghal hi a tlin loh bakah scheme tam tak te chu hna la thawh hman loh te a nih bawk avangin an hnathawh tur thawh zawh anih bawk loh avangin Department a sum tam tham kawl tir hi GFR dan kalh a nih bawk avangin government account dang, Public Account hnuai a K.Deposit & Advances (interest awm lo) Head-ah dah lai lawk a ni tih kha ka chhanna a ni e.

**SPEAKER** : Zawhbelhna zawhna neituin a zawt ang.

**Pu VANLALZAWMA** : Pu Speaker, ka zawhbelhna chu hei hi a ni -

- a) K.Deposit a pawisa dah te hi engtikah nge lak chhuah theih a nih dawn ?  
 b) Thla 4 hnu, kum thar kan chuankai hnuah K.Deposit-ah hian pawisa dah leh hi a ngai dawn em ? Dah loh a nih theih nan hmalak a ni em tih kha ka zawhna a ni.

**SPEAKER** : Pu T.T.Zothansanga'n zawt belh leh nghal mai se.

**Pu T.T. ZOTHANSANGA** : Pu Speaker, ka lawm e. ka zawhbelhna chu hei hi a ni -

- (1) Sorkar hmasa MNF kum 10 a ral khan K.Deposit in sum an dah ve em ?
- (2) State dangte hian K.Deposit in sum an dah ve em ?
- (3) Finance through lovin Department ten K.Deposit hi an la chhuak thei em ?
- (4) Department ten hnathawh zawh loh zo anga in sawiin K.Deposit sum an la chhuak ru thei em ?
- (5) Engtik kum atangin nge Mizoramah K.Deposit-ah sum kan dah tan ?
- (6) K.Deposit a sum dah miah loh kum a awm em tih a ni.

**SPEAKER** : Dr.K.Beichhua

\

**Dr. K. BEICHHUA** : Pu Speaker, zawhna ka'n siam belh mai ang e. Finance Minister zahawm tak khan scheme tam tak hnathawh hman loh kha a rawn ti a. Heng scheme tam tak te hi eng vanga thawk hman lo nge kan nih tih kha zawhna ka siam e.

**Pu LALRUATKIMA** : Pu Speaker, khawgaihin zawhna pakhat chiah, K.Deposit hi tunlai thil lar tak mai a ni a. K.Deposit awmzia pawh hi tam tak chuan kan hre lo si a, zawhna a tam si a, khawngaih takin min lo hrethiam se. Sorkarin K.Deposit zir Chiang tur Committee kha a siam a, report an theh lut tawh em ? An zir chian, a finding chu he House zahawm tak hi min hrihlh thei em tih ka zawt e.

**SPEAKER** : Awle, Minister a chhan tur chu chhang turin i sawm ang, a tam em tawh a, rilruah a leng seng em ang chu.

**Pu LALSAWTA, MINISTER** : Pu Speaker, zawhna neitu in a rawn zawh belhna chhanna :-

- i) Kan la chhuak reng a, a lut reng bawk a. A in sul pel reng mai a ni, rei lutuk te kan dah chhuak a. Chuvang chuan engtik lai pawhin a ak chhuah theih a, engtik lai pawhin a lut reng bawk a. Chu chu Finance in kan kalpui dan a ni a.
- ii) Ka rin dan in a ngai reng ang, sorkar a awm chhung hi chuan a ngai reng tawh deuh thaw mai ang a ka ti a. A chhan chu MP inthlan te a lo thleng a, MP inthlan te a lo thlen khan inthlan loh theih a ni lo va, 'pawisa kan nei mang si lo va kan inthlang lo

mai ang e,' tih chi a ni lo va. Kan inthlang mai a, a tul ang ang kan seng mai a. April thlaa kan inthlanna pawh kha tunah hian central khuan min la rawn reimburse lo va, nuai 2000 chuang a ni. Khang ang chi te, a tul hi a tam khawp a. Tin, hlawh te pawh anmahni department in an neih loh kan pek tul bawk si, hnathawk hlawh lo va chhawr kan duh bawk si loh avanga kan pek mai, mahse department in pawisa a neih loh pawisa remchang apiang kan pek tak mai te kha helamah K.Deposit-ah kan dah a, annin hmanhmawh thlak taka rawn lak chhuah tulna a awm bawk loh leh la chhuak thei pawh annih bawk loh hna an thawh zawh miau loh avang te pawh in. Khang avang khan K.Deposit kan tih hi kan hmang rim tial tial a. Chutah chuan nakum lamah pawh kum leh lamah pawh kan la hman zel a tul ang. Tin, K.Deposit hi chuti taka tihbaiawm pawh a ni hranpa lo.

Tin, member zahawm tak Pu T.T.Zothansanga khan 'sorkar hmasa khan hetiang hi K-deposit hi a dah ve em?' a ti a. Ni e, sorkar hmasa te, hmasa leh te, kum 1986 atang hrim hrim khan dah reng a ni a. A tirah chuan a tul avangin nuai 1 chauh dah a ni a, mahse kan hriat theuh angin UT kan han nih 1972-a kan budget te chu nuai 1792 chauh a nih lai khan 1986-a nuai1 K-deposit a kan dahte kha chu khatih hunlai te khan chuan a tam fu a ni tih comparative lehin. Chuan '98, '99 ah hian vaibelchhe 93, nuai 94 hi K-deposit ah dah a ni tawh a. Tin, MNF hunah khan keini kan han sorkara min hnutchhiah chu vaibelchhe 349, nuai 97, a nuaia sawiin nuai sing 34,997 kha K-deposit ah a awm a. Financial year kalta ah khan provisionally chuan vaibelchhe 1168 leh nuai 32 hi K-deposit-a awm anga hriat a ni a, chu chu provisional a ni a, CAG in a la chinfel loh avangin provisional kan ti lo thei lova. Tunah 2014-2015 provisional bawkin a tlem daih tawh a, a chanve vel lek a nia, vaibelchhe 535, nuai 23 a ni, chu chu an lo neih tawh thin dan a ni a. Tin, state dangte hian enge maw an dinhmun le an ti a, state dangte hi keini aia K-deposit a lo dah tam hi an lo tam khawp mai a. Ama'rawhchu, K-deposit a dah tam hi pumpelh hram hram kan tum a, kan theih ang tawkin kan ti bawk a. Tunhnai maiah pawh hmanni lawka vaibelchhe 1000 chuang kha 535-ah chuan kan han tla thla ve thei mai a. A tul ang ang ah hi chuan kan in release ve reng a ni. Vawiin lamah pawh engemaw zat hi chu an release ang tih ka ring a. Tin, Finance department hriat loh in a lak chhuah theih em tihlai hi chu an veng a, kan hriat thiam ang ang chuan a system hmangin kan veng a, an la chhuak lo chuan kan hria a, tuna kan hriat chinah chuan chu chu kan dinhmun a ni a. Engtik atangin nge tih kha chu ka sawi tawh ang khan 1986, '87 atang pawh khan K-deposit hi chu a lo awm tan daih tawh a.



Member zahawm tak Pu Ruatkima'n a K-deposit chungchang hi tunlai kan thu lar ber pawl a ni, a tih kha a dik khawp a. Engto zawng hi a awm a, state dangin engteh chiama an ngaih loh pawh hi state thenkhat te hian lo ngaih pawimawh ve viau theih te pawh a ni ve zel a. Tin, a ngai pawimawh tu hi kan inthlak kan inthlak a, opposition lama awm te hian kan han ngai pawimawh deuh a, a tu a pawh hi kan ni deuh vek mai. Chu chu K-deposit chungchang-a zawhna ka'n chhan theihthe chu a ni a Pu Speaker. Eng pawh ni se K hian awmzia a nei lova, K tih hi awmze nei a ni lova, I kha small savings ania, J kha reserve a ni a, K kha deposit a ni a, khatiang khan L,M,N thleng khan a awm a. K kha alphabetically-a a chan avang khan K-deposit tih hi kan han sawilar mai a ni e, Pu Speaker, ka lawm e.

**Dr. K. BEICHHUA** : Pu Speaker, ka zawhna kha a chhang tlat lo. Pu Speaker, kan ram Mizoramah hian scheme tam takte pawh kan siam thin a, kha kha ka sawi thin hmalakna hi bawhzuina a awm loh chuan tia ka sawi ka sawi fo kha a ni a. Scheme tam tak hnathawh hmanloh tih kha khati lai te kha infrastructure-ah hmasawwna kan nei bawk silo, khatih laia scheme tam tak kan neihte thawh hman loha kan liamtir zel chuan kha kha enge ni, engvanga thawk hman lo nge tih kha ka zawhna a ni.

**Pu LALRUATKIMA** : Pu Speaker, khawngaihin kan Finance Minister zahawm tak khanin ka zawhna pawh min chhang chuang lova, (SPEAKER: A tam em bawk anih kha) K-deposit zir Chiang tur khan report an theh lut tawh em? Enge an finding tih kha kan zawt a ni.

**SPEAKER** : Awle, Minister sawm ila.

**Pu LALSAWTA, MINISTER** : Pu Speaker, member zahawm tak Dr. K. Beichhua han sawi kha chu Finance lam atanga zuk tih hleihtheih pawh a ni vak lova. Department-ten an hnathawh tur an thawh chungchangah Finance te hian inrawlh chu tul chu kan han ti ve viau thin a, a tul chang phei chuan han inrawlh chang te pawh an han nei a. A chhan chu a kalkawng hi thui takte a awm a, chungah chuan thawh hman loh hi a awm ve hrim hrim mai a. Tin, kan sorkar hnathawk te, kan engineer ten theihtawp an chhuah chungah keimahnin kan thawh zawh hman loh ve hrim hrim, sanction rawn tlai lutuk te, khatiang kha a awm ve tho bawk a. Amaherawhchu, hei hi sorkar ang chuan tun aia speed chak zawk leh hna tha zawka thawh hi chu kan House Leader ho hian kan tum khawp a, chu chu ka chhanna ni sela.

Tin, K-deposit zirchianna chungchang kha an zo tawh a, niminah pawh hun remchang kan nei bawk a. “Engtinngge formally in in rawn submit dawn nge ni, sawiho te in duh em?” kan ti a. Anni khan sawiho an duh deuh hlek a, hetia han tlangzarh hma-a officially a pho chhuak rih lova intra-departmental nimahse, ka hnenah tal official a rawn submit kha an duh ve a ni. Chuvangin, an rawn submit anga, an recommendation siam ang ang te pawh tawngka ten an han sawi belh bawk ang a. Chu chu vawiin a kan dinhmun a ni a. Kan session zawhte hi chuan an han submit ang a, public document pawh ni thei turin intra-departmental nimah document pawh a ni thei tho mai thei a. Chung ang chu tuna kan dinhmun mek chu a ni.

**SPEAKER** : Zawhna 77-naah kal ila. A neitu Pu Lalruatkima Member zahawm tak i sawm ang.

**Pu LALRUATKIMA** : Pu Speaker, ka lawm e. Ka Starred Question No.77-na District Council Affairs Department changtu minister zahawm tak chhan atan :-

- a) Chakma Autonomous District Council-ah tute nge Nominated member te?
- b) An chenna/Address khawi nge?

**SPEAKER** : Aw, Chief Minister zahawm tak Pu Lal Thanhawla sawm ila.

**Pu LAL THANHAWLA, CHIEF MINISTER** : Pu Speaker, Chakma Autonomous District Council-a nominated member te chu :-

- i) Shri Dhakmoni Tongchangya S/o Bilo Kumar Tongchangya.
- ii) Pu Lalsangliana S/o Sangleiala
- iii) Pi Sneha Maya W/o Sadhu Dhan
- iv) Smt.Niharmala Chakma D/o Lokkhi Chandra Chakma (L)

Shri Dhakmoni Tongchangya hi Vaseitlang-I a awm a ni a, Pu Lalsangliana kha Parva-III a awm a ni a, Pi Sneha Maya kha Borapansury-I a awm a ni a, Smt.Niharmala Chakma kha Kamalanagar-III a awm a ni.

**SPEAKER** : Awle, Pu Ruatkima zawhbelhna.

**Pu LALRUATKIMA** : Pu Speaker, Lalsangliana s/o Pu Sangleiala Parva-III ami kha Electoral Roll-a a hming tak chu Lalchangliana a ni a, khati khan sorkar document ah Lalsangliana a la nih zel kha chuan thil diklo a ni a. Chuvang chuan, roll ah te chuan Lalchangliana, 's' nilovin 'ch' a ni Pu Speaker. Chuvang chuan, helai hi tih dik theih a ni ang em? Nakinah kan hotu kan minister zahawm tak khan min enzui sak se ka duh thu ka rawn sawi a ni.

**SPEAKER** : Aw, Chief Minister zahawm tak chhan chi a ni em?

**Pu LAL THANHAWLA, CHIEF MINISTER** : Pu Speaker, heng nominated member te hi Chakma Autonomous District Council CEM in a recommend a Governor in a lo pawm te an ni a. Electoral Roll a chuan leh chuan loh chungchangah ennawn tur a awm a nih chuan ennawn chu a harsa in ka ring lo e.

**SPEAKER** : Awle, zawhbelhna a tam tehchiam lo a, zawhna 78-naah kal i la, zawhna neitu Er.Lalrinawma Member zahawm tak i lo sawm ang u.

**Er. LALRINAWMA** : Pu Speaker, ka lawm e. Horticulture changtu Minister zahawmtak hna ka zawhna Starred question 78 na chu :-

Tuikum Cluster hnuai RKVY/NLUP hnuai Sapthei chingtu tur thlan te kha engzatnge an nih? tih ka zawt e.

**SPEAKER** : A department neitu, Minister zahawm tak Pu P.C.Lalthanliana chhang turin i sawm ila.

**Pu P.C. LALTHANLIANA, MINISTER** : Pu Speaker, member zahawm tak Er.Lalrinawma zawhna chhanna chu hetiang hi a ni :-

Tuikum Cluster hnuai RKVY leh NLUP hnuai Sapthei chingtu tur a thlan zat chu hetiang hi a ni.

- i) RKVY – 30 Nos.
- ii) NLUP – 29 Nos. thlan an ni.

**SPEAKER** : Zawhbelhna, Pu Rinawma.

**Er. LALRINAWMA** : Pu Speaker ka'n zawhbelh duh chu, kan Minister zahawmtak chhan atan. Hmanni khan pawisa te kha, a theih ang ang sem te kha a ni a, tah khanin sapthei chingtur thlanah te khan withheld te kha an awm a, a lehlam zawng taka ngaihtuah chuan, pawisa kha duh hunah a thleng chho thei bik lo a, sawrkar pawhin sem an duh ngei ka ring a , amaherawhchu remchan lohna awm a nih ka ring a. Karleh tih khan a kum leh dawn laiah an sem thei chauh a ni a, heng withheld te kha engzat nge an nih tih leh, engvanga withheld nge an nih? A then an withheld te phei kha chu hei COPU te, MIFCO Chhingchhipa min rawn hmu a, sapthei chingtu association hruaitu te kha an ni si a, saptheite pawh kha a hmun an nei bawk si a, eng teh khawng nge an hman tih lai te pawh kha a pawimawh hlein ka hria, kha lai kha min chhang thei em? Chu chu ka'n zawt a ni e.

**SPEAKER** : Minister zahawmtak chhang turin i sawm ang.

**Pu P.C. LALTHANLIANA, MINISTER** : Pu Speaker, kan member zahawm takin a rawn zawhbelhna tak a kha chu ka rin danin MIFCO in Captive Plantation hnuai sapthei a tih tir te an nih ka ring a, hmanni a kan han sem kha. NLUP leh RKVY-a keini Horticulture department in hma kan lakna ah hi chuan RKVY-a dawngtu te hi pek vek tawh an ni a. Tin, NLUP hnuai ami hi chu Phase-II ami te kalpui mek an ni a. Phase-I ah Tuikum Cluster ah sapthei thlangtu kan nei lova, Phase-II ah kan nei a, tunah sem mek zel a ni a. Tun thla tawpah hian eng emaw zat kan sem leh dawn a, chuvangin MIFCO lamin an enkawl ho kha an nih ka ring a, kha kha chu a chhan kan chhan sak mai thei lo a, a mal te te an pek nge an pek loh, member-in min hriatthiam ka ngen e.

**SPEAKER** : Awle, Pu Rinawma, zawhbelhna i la nei em? Nei tawh lo maw,, a tha e. Zawhna 79-naah kan kal anga, zawt turin Dr. K. Beichhua, MLA zahawmtak i lo sawm ang.

**Dr. K. BEICHHUA** : Pu Speaker, ka lawm e, District Council Affairs Department changtu Minister zahawmtak hnena ka zawhna chu :-

- a) Mizoram sawrkarin Government of India duh dan ang zulzuia Inquiry Commision Mizoram-a Autonomous District Council thuneihna lian zawk, additional power an neih theih nana a din khanin report an theh lut tawh em?

- b) Thehltut tawh nise, Mizoram Sorkarin Central Sorkarah recommend-na a thehltut tawh em? tih a ni e.

**SPEAKER** : Chhangturin Chief Minister zahawmtak Thanhawla i lo sawm ang.

**Pu LAL THANHAWLA, CHIEF MINISTER** : Pu Speaker, Standing Inquiry Commission din a ni a, report pawh thehltut tawh a ni. Amaherawhchu, Mizoram sawrkar in central ah a hranpa in a thehltut kher lo a. Tin, central sorkar in 6<sup>th</sup> Schedule hi din an tum a, chuvangin he Standing Inquiry report hi an ngaipawimawh dawn nge dawn lo kan hre lo a, eng ang zawngin nge 6<sup>th</sup> Schedule hi amend an tum pawh keini chuan kan la hre chiah lo a, chuvangin a hranpa a he report hi keinin kan thehltut ngaiin kan hre lo a ni.

**SPEAKER** : Zawhbelhna.

**Dr. K. BEICHHUA** : Pu Speaker, kan hriat theuh angin Mizoramah hian politics avanga inchirhthehna leh engemaw neuh neuh thu te a tam a, chuvangin hemi zawhna ka rawn siam chhan pawh hi, mipui hian thil dik hi hria se, engemaw thu diklo mai mai a, politics a thudik lo inchirh theh tumna awm te, a awm loh nan tih kha ka rilru a awm ber chu a ni a. 2<sup>nd</sup> Reform Commission khan 15- na report an pekah khan additional power pe turin, chu chu Ministry of Home Affairs, Government of India in Mizorama Task Force lo din tura a tih kha ania. State Government in Task Force ni lo in Standing Inquiry Commission a a din ta a ni a, chu chu 2009 ami kha a ni ta a ni. Chuan chu chuanin theihtawp chuahin District Council pathum te leh Assam a District Council te pawh kha zuk zirchiangin an hottute leh mipui te leh an hmunhna leh engkim a zir hnu ah, ka hriat sual loh chuan 2012 ah khan he report hi State a thehltut a ni ta a ni. Department 19, tunah hian District Council te hian 6<sup>th</sup> Schedule a, District Council te hian 19 enkawl lai an nei ta a, chutah chuan he an recommend na ah hian Department 32 enkawl tura recommend na niin ka hria a, chutianga Central Government in a State hnena thu a rawn pek tawh a State pawhin a he Commission a din a Inquiry a siam tir a, report a dawn tawh chuan engatinge ni, Central lam chuan an lo ngaihpawimawh leh pawimawh loh chu thudang ni ta se, State in a tih tur chu an recommend kha Central lama hlan chhawn kha a ni dawn lawm ni tih kha kan Chief Minister zahawmtak ka zawhbelhna a ni e.

**SPEAKER** : Kan Chief Minister zahawmtak kha sawm ila.

**Pu LAL THANHAWLA, CHIEF MINISTER** : Pu Speaker, Autonomous District Council pathum kan neih te hi power enhance sak thin tu chu State Congress Government chiah hi a ni. Tin, an budget te pawh tihpun sak thin tu chu Congress sorkar hi a la ni zel a, tun thleng hian a dang sawi tur awmin ka hre lo a. Tin, UT join an dilna memorandum central a an thelhuhah pawh an rawn ziak an rawn ziak a, chutah chuan Congress sorkar laka vuivaina an ziak ve miah lo va, party hotute nen he House ah ngei resolution a put luh chhun ang te an chhuanlam a ni. Tichuan, keini chuan in lak hranna lam ni lovin power sang zawk an neih kha pawh kan ti hran lo va, chuangin a tiam pawh kan tiam a. Tunah hian Council pathum te hian delegation siamin hmanni lawk ah pawh an zu kal a, an in biak reng laia lo in rawlh a tulin kan hre lo a ni. Tin, chutih rual chuan 6<sup>th</sup> schedule to the Constitution of India hi Home Ministry initiative in amend an tum tih kan hre tho bawk si a, khatih laiah khan inquiry report hi khutah an dawn tawh tho si chuan keinin a hranpa zu tih ve kha a tulin kan hre lo va, council te leh central lam inbiakn hi kan nghak mai a ni.

**Er. LALRINAWMA** : Pu Speaker, ka lawm e. Sports Minister zahawm tak chhan atan : Zobawk (Lunglei) - a Mini Sport Complex sak mek hi eng hunah nge zawh a nih ang? tih ka zawt e.

**Pu ZODINTLUANGA, MINISTER** : Pu Speaker, kan Member zahawm tak Er.Lalrinawma Starred Question No.80 chhanna chu :-

Zobawk State Sport Academy sak mek hi dt.31.December, 2015-ah zawh tum a ni.

\*Speech not corrected

**Er. LALRINAWMA** : Pu Speaker, ka lawm e, ka zawhbelhna chu, Contractor hi sum engzatnge pek anih tawh tih leh tun dinhmunah hian physical leh financial a achievement hi engzat percent ve ve nge a nih? tih ka zawt e.

**Pu R.L. PIANMAWIA** : Pu Speaker, ka lawm e. Ka zawhna chu Sakawrdai Mini Complex siamna tur hi engtikah nge thawh tan a nih ve theih ang?

**Pu T.T. ZOTHANSANGA** : Pu Speaker, a inhlat viau na a ka'n lo kai peng ve lawk a ni. Sports Minister hi hei kan vanneihpui khawp mai a, hmannah Chhangphut field min rawn hawn sak tawh a, tunah khian Sports Stadium Zotlangah min sak sak leh

mek a, kan Chief Minister hovin kan en tawh a. He Stadium-ah hian pawisa engzatnge ruahman a nih tih ka zawt duh a, tin, contractor leh executive agency min hrilh thei em? Engtika zawh tur nge, eng discipline te nge awm thei dawn tih leh engzatnge thawh a nih tawh tih ka zawt duh a ni.

**SPEAKER** : Awle, Minister zahawm tak chhang turin i lo sawm ang.

**Pu ZODINTLUANGA, MINISTER** : Pu Speaker, ka lawm e. Er. Lalrinawma zawh belhna, physical a an thawh zawh tawh chu tunah hian 35% a ni a, pawisa kan pek tawh chu 360.60 lakhs a ni. Tin, Pu Pianmawia zawhbelhna, Sakawrdai leh Zohmun chungchang kha, Pu Speaker Sakawrdai hi DoNER ah DPR te kan thehltut tawh a, routine project a awm a, theihtawpin sorkarin sanction kan move chhuak tawh a ni, tih kha ka chhanna ni sela. Pu T.T. Zothansanga chhanna chu Champhai-a sport stadium sakna tur atan khian sanction amount chu 220238.69 a ni a, contractor-ah hian MBCC chhawr an ni a, MBCC central sorkar in rawn pek hian state sorkar hian matching hi kan pek a ngai lo thin a, 100% funding tur a ni a. Tuna Champhai a kan sports stadium khi sorkarin tum tur nei lovin Central sorkarin zaa za a rawn tum a ni. Tin a zawh hun tur hi ni 14.9.2015 hi tinzawn a ni a, amarawhchu, kan ram sik leh sa te, kan working season hi a rei lo em em a, hetiang chiah a zo hman tur chuan theihtawp kan chhuah a. Tin, stadium-in a ken tel theih tur chu football ground a awm a, 8 lane 400 meters synthetic athletic international standard a awm ang a, tin, a bul lawkah Boxing Hall tha dah tur a ni bawk anga, tun dinhmun a progress a lawmawm kan ti a 35% zawh tawh a ni tih kha ka chhanna a ni e.

\*Speech not corrected

**Dr. K. BEICHHUA** : Pu Speaker, Pu T.T. Zothansanga khan chhimlam hliir a ti a, beram hmul mettu hmaa ngawi reng ang deuh rual zingah chuan kei a ngawi lo awm chhun ka nih avanga rawn zawt thin ka ni mai a. Chuvangin chhim lam kha a hranpa a concentrate bik ka ni love tih kha ka sawi duh a a ni.

Tuna ka rawn zawh ah khan Saiha ah khian Sports complex sport lama hmalakna kan Minister hian tuna a hmalakna a kalpui mek te hi a ni em tih ka zawt duh a ni.

**Pu ZODINTLUANGA, MINISTER** : Pu Speaker, Saiha ah sawn Indoor stadium kum 2005 vela a rel ringawt, a ban pawh a mawih ral mai anga tih tur a awm thin a, tunah sawn kan zo tep tawh a. Pu Lal Thanhawla kaihhruai sorkar chak takin Delhi-ah te sum min hmuh sak a, tunah sawn zawh tep tawh a ni a. Tin, Saiha saw project te siam turin kan va kal thin a, amarawhchu, vanduaithlak takin ram an nei lova, project siamna tur te chu ram min pe ula Central-ah kan bawhzui anga vawiinah kan Chief Minister goodwill hi um tur tam tak a awm a tiin Saiha-ah te ka va kal thin a. Amarawhchu vanduai thlak takin free land pek tur an nei lova, khami chhhung khan, risk kan la a, a bik takin sports council lamin tuna SSB ram an tih, an khawih ngam thin loh a kha sanction kan siam a kan va nawr rawih a, tunah sawn field zau tak sipai ram kha kan va lai lui a, chutianga kan laih tak chuan kan hriat danin council te pawh kan beng harh ve, SSB ram pass te pawh an cancel tawh niin kan hria a kan lawm hle mai a. Kan ramah kan Chief Minister-in kan thalaite hmakhua ngain theih ang tawkin duhsakna bik awm lovin theihtawp chhuaha turin tanpuina a guidance te kan la thin a, chungangah chuan chhimlamah pawh Pu Speaker kan theih ang tawkin hmun tha te free land tha te kan hmuh chuan project te siamin kan bawhzui nghal thei zel a nih tih kha member-te kan hrih duh ni se.

\*Speech not corrected

**Er. LALRINAWMA** : Pu Speaker, financial achievement kha a percent zawngin kan hre duh ve a, min la chhang lo deuhvin ka hria kha lai kha.

**Pu ZODINTLUANGA, MINISTER** : Pu Speaker, a percent zawng chuanin ka chhut thiam lova, a percent lo hian 360.96 lakhs hman tawh a ni a, a percent ai khan a chiang zawk lawm ni kan ti a, a physical percent kha 35 % a ni.

\*Speech not corrected

**Er. LALRINAWMA** : Sanction amount min hrih se a chhut theih mai ang a. A chhan chu physical achievement leh financial achievement hi a inmil em tih ka hre duh a ni.

**SPEAKER** : A relevant tawh meuh lo a ni. Zawhna pakhat khatia tihkual teuh mai kha maw.



**Er. LALRINAWMA** : Pu Speaker, ka zawhbelhna zawk kha a ni a, a rawn tla zep mai zawk chauh a ni a. Chuvang chuan tunah hian physical achievement leh financial achievement kha a in balance em tih kha thil pawimawh tak a ni a Mizoram Project kalpui reng rengah hian. Chulai te mai chu ka zawt che u a ni a. Tahchuan min hrih theih kha chuan House Member zahawm tak tak te pawh an ngaihthat dawn leh dawn loh kha a hriat dawn a ni.

**Pu ZODINTLUANGA, MINISTER** : Pu Speaker, a sanction amount hi nuai 1751.24 a ni. Tin, Zobawk hi ka'n sawibelh lawk ang a. DPR hi Vaibelchhe 34 vela siam a ni a. Chutiang chu kan beisei laiin, DoNER lam atangin Vaibelchhe 17.51 ang kha min rawn sanction a. Chumi an rawn sanction danah hian a hna puma pawisa rawn pe lovin khami DPR kan siam atanga a part khan in sanction kha an rawn nei teuh mai a. Chu chu a thawktu kan Agency PWD ten uluk taka an enin, Sorkar hmasa-ah te harsatna te a lo awm thin a. Hetianga an rawn sanction ang part time a sanction-a kan thawh chuan hna zo mumal lovin kan awm ang tih hlau-in, khami sanction amount atang khan working estimate an thawh tur chin an va survey tha leh vek a. Chutiang chu tuna a rawn delay-na chhan zing ami pakhat a ni a. A chhan chu kan hriat theuh angin, Central Sorkar atangin kan Sorkar hmasa-ah khan District Sports Stadium sakna tur tam tak sanction tur anga ruahman an nei a. Chungah chuan pawisa a lo thlen hma-in Pu Speaker, Work Order man tam tak an thawk a. Central Sorkarin an hnathawhte an rawn en a. Sanction tlak loha an rawn ngaih leh tak avangin, kum 2005 atang khan chung Contractor te chu pawisa pek ni tawh lovin, hna kha District hrang hrangah District Sports Complex kha chawlh a ni ta a ni. Chung ang chu a awm lohna tur atan theihtawpin hma kan la a. Kha pawisa kha kan Chief Minister zahawmtak Pu Lal Thanhawla Chief Minister a nih tirh atang khan theihtawp a chhuah a. Chief Minister a nih atanga thla 6 lekah vaibelchhe 12 chuang kha min zuk sawichhuah sak a. K-deposit in hnuchhiah mai ni lovin, leiba nuai 400 chuang kha kan rul a ni, pawisa awm lova an lo thawh tir kha. Chutiang chu a thlen tawh lohna tur atan kan Agency PWD ten an sanction amount atang hian a working estimate, a thawh theih tur chin estimate an siamtha leh vek a, chumi hnu-ah Tender-in Work Order te sem chhuah a ni a. Khalai kha ka'n sawibelh leh a ni e. Ka lawm e.

\*Speech not corrected

**SPEAKER** : Zawh loh te pawh a chhang tel hial ang ka ti. Zawhna 81-naah kal ila. Pu Lalruatkima, member zahawmtakin zawt se.

**Pu LALRUATKIMA** : Pu Speaker, Starred Question No. 81-na Animal Husbandry & Veterinary Department changtu Minister zahawm tak chhan atan :-

- a) RKVY/NLUP sum vawk no te sem tur leina atan engzatnge hmuh/ruahman a nih?
- b) Vawk note engzatnge sem a nih? Beneficiaries chhungkua engzat hnenah nge pek an nih?
- c) Vawk no te hi eng breed nge? Khawi atanga lei nge? Tute nge supplier?
- d) Vawk no te hi pakhat engzat man nge?

**SPEAKER** : A chhang turin a Department neitu Minister zahawmtak Pu C.Ngunlianchunga chhang turin i sawm ang.

**Pu C. NGUNLIANCHUNGA, MINISTER** : Pu Speaker, Pu Lalruatkima MLA zahawmtak zawhna chhanna chu hei hi a ni:-

- a) RKVY tan kum 2012-2013 ah vawk note leina atan ₹ 130.00 lakh hma a ni. NLUP sum vawk note sem tur leina atana hmuh/ruahman zat chu hetiang hi a ni. 1<sup>st</sup> Phase - ₹ 1272,20,000.00, 2<sup>nd</sup> Phase - ₹ 2522,16,000.00, A vaiin ₹ 3794,36,000.00 sen a ni.
- b) RKVY-ah vawk note 2000 sem a ni a, beneficiaries chhungkua 1000 hnenah pek a ni. NLUP vawk note sem zat leh beneficiaries chhungkua hnena pek zat chu - Vawk note pek zat – 98,688, vawk note, beneficiaries chhungkua zat chu chhungkua 12,336 an ni.
- c) Vawk note RKVY hnuai ami hi Hampshire Crossbreed leh Yorkshire crossed an ni. Tualchhung vawk leh Assam leh Tripura atanga lakkhawm an ni. Pigfed kaltlanga lak zat chu 1125. District tin ten an District huam chhunga sem tur anmahni an in zawn vawk note 875 a ni. NLUP vawk note hi Crossbreed a ni lo a, local market atanga lei niin, supply tu an awm lo. Beneficiaries ten anmahniin an in lei a ni.
- d) RKVY hnuai vawk note pakhat chu ₹ 6500/- zel a ni a. Hei hian a transportation, a phurhna tur a huam tel a ni.

Tin, NLUP hnuai hian Vawk note hi 1<sup>st</sup> Phase-ah pakhat ₹ 3000/- zel a ni a. 2<sup>nd</sup> Phase-ah hian a pui tur pahnih hi ₹ 3000/- zel a ni a, a dang paruk te chu pakhat ₹ 5000/- zel a ni. Helai hi han sawifiah law law ila a thain ka ring a. Vawk hri a len avangin, 1<sup>st</sup> Phase leh 2<sup>nd</sup> Phase

inkar hi kar hla tak a ni a. Sum helaia rate an siam leh tun dinhmun a inan loh avangin NLUP Implementing Board-ah kan harsatnate thlenin a rate hi min up sak a ni. Kha kha Pu Speaker, ka chhanna a ni e. Ka lawm e.

\*Speech not corrected

**SPEAKER** : Zawhbelhna Pu Lalruatkima.

**Pu LALRUATKIMA** : Pu Speaker, ka lawm e. Vawkte no te man kha price escalation atanga han chhut chuan kum hnih khat chhungin a letin a to hman thu kan hmu a, a mak hle mai a. A chhan kha khawchhak lam atangin kan la lut tho si a. Pu Speaker, PRRS natna kha tunlai hian a la leng em? Chutih lai chuan Burma vawk no te kha kan la lut bawk si a. Vawk reng reng kha lak loh turin thuchhuah kan siam a. Kha kha kan hnuklet leh tawh em ni tih ka zawt a. Tin, Pu Speaker, RKVY atanga vawk no te MLA bial tina an sem kha, opposition bial kha min pe ve reng reng lo mai a. Min pe ve dawn lawm ni kan tih pawh in, ruling lam Block te hlir kha an pe a. Kan duh ngawih ngawih lam ni lovin, kan bial chhungah khan ruling mi pawh ruling lo pawh lai taka thlan an ngai a. Kan minister zahawm tak pakhat khan Chhiahtlang-ah ruling bial enhran a ni lo e a ti bawk si a. Ruling bial leh opposition bial kha chu Vety Department hian in lo en hrang hle em ni, tih leh ruling MLA te leh opposition MLA te en hran an ni reng em kha tih kha ka'n zawh belh a ni e.

**SPEAKER** : A chhang turin a changtu Minister zahawmtak i lo sawm ang.

**Pu R.L. PIANMAWIA** : Pu Speaker, a la zawhbelh theih em? Ka lawm e. RKVY hnuaia Vawk note ka Bial chhunga pek ve kha Pigfed ho hmangin a niin ka hria a. A nu leh a pa pek turah khan 'a nu in a daih lo' an ti a, a pa ve ve te an pe a, inthlah pun a har duh hmel riau mai a. Chuvang chuan, a nu leh a pa pek tur kha a nih dan tur ang takin tih leh dan a la awm thei ang em.

Tin, NLUP hnuaia vawk thlangte thawh rah tunah hian Bial chhungah a lang tan viau va, vawknote nei tha tak tak an awm a, tunah hian ran doctor-te pawhin an chhinchhiah vek tawh a. Heng hi NLUP kan sem leh tura thlangtute hnenah kan pe ve thei ang em?

**SPEAKER** : Awle, Pu P.C. Zoram Sangliana'n zawt nghal mai se la.

**Pu P.C. ZORAM SANGLIANA** : Pu Speaker, RKVY hnuai atanga tuna ka hma ami zawh belhna a neih ang khan Vawknote semah a pui tur na na na a pa pek luh talh kha a nu-in thleng theih a ni ang em? Tin, a mawng ping pek te kha engtin nge an tih dawn tih ka zawhbelh e.

**SPEAKER** : Pu Lalrobiaka'n zawt nghal mai sela.

**Pu LALROBIAKA** : Pu Speaker, ka lawm e. Kei pawhin zawh ve ka duh chu RKVY hnuai ah khan vawkte kan han dawng ve a, kan lawm hle mai a. Amaherawhchu, Kanghmun tlangdunga khaw nga dawngah hian MNF hun laia R.D. Minister-in a lak chhuah ang deuh khan a thi fai vek a ni. Hei hi min replace thei ang em tih ka zawt duh a. Chutih rual chuan breed an sawi kha Ailawng ah te, Reiek ah te, Chungtlang ah te, Bawlte ah te kan sem a. Kan hmuh ve dan chuan Tuikuk vawk breed a niin ka hria, a mualphothlak ang reng hlein ka hria a. Tin, a note han en khan han dam chi zia zang niin ka hre lo va. Vawk vulh thang ka ni a, a no hle a ni. Chuvang chuan, khatiang kha NLUP a ni emaw, thil chi dang reng rengah pawh tih tak taka kan tih a ngaiin ka hria a. Tin, ₹ 6500 tih ah khan keini, a bik takin Kanghmun tlangdung pheia kan semah hi chuan Mamit atangin anmahni intum chawpin an kal/la vek a ni. Khalaia transport man nen a tel si kha chhui chian deuh pawh a tha awm mang e aw kan ti deuh a ni. A breed hrim hrim kha fimkhur zawka hlawh tling tak tak tura kan duh a nih chuan kan fimkhur lehzual a tha lawm ni tih kan sawi duh a ni e. Ka lawm e.

**SPEAKER** : Dr. K. Beichhua'n zawt ve leh se. An in zawh siak anga a tawk mai.

**Dr. K. BEICHHUA** : Pu Speaker, Opposition MLA paruk chauh kan awm a, Silpauline min duh sak ang khan Vawknote pawh hi min duh sak thei lawm ni? Quota pahnih/thum tal chu min duh sak thei lawm ni tih kha ka zawhna a ni a. Saihaah khianin 60 an sem a, pahnih kha DVO hnenah ka dil ngar ngar a ka chang miah lo. Kha kha a ni a, paruk tal Opposition MLA ho hi min duh sak thei lawm ni tih ka zawt e.

**SPEAKER** : Zawhna hun a tawp ta e. Chhanna hun a awm tawh si lova, engtingge? Kan chhan tir ang maw? Awle, minute khat chhungin a chhang zo hman ang chu maw.

**Pu C. NGUNLIANCHUNGA, MINISTER** : Pu Speaker ka lawm e. A zawhna neituin PRRS hri hi a la leng em, khaw chhak lam atanga lak luh phal loh in ti si a, tunah in lalut leh bawk si a, a ti a. Hri hi a leng reng bik lova. A len leh len loh Champhai atanga kan lak luh hi PRRS kan test vek a ni. A vaia kan lak luhah hian hri vei pakhatmah a awm lo, min kian san tawh niin kan hria a.

Tin, a pahnihnaah tuna a hnuhnung ber nen khan a inang deuhvin ka hria a. Silpaulin-ah min duh sak tehlul nen Vawkteah min duh sak ve lo a ti a. Kei pawh hei District Council-a ka awm lain opposition-ah kum 10 ka awm a, Opposition nih hi chu a hrehawm ve khawp mai hetiang velah hian. Engpawhnise, pe thei ang, thei lovang tih vel kha chu inbiak dan te pawh a la niang chu mawle.

Tin, Pu Speaker, a thih chungchangah khan rannung enkawltu kan ni a, a buaithlak khawp mai a. Keini chuan thi lo se dam vek se kan duh lain a awmna boruak a zir tein a lo danglam ve a, chungah chuan a lo thi palh te pawh a ni ang a. Amaherawhchu, official chuan Vawk RKVY hnuiaia dawngte a thih thu hi kan la dawng lova. Kha vawiinah kan member zahawm tak tak ten an sawi a, a lawmawm khawp mai.

Tin, a mawng ping kha a thleng theih ang em le tih kha chu a thleng theih tawh loh vang a, tunah chuan sem tur kha a zo vek tawh a ni. Dam tea kan awm chuan kum tharah hian RKVY atang bawk hian khatiang khan hma lak chhoh kan tum a. Khangah te pawh khan a tha zawk leh changtlung zawka kalpui kan tum a ni tih kha Pu Speaker, ka chhanna a ni e. Ka lawm e.

\*Speech not corrected

**SPEAKER** : Zawhna hun a tawp e. Awle, Chief Minister.

**Pu LAL THANHAWLA, CHIEF MINISTER** : Pu Speaker, chhan loh laklawh tak a awm hian House opinion hi min zawt thin a. A tlangpuiin House-in chhang zo vek rawh se kan ti thin a. Tun tumah hian kan Speaker zahawm tak hian min la rawn

ngai miah lo va. A tawp ta i ti hmak mai a, a tawp hmak mai a. Hei hi kan kalphung zel tur em ni ang tih ka'n zawt ve a ni.

**SPEAKER** : Tih leh tur kan nei a, kha khan hun a nekchep zel a. Zawnha hun chu a tlangpui chuan an pawt sei lovin ka hria. Mahse, hetah engtingge ka awm loh hlan khan in lo tih thin ka hre lova.

**Pu LAL THANHAWLA, CHIEF MINISTER** : Ka sawi ang kha kan tih thin dan.

**SPEAKER** : Hmundangah chuan zawnha hun hi chu an pawt sei ngaiin ka hre lo. Kan zingah Parliamentary Secretary zahawm tak Pu Z.S. Zuala'n thihna thu avangin House-ah chawlh a rawn dil a, chu chu kan phal sak a ni tih kha House kan hriattir a.

Tunah chuan report present turin Pu John Siamkunga, "The Mizoram Ancient Monuments and Archaeological Sites and Remains Rules, 2003," under Art & Culture Department, tin, "The Mizoram State Sports Concil Rules, 2005," under Sports & Youth Services Department leh "The Mizoram Forest (Establishment & Regulation of Saw Mills and Other Wood based Industries) Rules, 2010," under Environment & Forests Department te hi House dawhkana rawn lay turin i sawm ang. A copy kha sem nise.

**Pu JOHN SIAMKUNGA** : Pu Speaker ka lawm e. I remtihain tlem han sawi lawk ka duh a. Keini Assembly Committee-a Subordinate Legislation hi sorkar department hrang hrangin rules an siamte kan ram leh hnam tan a him tawk em tih te kan en thin a, mipuite tan phurrit a awm em tih te kan chhui bawk a. Tin, Rules siam tura dan tlawh chhan, Principal Act nen a inmil em tih te hi ngun takin, chik takin kan en thin a ni. Assembly aiawha hetiang kan lo zir thinna ah hian kan member te an hah thei em em a. Hetianga session awm loh laia session-a tih tur tam tak lo titu kan ni a. Mini-Assembly tia koh thin te pawh kan ni.

Vawiinah hian kan member zahawm tak tak, theih tawpa tha leh zung sengtute chungah lawmthu ka sawi a. Kan memberte chu Pu Lalrobiaka MLA, Pu T. Sangkunga MLA, Pu Lalthanliana MLA, Pu Lalruatkima MLA, Er. Lalrinawma MLA te an ni a. Recommendation kan siamte hi department lam ten an la bawhzui tur a ni a. Tun tumah hian rules hrang hrang kan exam mekte atangin rules pathum report pek tur kan nei

a, chungte chu henge hi an ni. “The Mizoram Ancient Monuments and Archaeological Sites and Remains Rules, 2003,” Art & Culture Department hnuai ami te, “The Mizoram State Sports Council Rules, 2005,” Sports & Youth Services Department hnuai ami te leh “The Mizoram Forest (Establishment & Regulation of Saw Mills and Other Wood-based Industries) Rules, 2010,” Environment & Forests Department hnuai amite an ni a. House-a report pek a nih atang hi chuan kan report pek hi House Property a ni tawh dawn a.

Hei hi a concern Department te pawhin an lo hriain ngaih pawimawh ber ah lo nei se tih ka sawi duh a. Tin, hetiang report pe thei tur hian Committee hi vawi 5 lai kan lo thukhawm tawh a. Tin, heng Rules te hi in lamah hawnin kan zir chiang thin bawk a ni. Tin, department hotute pawh kovin kan sawipui tawh bawk a, chutiang chuan Assembly Session neih loh lai pawh hian MLA te hi kan awm mai mai lo a ni tih hi vawiin hian sawi lan ka duh tel a ni.

Pu Speaker, i remtihna leh i phalna in Third Report of Committee on Subordinate Legislation hi he House zahawm takah hian ka rawn present e. Ka lawm e.

**SPEAKER** : Awle, tunah chuan Budget sawihona kan nei tawh dawn ang a. Nimin khan paruk vel chauhin an sawi a. Vawiinah zawh ngei ngei turin kan tihdan pangngai ang khan a minute kan insem leh ang a. Minute 15 chhungin sawi zawh hram kan tum ang a. Tunge sawi hmasa ber ang le? Aw, Pu P.C. Zoram Sangliana. Chair kan inthlak lawk dawn a khawngaihin lo nghak deuh rawh.

**DEPUTY SPEAKER** : Le, sawi tan tawh rawh le.

**Pu P.C. ZORAM SANGLIANA** : Pu Deputy Speaker, kan Finance Minister zahawm takin November 11,2014 a Budget a rawn pharh a sawi ni leh a hnu zel a a bu han en atang hian thil thenkhat han sawi ve ka duh a. Full Budget vaibelchhe sanghnih za leh sawmli lai mai hman dan tur chi hrang hrangte chipchiar taka min rawn hrih na ah hian, kan Finance Minister in huaisen tak leh kan harsatna dik tak hria a, a haw let tur awm theihna lama sum hmuh tuma kan tan a ngaih thu te, official te pawh chutiang lama hma la tura a rawn hriattir ‘fak’ ka ti duh kher a, a rawn hriattir fak hi official te hian zawm ngei se. Kan Project engemaw zat a puitlin loh na te hi official ten an tih tur an tih loh vang a ni fo niin ka lo hre ve a. Chungte avang chuan helai bawr hi kan Finance

Minister in a rawn sawi hi a lawmawm ka ti em em mai a. Official/Officer thenkhat, ka tawng mawi lo nilo sela chhuak tur hnaivai ten a rem leh rem lo ngaihtuah lek lova sum an lo siam vak na te avang hian an hnung ami ten phurrit nasa tak an tawk thin a ni tih kan Finance Minister hian a hria a ni ngei ang. Chuvang chuan Utilisation Certificate theh luh loh leh theh luh tlai avanga Central atanga pawisa lo kal tur dawn hrih loh te, UC theh luh ngaihna pawh awm lo khawpa chianguang lo a awm niawm in an sawi thin a. Helai tak te hi Vigilance Department te pawhin an bawhzui a pawimawh hle in ka ring a. Ka sawi sual a nih loh chuan (ka lo sawi sual a nih chuan min ngaidam tur ten min ngaidam mai sela) hmanni lawka kan Chief Minister zahawm takin, Champhai Civil Hospital an hawn te pawh kha UC la thehluh kim loh awm te pawh a awm niin kan lo hria a. Heng ang thil hi vawiin a kan Finance Minister sawi, kan Budget general discussion kan han neih takah hian sawi chhuah hi a tul tlatin ka hria a. Kan Finance Minister in huaisen takin a sawi tlang ta bawh a chungte chu a hmasa in ka'n sawi duh a.

A pahnihna ah chuan Pu Deputy Speaker, kan sorkarin VIP a tih te chungchang hi, mirethei ber aia mirethei zawk te nena khaichhuah vek tumna, NLUP, (a bikin) kaltlang-a chhungkaw engemaw zat a tanpui mek bakah tun kum kal mekah Department 9 te kaltlang a miretheite khaichhuahna turin NLUP bikah hian, vaibelchhe 312.32 lai mai an ruahman te hi a va han lawmawm teh lul em. Kim taka han sawi chhuah a han sawi zau pawh a chakawm hle mai a. Hei hian he sorkar hian a veina lam hi a Chiang a, mirethei te khaichhuah a tum a ni tih a ti lang a ni. Kan hre vekin ka ring a, September 24, 2007 ah khan, tute emaw sorkar hun lai khan ti ila a dik ang e, Kristian ramah hian pawl pakhat, Mizoram Poor Federation (MIPF) din a ni a. Tunah hian member registration pawh an neih zat ringawt hi 89578 lai an ni a. Hemite hian NLUP hi an hmu Chiang hle mai a, "Pu Lal Thanhawla sorkarin practical-in kan pawl hi min thiat a ni ta ber a. Aizawl khawpui chhungah mirethei leh loneituten chemtum nen kawng kan zawh a ngai tawh lo va, kan chemtum leh tuthlawh nen retheihna atanga chhanchhuah kan nih theihna turin, sum leh pai, kan mumang lam pawha kan la hmuh phak ngai loh min petu sorkar hian, min pek mai pawh duh tawk lovin, Department mithiam rualte, an thiamna hmangan kan eizawna, kan hlawhtlin nan min vil tir zui bawh si a. Chuvangin, kan pawl a awm zel a ngai ta love" tiin kan Chief Minister zahawm tak remchan hunah official-a an pawl thiah na ni siam an tum ta hial a ni. Hetiang a nih avang hian policy dik, miretheite khaichhuahna policy han auchhuahpuina hun remchangah ka'n la duh a. Pu Deputy Speaker, chu mai a la ni lo, an member in ziak lut atanga hmun thuma thena hmun hnih aia tam mah in kan Chief



Minister, a remchan huna official-a an pawl a thiah ni ah, he an dinchhan leh an dinhmun khai chhuahna programme ruahman tu pawl Congress Party hi zawm an tum nghe nghe a ni tih an phalnain he House-ah hian ka'n sawichhuak a ni.

October 16, 2014 kumina Mizorama thil thlengte kha a va danglam em ! UNO nena thawh dunna thuthlung Mizoram sorkar-in a sign ta rup mai a nih kha. Kum 48 kaltaa he ramin UNO a hriat dan nen chuan a va danglam ta em. Engvang nge ? A ngaihna hria, mi retheite khaichhuahna tur programme neitu kaihhruaina hnuaiah Mizoram hi enkawl a ni a. Chu chu mirethei ten lawmna dar an vuakna a ni. Chumiin a tih chian em em mai chu Pu Deputy Speaker, zir chiang, zir lawk chung a policy leh programme kalpui a nih zia a tilang a. Zan thum mumang emaw, duhthusam policy emaw nena kum sawm sorkar kal pui ngawt nen kha chuan inanglo tak a ni tih hi hei hian a tilang chiang em em a ni.

A palinaah chuan Pu Deputy Speaker, kan sawi leh duh chu Plan sum cheng vaibelchhe 3140 chhunga sector hrang hrang sum hman dan tur kan Finance Minister-in a rawn sawiah hian buhfai, tui leh electric a kan sum leh pai dinhmun chiang takin kan FM khan min hrih a. Heng pathum bikah hian kan harsatna te sutkian a nih theih nan sorkarin ruahmanna a rawn siam hunah, a bik takin keini, MLA te hi hmahruaitua kan tan a ngai a nih pawhin, hmahruaitua kan tan a pawimawh hlein ka hria a. Chu chu mipuite pawhin min zawm theihna tur a nih ka ring. Hemi bakah hian kuminah hian kan sum neih ang ang kan pharh tawh a, kum lo kal leh zel atan chuan mipui leh chhungkaw tin min nghawng bik Department hi a awmin ka hria a. Department pathum a hmingin sawi mai ila department hrang hrang then tawh chu ni mah se la Education Department te, Health Department leh Home Department ah te hian, Education Department te hi nakin zela kan ram enkawl tur thangtharte enkawl na a ni kan ti a, waviin thlengin zirlai au aw, khawtlang hotute au aw chuan zirtirtu an indaih lo chuti khati kan harsatna tih reng mai a ni a. Hengah te hian kan sum leh pai hi Anganwadi atanga college thleng hian a theih ang angin sawr bing deuh ta ila.

Tin, chutiang bawkin Health Department ni se la Health Worker ten an hnathawhna a ni lawm ni, hmanni lawka kan sorkarin National Award ropui tak a han dawng te hi sorkarin kum 5 kal ta atang khan a bikin chak taka hma a lo lakna avangin heng thilah te hian hmasawna a kal nasa si a. A man-power lamah hian an indaih lo a ni Pu Deputy Speaker. Nurse leh doctor ringawt a ni lo, an bungrua tha tak tak sub Centre thlenga an dah enkawltu tur chowkidar te nen lam hian an mamawh a ni. Heng thil te hi kan phalraina tur niin ka hria a. Tun kum kal lai mekah hian kan ti lo

a nih pawhin nakuma Budget tih leh dawn hunah te chuan heng ang thilah te hian sum phal deuh ila ka duh.

Tin, Home Department pawimawhna kan hria, ramri hrulah kan awm. Kan sorkar chak tak leh kan Home Minister chak takin officer te nena hma an lakna avangin vawiinah hian ram nuam takah kan han awm zel a. Kan thian tam tak Mizoram rawn tlawhtuten sawi nuam an tih zia leh a thlamuanthlak zia hi an sawi bang lo, thin a, hnamdangte hian. Chutiang chu a nih rualin vawiin hian hmanni lawka kan Home Minister-in a sawi ang khan Police Department ah ringawt pawh hian post ruak 1500 chuang kan neih hi a bika hnawhkhahna tur kan zawn a ngai. Harsatna eng emaw lo awm ta se la engtinngte kan inven zawh ang. Kan state, kan sorkar ngei te pawh hi, kan khawpui chhungah te pawh chutiang zelin. Department dang kha an pawimawh lo ka ti hauh lo va, heng Department thum bikah te pawh hian kan pawisa neih ang ang te hi dah uar in, hman tangkai leh mipui te pawn an hriat thiam tur a nih ka ring.

Tin, a bik takin Pu Deputy Speaker, MLA ten kan fund neih MLA, LAD kan tih nuai 30 kan neih mek hi kan hmang tangkai ve em emin ka hria a, a endiktu te lah hi bial mipui zawng zawng hi an ni mai si a. Chungte avang chuan hman dik loh pawh theih loh tluk a ni. Kumin atan chuan tih theih tawh loh mah sela, kan Finance Minister zahawm tak hian member te kan lawm tlanna tur ni bawkin ka hria a, MLA, LAD Fund atan hian 2015-2016 ah chuan one(1) crore hian min rawn tih pun sak ta se la. Chuta tan siam rem ngai a awm a nih pawhin thil chi hrang hrang siam rem ngaiah pawh kan ip tlan mai kha a thain ka ring a. Chutianga rawn siam rem dan tur chu kan Finance Deptt. Officer-te hotute hian an thiam ngawtin ka ring. MLA ten kan fund, kan bial chhunga kan hmanral hi a dik tak chuan mi dang sum leh pai, tawng mawi lo ni suh se la, Pu Dy. Speaker, Department dang sum hman dan te lakah hi chuan senso hi a intlem hleih em! Chungte avang chuan hmangaihna nen kan khawtlang a mite ngei ngei khan an han thawk thin bawk nen. Helai hi min han tih sak se la State chung development-a khai rual zawk ang. State kum 28 lai hmel hmu lo ni tawh kan ni bawk a, kan ram leh kan hnam tan na na na chuan a bikin hmasawn nan, mite zah kan kai nan huaisen taka vawiina kan Budget, kan dinhmun dik tak kan Finance Minister-in a rawn sawi chhuak a, min rawn hrih ang hian heng thilah pawh hian hma lak zui ngei ni se la ka duh hle a ni.

Pakhat leha chuan Power Sector chungchangah hian Pu Dy. Speaker, han sawi ka duh a. Kan sorkar chak tak hmalakna han thlir hian kan luipui, luilian zawng zawngte hi chuan an power pek theih zat min han hrih thei ta vek mai hi a ropui ka ti a. Khang zawng zawng kha khuap

ni ta ila kan ram hi thliarkarah a chang dawn emaw tih mai tur khawp a lo ni a, kan suangtuah thin a, a li chin tur te nen. Hetiang taka chaka kan Minister kaihhraina hnuai Department officer ten power-a kan intodelh theihna tura an hmalakna hi a chhuanawm thlawt a ni. Amaherawhchu, kan ti ang e, heng an ti dawn a nih pawh hian economical area buh leh bal thlai thar thin te a chim chhiat theih tur lam kalsan hian chutiang tlemna hmunah chuan in concentrate ni se. Kan khamkhawp bakah hralh chhuah tur tam tak kan nei tho ang tih hi a Chiang Hle a. Hemi bakah hian tlangram tlang zum tak tak, tlang dung ni se thli dawng tha zawnga chhim leh hmara khawh tlang nei kan ni si a. Hun hmasa lamah khan sorkar hotu zahawm tak hotu lu ber khan, Zoram hi “Switzerland of the East,” ah siam a tum thu a sawi khan, E khai! sapram leh a bikin Switzerland-ah te an tih thin angin windmill hmangin kan ramah hian eng tha taka min pek a tum a nih dawn hi tiin kei ka rilru takin ka lo phurpui hle a. Kum 10 an sorkar a liam a, a tawp dawn thlengin, tawp hnu thlengin windmill a an hmalak keini ang duang chuan kan hre si lova. Tunah pawh hian lui tui chakna hmanga power thar chhuah tur kan nei tih kan mithiamten an han hmu chhuak hi a lawmawm ka ti a, kei ka chhuang tak zet zet a. Minister hovin an zavaiin lawmthu ka hrih duh a ni.

Mahse, kan ti talh teh ang, kan Chief Minister-in a sawi fo angin compensate hian kan hnam hi min tibuai hle mai si a. Example pakhat chauh han sawi ta ila, Tuivai Hydel Project sawi tan tirh a nih vel lai khan Phullena Addl. BDO Office te chuan khi lui dungah khian ram leh hmunhma nei engzat nge awm tih an lo zir Chiang Lawk a. Chuta an zir Chian Lawknaah chuan mi 36 velin pass an nei a ni tih hi, Pu Dy. Speaker, tun Nilaihawhtanni kal ta, kar kal ta maiah khan Champhaiah an han thut khawm lehnaah chuan chhungkaw 500 chuangin pass chi hrang hrang an lo nei leh hman reng tawh nia. Chutiang te chu a nih avangin compensate tlemna tur lam tlang chhip atanga power pek theihna tur siam chhuah na lamah hian kan department a kan mithiamte hi tan la ta se la. Chumi ngei chuan kan ram tan hian hma thar, hmasawna duhawm, compensate buaipui tlemna tur kha min thlen ang tih kha ka ring a, thli lah kan ngah nasa mai bawk si a. Heng te hi kan sawi tel duh a.

Department dang dang, Sports Department te, UD&PA te, RD Department te, Department zawng zawng te hi ka tarlang vek seng lo. Heng Department atanga khawpui leh thingtlang, a bik takin kan thalaiten khawvel thar an thirna tur hawia hmalakna kan sorkarin a neih kan Finance Minister-in a rawn chhawp chhuah te hi sawi vek seng lo mah ila, kan Finance Minister-in Budget a present ni ah khan a rawn tar lang vuai vuai tawh bawk a. Heng ang te hi kimchanga sawina hun Department Demand kan sawi hunah te a la awm ang a. Hetah hian ka han sawi belh leh talh duh chu Oil & Natural Gas zawnchhuahna lama kan hmalakna te hi a va

chhuanawm tak em. Mahni bial sawi hi ka hreh viau nain sawi ta ila, ka bial Meidumah ngei Natural Gas laihehhuah tur a awm a ni tih han hmuhchhuah te hi hmundanga zawn zawng zawng te pawh hei hian Mizoramah chutianga te chu a awm a ni tih a ti lang ta hrim hrim mai a. Chutianga a zawngtuten zalenna nen muanna hnuaiah phur taka an hnathawh theihna kan sorkar chak tak maiin a buatsaihsak rah a ni tih hi sawi loh theih loh niin ka hre tlat a. Chuvang chuan, kan House Leader kaihhruaina hnuaia kan Minister zahawm tak takten an Department theuh officer te nena lungual tak leh pheikhai rual taka hma an lakna hian vawiina a kan Finance Minister Budget rawn pharh pass pui tura min ngen hi lungual taka pass a chak awm hlein ka hria a, Pass phar theihna tura kan han awm na te ang te heng ang chhung pawh a miretheite hnenah chaw fairel bel ruak chu sawi loh tam harsatna tawh miah lo maia ruahmanna an han siam te hi lawmawm ka ti em em mai a. Chuvang chuan General Discussion kan han neih chungchangah hian ka han sawi ve duh chu a lawmawm ka ti a, kan hotute hian heng ang hi an lo tih theih zel na tur atana pawimawh ka tih em em mai erawh chu Roreltute leh mipuite hian, Pathian duh zawnga kan nun phawt chuan lei malsawmna pawn lam leh chhungril lama malsawmna chhiarsen loh in kan Pathian hian mal min sawm zui zel dawn a ni tih hi a langin ka hria a, chutianga tur atan chuan kan budget pass hi a nghahhle awmin ka hria a chutianga tur atan chuan ka rawn support a ni tih ka han sawi ve a ni e. Ka lawm e.

**DEPUTY SPEAKER** : Awle hun i hmang thiam khawp mai, tunge sawi leh ang Pu T.T. Zothangsanga

**Pu T.T. ZOTHANSANGA** : Pu Speaker, ka lawm e, tun laiin chanchinbu ah te leh mipui kalkhawmna reng rengah kan sorkar dukhawp lohna a ri ring hle a, chu chu thiam taka tuten emaw kan sorkar sum harsatna avanga chhe lailet der anga an puhna vang te pawh a ni ang a. Sum harsatna hi keini ang mahni intodelhlo state te zingah chuan a part pawimawh tak te zing a mi a ni a, kan kal tikham thei hial khawpa harsatna nasa a ni a, Mizoramah hian a mikhual lem lo.

Sorkar hrang hrang kan tawn tawh te pawhin hetiang harsatna hi an lo tawh tawh a ni tih kha kan sawi hmasa duh a. Tin, tun tum kan sorkar hi vanduai deuhna pakhat kan nei a. Nikum December ah sorkarna kan han la tan a, Christmas vuak vet leh kumthar vuakvet te kan han tawng chho a, chuan session te kan han nei a, chumi zawhah Hrangturzo election avangin engmah ti hleithe lovin code of conduct in min han phuar a. Chutih rualin central lamah inthlanpui lo ni bawh a, Mizoramah pawh MP kan han thlang a, kum chanve thleng hawlh mai kha code of conduct in min phuar a, engmah ti hleithe lovin kan awm chho kha a ni a. Chutih lai karah code of conduct

an zo a, kan hna te pawh mar deuhin kan kal tawh ang chu maw tia ngaihtuahna kan siam laiin central lam sorkar inthlak thlengah a thar hlir mai an lo ni ve a. Kan hotute an zin vei sek tawh si a. Tin anmahni department turte an la hrechiang lo a, hmanni lawk thleng khan Ministry an la tilian chho a nih kha.

Khatiang anih avang khan Mizoram mai ni lo, India rama state hrang hrang hian harsatna kan tawh chho a, khulaia kum dang anga kan lo neih thin plan discussion mumal tak keimahni state in “kan mamawh hetiang tawh a ni e” ti a ngenngawl taka kan tarlan ang chi boruak kha Planning Commission an thiah tak avang khan a theih ta bawh si lo va. Tun tuma kan Budget discussion pawh hi a nihna takah chuan kan hotuten kan mamawh tawh an zu sawi a, “heti zat hi a ni e” tih lam ni lo in, an nin khulai atanga min rawn pek tawp mai kan lo sawi ho a ni a. Chulai te chu kan vanduai riau a hriatna kan sawi chu a ni a.

Chetna hun hi kan la nei lova, thenkhat chuan kan sorkar hi ‘sum enkawl thiam lo’ te min ti a, sum enkawl thiam tur hian tun tumah hian sum a la rawn thleng lo hrim hrim a ni tih ka’n sawi hmasa duh a. Chingal leh Saum a la in tawh lawi vel lai karah harsatna kan tawh niin ka’n hre deuh mai a ni.

Tin, Pu Deputy Speaker, min sawisel tur berte chu oppositionte an ni lo thei lo va, tunhma kum 10 an sorkar lai khan harsatna te hi an lo nei ve thin reng em, an lo tawh ve thin reng em tih te ka theih ang angin kan en let ve a. An lo nei ve zauh zauh a nih ka ring a. Aizawl Thupuan July 3, 2003 issue no 152 naah khan an rawn sawi lang ve a. “Sorkar hnathawk loan 2<sup>nd</sup> instalment hlawh ah hman a ni. Delhi drip khai turin CM leh CS an kal” tih te pawh kha Aizawl Thupuan Chanchinbu ah chuan heading ah hian a lo awm ve kalh tawh a ni. Tin gap grant tih vel kha an zuk buaipui dawn a ni tiin a inziak a. Chubakah March ni 25, 2004 Aizawl Thupuan ah pawh khan a rawn ziak leh a, “Hlawh atan PMGY an hmang” a rawn ti a, PMGY sum atan hian vaibelchhe 3.03 an rawn sanction a. Chu chu zirtirtu 1478 te hlawh atan an pek fai avangin UC kha mumal takin an siam hleithe i lo va, chumi avang chuan kan dawn zel tur centralin vaibelchhe 7.05 kha min rawn pe duh ta lo va, kan lo hloh phah ve tawh thin a lo ni. Tin, Pu Deputy Speaker, chu mai bakah September ni 3, 2003 a Zozam Times ah bawh khan Pu Thana te party MPC party hian press release an siam a, chuta an press release siam ah chuan “Sawrfu tur chuang awm tawh lo” tiin sum harsatna nasa takin an lo bei ve tawh a ni.

Heng kan sawi duah nachhan chu tunah hian keimahni sorkar hi sum enkawl thiamlo leh chhe lailet der angin sawi kan lo ni tawh thin a, sawi ang diak diak hi chu a ni lo a niang tih te kan ring a. Pu Deputy Speaker, i phalna in Zoram Times October ni 16 ah pawh khan a rawn chhuak a, kum 10 rorel tawh Chief Minister khan Mizoram sum dinhmun chhiatzia te kha a lo sawi thiam khawp mai a. “Congress sorkar chu kan financial position hian a hnuk tlu thei a ni” te a rawn ti a. Chubakah, “Naktukah sorkar ta thut dawn ta ila ka huphurh ber chu leiba sang lutuk hi a ni e” a ti a. Tin, “MNF hun laiin hlawh pek theih loh engmah kan nei lo” te a rawn ti a. Helai a thu ziah hi dawt a ni chu kan ti dawt lo ang a ramhruaitute an nih avangin. Amaherawhchu, Mizoram politician te karah hian hlauh deuh mai pakhat ka nei a, naupang te leh mi anglo te ai hian thudik hi kan sawi tlem ang tih erawh chu ka hlau a ni.

Pu Deputy Speaker, K deposit te hi kan han sawi thin a, nichinah te pawh zawhna leh chhanna ah te pawh khan sorkar lam beih nan tak khan kan hmang a, state dangte pawh hian an lo dah ve thluah mai a lo ni a. Kum 2012-2013 a state lian leh a te te theih ang ang in kan thlir kual chhin a. Chutah chuan Mizoram 984.9 vaibelchhe chuang vel kha kan neih laiin Arunachal chuan vaibelchhe 843, Nagaland in vaibelchhe 1362 te, state te ah an lo nei a, Meghalaya pawhin vaibelchhe 700 chuang a lo nei mek bawk a.

Chutih laiin India rama kan state liante in thlir ve thung chhin teh ang kan ti a, Andhra Pradesh ah chuan vaibelchhe 3512.06 K deposit ah an lo dah a Gujarat, India ram model state Pu Modia te sorkarna thin ah khuan vaibelchhe 2756.50 lai mai K deposit ah an lo dah ve bawk a ni. Madhya Pradesh ah pheih chuan vaibelchhe 7500 a lo ni a, khangte kha state dang dinhmun te a lo ni a. Chuvang chuan nichina kan Finance Minister zahawm takin a sawi ang khan, MP election te kan han nei thin a, chungah te leh tul dangah han hman chhuah zeuh zeuh a ngai thin a, chung avangte leh thildang avangin K deposit ah hian dah a ngai thin a ni a ti a.

Kan sorkar hmasaah pawh khan tam tak kha an dah ve thin tho a 1998-a Congress in sorkarna kan han chhuahsan khan vaibelchhe 93 kha K deposit ah kan hmu a. A kum leh party dang an rawn lal khan vaibelchhe 179 ah a zuang dawh mai a ni. Tichuan tlem tlemin a pung chho ta a, K deposit ah hi chuan tute pawh sorkar ila dah a tam leh dawn hrim hrim a, chuvangin inbeihna hi han ring hle thin mahsela mipuite pawh hian in lo hriatthiam kan duh chu K deposit hi eng sorkar ah pawh hian a awm a ngai a ni. State lianah leh state te ah te pawh a awm a ni tih kha ka'n sawi duh a ni.

Tin, Pu Deputy Speaker, leiba chungchang pawh kha kan han sawi leh a State lian te hian leiba hi an lo nei ve tho em? Kan thenawm state kan unau te hian an lo nei ve tho em tih te pawh kha kan en kual leh a, keini hian vaibelchhe 5114 vel kan ba a, chutih laiin Assam chuan vaibelchhe 32896 lai mai lai mai an lo ba a. Tin, Nagaland in vaibelchhe 7452 (sangsarih zali sawmnga leh pahnih) an lo nei a ni. India ram state model a kan ngaih Andhra Pradesh ah pawh vaibelchhe 1,69,000 (nuai khat sing ruk sangkua) chuang zet mai leiba an lo nei a, chu mai bakah Gujarat khuan in vaibelchhe 1,66,667 (nuaikhat singruk sangruk zaruk sawmruk pasarih) an lo nei a ni. Chuvangin ramin hma a sawn dawn chuan development lam hi kan en nasa lo thei lo a, heng development kan han thawh chhohna ah te hian leiba te hi a pawimawh berte zing ami a ni.

Tunah hian kan bat tam zia kan hria a, a tam kan ti a kan in mawhpah kual a, amaherawhchu han in hmu chau viau thin mah ila state dang te pawh hian an ba hnem viau thin a ni tih hi mipuite pawh in kan hriat a tha in ka hria. Leiba hrim hrim hi chu ti lutuk a hlauh tur niin ka hrelo a, hetiang pawisa lo let leh thei chi ah te chuan huaisen taka kan kal hi a tul ang tih hi kei chuan ka ring a. State lian model a kan ngaih Gujarat leh Andhra Pradesh te pawhin khatiang taka an lo ba a nih si chuan, keini hi chuti teh chiam a la ni si lo, a ti a rilru kan siam ve a ngai in ka hria a. Dik tak chuan kan leiba tam na chhan pawh hi school 337 kan upgrade ah khan kum 5 chhungin vaibelchhe 369 (zathum sawmruk pakua) kan sen belh a ni. Tin IR battalion 3 kan din khan vaibelchhe 585 (zanga sawm riat panga) kha kan sen belh baw a ni. Khatiang tel lo pheikha chuan kan leiba hian hma a sawn lo reng reng. Kha kha mipuite pawh hian in lo hriat kha ka duh khawp mai; na tak leh ring taka party anga theihtawp chhuaha kan in beihna karah hian thudik hi chu tarlan ni thin sela mipuite pawh hian kan hrethiam turah ka ngai a ni.

Tin, Pu Deputy Speaker, kan vanneih na em em chu harsatna karah kan awm emaw kan tih mek laiin Mizo fate zingah chuan kan Chief Minister hi sum lam ah chuan a hre ber turah ka ngai a, Chief Minister kum 5 zet a lo sorkar tawhna mai bakah Finance Commission ah te pawh member a lo ni ve tawh thin a, chuvangin tu ten emaw “nem muka liam zawih zawih, tuma thal ve theih loh tui khur” an tih te ang ni lovin a takin a hmun hi a zuk hre chat chat turah ka ngai a, chuvang chuan a thlaphan awm hi ka hre lo a ni. Sum harsatna kan sawi mek lai hian Champhai lamah lo kal ve chhin teh u Champhai lamah chuan Pathian zarah development hi kan hmu tha khawp mai a, kan lawm a ni. Hmanni lawkah hospital tha zet mai vaibelchhe 20 (sawmhnih) chuang man kan hawng a, field tha deuh mai kan hawng nghal baw a, Zotlangah vaibelchhe 26 (sawmhnih paruk) velin tun ah hian field kan buatsaih mek a, College hawn theih tep a ni a polytechnic hawn mek tur a ni baw a, tin, ITI kan sa baw a. Chu chu keimahni bial bikah a ni a,

sawi tur pawh tam tak a la awm a ni. Chutih ruala ka sawi duh chu Aizawl khawpuiah hian Secretariat kawngah te pawh sawn kal ila, kawng thlangah te sawn in lian tak tak a ther fer fur mai a, a lawmawm ka ti a, in sak te saw a lian hlawm em em mai a. Kan sorkar ah kan pu berin a sawi, motor leina te, thalai te phai lama thawn chhuah chungchang a ni emaw, Hydel Project siam chungchang a ni emaw, kawng laih chungchang a ni emaw, in sak chungchang a ni emaw, kan Chief Minister zahawm takin a tul hunah sum kan hmang zel ang a tih ah khan mipui hi i inngat ngam ang u. Hemi kawngah hian kan Chief Minister hi a rin ngam a ni tih kan sawi tel duh bawk a ni.

Tunah hian kan sum dinhmun hi kan duh thu a sam lo a ni tih kan hria a, hei hi thil thar a ni lo, tuten emaw sawi nuam ti viau an awm a niang, tun hma pawhin sorkar hnathawkin hlawh lak theih loh te kha an lo nei ve nual tawh thin a ni tih kha kan hriat a pawimawh bawk a ni. Kan Chief Minister hian hriat tur tul a hria ang a, thawh pawh kan thawk chhuak bawk ang tih kei chuan ka ring tlat a ni.

**DEPUTY SPEAKER** : Kan inthlak lawk ang.

Pu Chairman ka lawm e. Kan motor vehicle chungchang ah kan budget bu kha kan en a, motor vehicle tih ah khan vaibelchhe 1256.40 (nuai sangkhat zahnih sawm nga paruk point sawmli lai) mai kha a awm a, a tam ka ti khawp mai a, Home department leh transport ten an lo hman tlema han tam deuh kha chu a hriatthiam theih mai a. Helai ah hian kan Finance Minister in min lo chhinchhiah sak se ka duh chu in renchem theih mai niin ka hria a. Workshop-ah te pawh hian kan seng nasa lutuk palh thin em? Central workshop siam te a rem thei em tih te ka ngaituahna ah a rawn awm a, an mamawh keimah nin kan hman piah lamah hian tuten emaw an lo intih thiam avang a in sen teuh teuh theihna khawvelah hian kan lo awm tawh thin a, khatiang khan min la hawi san chiah lo a ni awm e.

Tin, Department thenkhat te society anga awm thenkhat te hian an motor te kha an charter a, sum siam nan an hmang thin niin ka hria a, entir nan SSA angah te chuan kan project director emaw, tu emaw motor han kawl thei ten motor an lei a, anmahni motor kha thla tin ₹ 30,000 (singthum) ten an hire tawp mai a ni, kha tiang chi kha Mizoram ah hian tam tak an awm in ka hria a. Khatiang te a awm a nih chuan sum renna lamah kan kal mek ta bawk a, kan hotu te khan min lo chhinchhiah se a tha in ka hria a. Ka rilru takah chuan hetiang motor an mamawh a nih pawhin Finance emaw, GAD te emaw nena inkawp ho a ren chem dan zawnga ruahmanna



siam sak theih awm ni a tha in ka hria. Tender system chi a ni em ka hre lova, a ti thei fa te income kan va siam sak hi a ni ringawt mai a, chuang chuan khatiang chi te kha sum kan ren chem nan hria ila. Kan zirna kawngah hian kan hotuten min lo hriat sak se ka duh a ni. Chumai bakah a tam zawk RMSA te, SSA kan tih te phei chuan hetah zitirtu atanga va awm kha an ni a, anmahni level pui te aia han che thei lutuk an hmuh te khan zirtirna boruak hi a ti chhe ve thei a ni. An aia junior te te office ah khan thil ti thei takin an lo awm a, va dawr a ngai a, a senior te an va dawr a, thu tak leh mahni nih na hmang thiam tak an lo nih phei kha chuan an thawh hona kha a chhe vek thei a. Khatiang te khan khalaia an awm reng theih dan tur kawng te kha an ngaihtuah a, khalai rawn awm ve te pawh kha an chak a. Khatiang boruak thleng khan vawiin ah hian kan sawi ho hi a tha in ka hria a ni.

Tin, Pu Chairman, rent lam kha rent kan chhut chhuak leh a nuai 403 (zali leh pathum) lai kha niin ka hria, hei hi nikuma Assembly zawhna Unstarred Question ah khan ka zawt tawh a Mizorama kan department hrang hrang te hian sorkar in rented house anga an luah ang chi engzatnge tih kha vawiin ah hian ka rawn chhawp chhuak hman ta lo a, amaherawhchu nuai 403 (zali leh pathum) lai mai kan la seng tih kha a rawn lang a, hei hi a pawl ka ti a. Kum 1986-ah state kan hmu a he kan ram leilung ngeiah keimahni office hi man neiin tam tak kan la luah hi a tha lo in ka hria , hei hi kan Finance hotute pawhin min lo hriat sak sela, department hrang hrang a rented house luah te in zawng chhuak in engtin nge ram kan neih ve theih dan tur kawng te pawh hi kan zawn a ngaiin ka hria. Zep thu a awm lo va, Officer tam tak te chuan an mahni chhungte leh an vua leh vangte in luah reng theihna a nih avangin hma an la duh lo tih te a awm a ni, kan state kal zel tur atan hian kan ramah kan office hi chuan hmun hma hi a nei ve ngei tur a ni tih ngaihdan nghet tak kei chuan ka nei a, khangte kha min lo chhinchhiah sak theih chuan ka lawm khawp ang.

Pu Chairman, moveable leh immoveable property sorkarin a neih ang chi reng reng hi register vek a tha in ka hria. Sorkar na kan han tan a Parliamentary Secretary-ah min han dah a, Pu John-a Supply Minister kan thlawp chho a ni a, kan hna hmasaber ah chuan keimahni Department property leh thil neih zawng zawng hi hmun tin ami hi hmu chhuak vek ila, hrechiang vek ila hei hi chu kan hrechiang vek tur a ni kan ti a. Department-in a lo hriatchian loh thil tam tak a awm thei a ni. Hetiang chi zawng zawng hi Department tam tak hian hrechiang vek ila, hrechhuak vek ila a tha in ka ring a. Secretariat-ah leh G.A.D hian a copy kawl vek sela; tunlaih ram mamawhna te a nasa tawh a, mimal, sorkar ram neih sak hreh lo tak tak te kan awm a. Tin, chutih rualin a pawl ang in, a kohhran ang pawhin a ni mai

thei, sorkar ram a nih avanga va nek ngam mihring hi kan tam tawh a, chuvang chuan kan fimkhur a ngai a, vaiho tih dan takin a ziak lamah hian kan fel hmasak hi a tha in ka ring a, hei hi a pawimawh khawpin ka hria. Entirnan minister quarter-ah te pawh kan han awm ang a, minister te pawhin an chhuahsan hunah an duh duh kha chhuahpui a vaw chhe mai lovin khatiang kha G.A.D lamin uluk takin lo kawl sela khatiang kha keimahni hmalakna tur kawng pawimawh tak niin ka hria.

Tin, Pu Chaiman, kan Chief Minister hma thlir thui dan hi a tha ka ti a, han sawi leh lawk ka duh a. Mizo leh Mizo te kan in ral beih a, kan in ringhlel zo vek thin a. Tunhma deuh khan sorkar sipai lam te MNF hmelhriat nih te kan hlau a, tumah kan biak that ngam loh lai karah kan Chief Minister zahawm tak in “Hetiang hi chuan a tha lo ve” a ti a, tichuan remna leh muanna atan a lalthuthleng pe in Mizoram chu remna leh muanna hnuaiah kan lo awm ve ta a, hengte hi ropui ka ti a.

Tin, a hmalthlir thui tak te zing ami Aizawl Civil Hospital hian rei a daih dawn lo a ni tih hria in Falkawn lamah hmun an lo va rek a. Amaherawhchu kan tum ang a pha lo va, contractor te leh party induhsakna te avangin a han fail a, mahse tunah tuai thar a ni leh ta saw lawmawm ka ti khawp mai a, kan Health Minister-in “Nakumah chuan kan hawng thei mai ang” a tih te kha lawmawm ka ti a, Medical College kan nei tur te pawh hi lawmawm ka ti.

A tawp bera uar deuh a ka sawi duh chu hmalthlir thui pawimawh zia hi han sawi lawk ka duh a. Kum 1858 khan Alaska khu Russia hnuaiah a awm a, Russia ram khan hralh a duh a, USA khan 1867-ah a lei ta a ni. Chutia a lei lai chuan “Hetiang vur ram mai mai tuman engatan mah kan hmang lo vang” an ti a, tu te pawh khan an sawisel luai luai mai a ni. Amaherawhchu, Secretary, William Seward khan President Andrew Johnson-a hnuaiah khan theih tawpa chakin hma a la, a tichuan maktaduai 7.2 in an lei ta a, a hunlai chuan an sawisel nasa em em a ni. Mahse, hun a lo rei a, America-a state lian ber leh an oil khur lian ber a lo ni ta a. Khatiang khan hmalthlir thui tak kum 100 hmalthlir an lo neih avang khan tunah khuan America ram ti ropuitu a lo ni ta a ni.

Chutiang deuh chuan keini pawhin entawn tur Mizoram ah pawh kan nei a, Electric Venga Power House a awm lai khan “A bengchheng lutuk, Pachhunga College nen inthleng ang” te an ti a, khatiang khan nu leh pa ten “Zirlaite hnai takah College an kal tur

a ni” an ti a, khatia an tih an tih lai khan khatih laia Principal Pu Robert-a khan khulai hmun khu a tha dawn tih hria in a lo hum tawh thin a, tun thlengin College tha tak kan neih phah ta a ni.

Civil Hospital bula ram inpek chungchangte pawh kan lo hria a, PIL te pawh an han theh lut rap rap a kum 100 pawh awm ila sawlaiah sawn kan in bengbel thei chuang lo ang. Heng ang ah te pawh hian kan Chief Minister hmathlirna thui tak hi a ropui ka ti a, kan kal zelna turah pawh hian thlawp a phu ka ti a Opposition ho te pawh kha engtik hunah emaw chuan hla ki khat kan sak leh theih ka ring a ni “Hruaitu tha hi i thlawp ho ang u” tiin kan sawm duh che u a. Vawiinah hian sawi tur tam tak a awm a, mahse hun te a tlem a, vawiina kan Finance Minister speech kan sawiho hi a lawmawm ka ti khawp mai a, inrenchemna lam a hawinaah hian theihtawpin i thlawp theuh ang u tiin ka thusawi kan titawp ang e, ka lawm e.

**Pu LALROBIAKA, CHAIRMAN** : Tunge han sawi leh ang le, sawi duh kan awm lo em ni? Nakinah khan kan in chuh leh si ang a.

**Pu HMINGDAILOVA KHIANGTE** : Pu Chairman, kumin 2014-2015 budget chungchang sawi thei a Pathian leh sorkar-in min la siam fo avangin lawmawm ka ti a, lawmthu ka sawi a. Kumina kan budget hi kum danga kan budget plan size kan tih ang te nen inang rual rual mahse danglamna bik a nei a, kan Finance Minister zahawm tak pawh hi a khawngaih thlak awm lehlingin ka hria a, chutih rualin kan sorkar tan pawh hrehawmna chin a awm a ni. Centrally Sponsored Scheme hrang hrang kha hun hmasaa plan budget-a rin luh loh kha tun tumah hian an rin lut tlat mai a, budget a puahchah lai hian kan Finance Minister zahawm tak hian a rilru pawh a seng hnem hle in ka hria a. Tin, chu harsatna chuan rilru huaisenna pawh a pe in ka hria, chung zawng zawng chu nimin lamah khan Pu Chairman, i veilama kan member pui zahawm tak takte khan rilru tlang takin an rawn sawichhuak a, han thlirletin an fakawm hle in ka hria a, an approach kha a positive a, a constructive te han ti ila kan tisual awm love an thu sawi te kha a ngaihnawmin ka hria.

Mizoramah sum harsatna kan nei thin a, kan nei reng a kan la nei zel dawn te pawhin a lang. Chutah chuan mipuite hian sorkar sum tipung tur hian engnge kan thawh ve ang tih hi kan ngaihtuah fo a tul a, kan ngaihtuah tan tawh avangin lawmawmin ka hria a. I veilama thu kan member pui zahawm tak takte khan an rawn sawi tawh kha. British rama

a tu a tepawh khuan sorkara chhiah chhun hi a saptawng takin pride ah an ngai a ni. Tunhmaa chhiah chhung thei lo te pawh khan an dinhmunte a lo that taka chhiah an han chhun hian “tunah chuan sorkarah chhiah ka chhung ve thei ta” an ti a, an hmai a uang ve ta a nih chu. Chu dinhmun chu he Zoram hian kan hriat reng a kan zir ve a ngai hle in ka hria. Vairam sorkar hnathawk zawng zawng leh sumdawng hausawng zawng zawng leh hausawng lo deuhthe pawhin income tax an pek vek, chu pawisa tlingkhawm atanga kan budget te hi siam a nih te hi kan hriat a ngaiin ka hria.

Tin, keini Mizo tlangrama cheng ngei te pawh hian vairam a hna kan zu thawh khuan income tax kan pe tho a ni Supreme Court-in judgement a siamah 1968/1969 khan Nagaland, Meghalaya leh Mizoram a cheng ten an rama hna an thawh chuan income tax an pe lo ang a, ramdanga an thawh chuan an pe ang tih zulzui khan vawiina Mizo reng reng mahni rama thawk lo hi chuan income tax an pe vek a ni. Han pek dawn tak tak chuan a na duh khawp mai, Accountant hnenah pek tlem dan tur te kan han zir vel a ni, G.P Fund te, National Saving te leh eng eng emaw a tam kha chuan exemption a tam deuh hlek chauh a. Chuvang chuan he rama Mizo reng reng hian kan sorkar hnathawk te, sumdawng lian te leh lian lo te leh tu te pawh hian sorkara sum kan chhun luh hi kan tih tur a ni tih kan hriat a tha, income tax emaw sorkarah sum kan chhunluh tam loh avang hian kan pawisa neih reng reng hi free money-ah kan ngai a, Mizote hian pawisa hlutna hi kan hriat tur angin kan hre lo niin a lang. Chuvangin, kan inzir zel nan kan Finance Minister zahawm tak in huaisen tak leh duhthawh tak in Budget a siam a, a thuhma ah te, a chhungah te pawh hun lo kal zel turah tih tur kan nei a ni, mipui hian Sorkar-a sum chhun luh hi kan tih tur kan neih a ni, ngaihtuahna tam tak sen a ngai a ni tih hi harhtharna tha tak niin ka hria a, hei hi kan ram mipui zawng zawngin a kan hriat atan tha hle in ka hria .

Tin, Budget plan leh sector hrang hranga sum allocation a han siam atang pawh hian department engemaw zat, a zawng zawng chu a theih loh, an sum hmuh atanga lo kir leh thei tur, sorkara sum thawh kir leh theih tur hisap ranin allocation te pawh hi a pe in ka hria a. Chungte pawh chu Department-a officer leh staff zawng zawngte pawhin kan hriat a thain ka ring a. Enge sawrkar ah hian ka pek ve leh ang tih ngaihtuah a, earning department nih tum zel te pawh hi a tha awm hle in ka hria. Chutihlai chuan Pu Chairman, sum hi duhtawka hman tur a awm lo nachungin kan Finance Minister zahawm takin a thawk chhuak thei (pawisa lo kir leh tur) heng Department Agriculture te, Power & Electric te leh PWD te, Horticulture te pawh a ni, ka rilru ah chuan mawhphurhna ka'n

inpe deuh a ni. A dik takin vawiin ni ah hian mipui nawlin kan hre lo va, ti hian kan ei a, kan in a, tui takin kan mu a, sorkarin engnge min tih sak tih te pawh hi Pu Chairman, kan hre lo niin ka hria a. Pahnih khat han sawi ila, kan member zahawm tak tak te khan an sawi nual tawhin ka hria, tawi tein. Kumkhatah kan sorkar hian buhfai leinan hian cheng vaibelchhe 156 hi a hlauh zar zar a ni. Tin, power leina ah hian vaibelchhe 75 zet zawt hi mipui min tum sak reng bawk a ni. Tin, tui hi Tlawng lui atang te, Tlawng lo deuh atang te pawhin pump chhuah a ngai a, chu pump chhuahna atan chuan power a ngai a, tah chuan thla khatah kan sorkar hian cheng vaibelchhe 5 a seng reng bawk a, heng hi tui bill mipuiin kan pek bakah tihna a ni. Hengte kan ngaihtuah hian Zoram tan, kan sorkar tan hian engnge ka tih theih ve ang aw tih ngaihtuah hi a hun tawh khawp mai tih kha kan Finance Minister zahawm tak Budget buatsaihna atang hian zir tur tam tak a awmin ka hria a, ka lawm khawp a; tin, a huaisenna pawh hi a fakawm ka ti. Tin, chu chu member pui zahawm tak tak Pu Chairman, i veilam a mi te khan an hre fuh em em a, tunhma a he House zahawm tak chhunga hetiang chungchang sawinaah khan kan inchirhtheh a, a fello deuh lai niawm a hriatah te, kan panna laiah te na tak takin kan in au mur mur a, mahse chutiang awm lova, Zoram tan hmangaihna nena kan han sawiho hi Pu Chairman, kan changkang sawtin ka hria a, ka rilru a lawm hle a ni.

Tin, Fact & Figure, Department hrang hrang chetna tur te a awm nual a, ka sawi seng dawn lova, Sum duh tawh hman tur awm lo chung chung pawha kan Finance Minister zahawm takin a rawn tarlante zingah hian power ah hian hun lo kal turah surplus power kan neih theihna turte hre reingin a rawn siam chhuak hi lawmawm ka ti a, a rawn thliar fel deuh vek a, a rawn thliar fel ah pawh hian Small & Micro Hydel Project thawhlai mek pali/panga a rawn sawi a. Tin Hydel Project DPR siam leh tur te; tin, Small Hydel Project DPR peih fel tawh te leh independent power producer te hnena pek tawh te, an thar chhuah tur ti mai ang Mega Watt tam takte pawh a rawn sawi lang hlawm a ni. A lian ho zingah chuan Lungreng Hydel Project te hian Mega Watt 815 lai thar thei a ni a, chutiang bawkin Kolodyne Phase II te pawh Mega Watt 640 zet thar thei tur, a dang pawh pali, panga lai sawi tur a la awm hengte an ruahman tel hi lawmawm ka ti a.

Tin, kawng hi kan mamawh a, kawng a that hi chuan public in an thlai thar an rawn zuar thei in Aizawl thleng emaw, an kawtkaiyah emaw an lo hung ve thei mai dawn a ni tih Pu Chairman, a hretu i ni bawk a kan sawi lawk duh a. Tunhnai mai khan World Bank hi kan House Leader hian a be thiam hle niin ka ring a, an lo chhuak leh

pek a, Mizoram State Road II National Transport Connectivity Project pawh hawng turin an lo chhuak a, kan House Leader zahawmtak hian min hawn sak tawh a. Chung hmun thuma kawng te chu double profit awm thei tur niin ka hria a. Improvement & Upgradation of Chhumkhum to Chawngte Road a ni a, a kawng hrim hrim bakah ram thenawmte nena in sumdawn tawna a kaw k a. Chutiang bawkin Improvement & Upgradation of Champhai-Zokhawthar, Myanmar lam nena kan sumdawnna a kaw k a, Improvement & Upgradation of Tlabung-Kawrpuchhuah pawh chu Bangladesh nena kan insumdawnna, khatiang zel kha a nih avangin ropui leh man hla hle in ka hria a ni.

Tin, chutihlai chuan Inland Water Transport kha term hmasa khan kan hmang tangkai hle in ka hria a. Pu Chairman, a bik tak in Tlawng lui kha kan sawi phak ve chin Hortoki ah te pheih chuan lui kha an siamrem tha a, lui thuk lutuk te an ti pawn a, suar te an ti thuk deuh a, lui lung lian pui pui te an hal darh a, chuvang chuan Hortoki ah khuan lawngleng 150 aia tam hi an chhuk in an chho nuk nuk mai a ni. An thlai Tlawng dung ding leh vei a an thar enkawl in 150 aia tam a ni tawh a ni. Tun tum a nuai 5 lek kan hmuh hi kan hre sual lo maw aw, vaibelchhe 5 a ni lo maw aw ka ti deuh a Pu Chairman. Hengte pawh hi ennawn leh atan a tha lo maw aw, kan tangkai pui si. Tin, tunah khuan vawi khat siam kha a tha reng lo va, a lo thuk leh a, a lo thuk lo leh a, khatiang reng reng kha a ni a. Tunah te pawh khuan siam thar tur hmun hnih hmun thumah a awm leh tawh a ni. Chutiang baw k chu kan lui lian dangah te pawh hian a awm ve tho ka ring. Engpawhnisela, Pu Chairman, tun tuma kan Budget Plan Size lian lutuk lo, nikum ngaihtuah pheih chuan za a 25 zet a pung nimahse a side profit tur danga kha budget-a luh tak avangin engemawchenah a over all-ah harsatna kan nei mai thei a, chumi hre renga kan Finance Minister zahawm takin hetiang budget huaisen taka a thuhmaah te leh a hnuah te pawh rawn tarlang a a rawn siam hi kan zavaia kan hriat tlan a tha in ka hria a. Engpawh nise he Zoram tan hian mawhphurtu vek kan nih avang hian kan budget-a a awm angin tha tak-a hna a thawh theihna turin tangrual vek ila tih hi tha in ka hria Pu Chairman, ka lawm e.

**Pu LALROBIAKA, CHAIRMAN** : Awle, mi pathumin an sawi tawh a, tunge han sawi leh ang le? Pu R.L. Pianmawia

**Pu R.L. PIANMAWIA** : Pu Chairman sawi leh ka duhna chhan chu kan thil sawite lo chhinchhiah a lo ngaithla tur official thu an awm miah lo mai a.

Amaherawhchu, a awm chhun kan Forest Minister hnenah lawmthu ka'n sawi duh a. Khatianga Budget sawihona hun min hmanpui tura awm tura kan ngaihte an awm lo erawh hi chu nidangah chuan awm tawh lo se ka ti a, chu chu ka'n sawi duh a. Kan thiante anga a hnukung lama sawi tum han thut leh kan tum deuh a, mahse a ni theiin ka hre si lo va, kan melh deuh thin a, mahse, an ding dawn si lo va, han sawi kan tum ang a.

Vawiinah kan Finance Minister chungah hian lawmthu ka sawi duh a. Hnam dang tawng leh kan tawng ngeiin Budget Speech hi min buatsaih sak tawh a, a lawmawm hlein ka hria a.

**(CHAIR AN INTHLAK A) Pu R. LALRINAWMA, DEPUTY SPEAKER** : Le sawi rawh ule.

Hun hmasa lamah khan Mizoram Assembly ni si a sap tawng Budget Speech kan neih thin kha ka vei ve zawng tak a ni a. Mahse, kan ti hlei thei lo va. Tuna kan Finance Minister hian kan tawng ngei leh hnam dang tawng a kawpa an siam mai thei pawh hi chi khat mai pawh a tawh alawm maw le tih rualin chi hniha an siam thei hi lawmthu ka hrilh duh bawh a. Chu chuan a entir chu pawl hrang hrangin kan sawi thin nationalist rilru kha amahah hian a rawn lang chhuak niin ka hria a. Nationalist rilru chu hetiangah te hian a lang dawn lawm ni? Tawngka leh Chanchinbua nationalist sawi vak vak ai chuan a tak lama Nationalist rilru pu kan nei hi lawmawm ka ti a, lawmthu ka'n sawi a ni.

Kan Budget chungchangah hian kan thupui ber chu a hmuh letna lampang tur ngaihtuah kha a chang nawn thunawn kan neih pawh niin ka hria a. Hemi chungchangah hian sum kan hmuhna tur, thingtlang mirethei ber pawhin bul kan tan ve theihna nasa zawka hma kan lakna thu awm ve theihna kawng awmchhun chu - Garden Colony te, MIP te kan ti a. Ram kan nei a, kan inpe a, tih chhunzawm leh pawh awm lovin kan ta emaw kan tih hian sorkar tan pawh hma lak zelna turah compensation beiseina a rawn hring chhuak thin a. Chuvang chuan thingtlang hmun hrang hrangah hian revenue hi ti chak ila, Revenue hian hma la sela. Ram kan nei nia kan insawite hi min teh sak chat chat sela, chhiah chawi tura hi chawi chat chat ila. Chutichuan sorkarah sum lut tur a tam phah dawn a ni.

Tin, chubakah kan hmalakna kal zelah development thil kan tihna turah ram chungchanga harsatna kan tawh fo thin hi a a tlem dawn bawh niin ka hria a. Chu mi atan chuan kan Revenue Department te ti chaka, hmalak chhoh a tangkai ka ring a, ka'n sawi duh a.

Tin, bill dawng khawm thin Department te hian tun aia awlsam zawk hian mipuite tan bill an pek theihna tur hi la hawng zau zel sela, la ti awlsam sela a tha in ka hria a. Thingtlangah te phei chuan electric bill hi thawh khawm a a pe tur bik intirh a ngai a. Chuvang chuan a bill pek theih dan kha tih awlsam mai hi a thain ka ring a ni. Khawpuiah ngei pawh hun tam tak senga bill pe tura kal te hlawhchham chang a awm a, chuvangin an bill pek theihna hun darkar pawh hi khawen chung zawng pek theih mai sela, chuan kan sum leh pai lak luhte pawh hi a lo pun phahin ka ring a.

Tin, mi state te kan zu hre pha ve lem lo va, sorkar hnathawkte hlawh tam tawh teh reng nena D.A.-a kan la vur lehzal pawh hi state hausa ten an lo ti a nih pawhin keini ang dinhmun, thawhchhuah nei tlem tan hi chuan D.A. pek ve zel loh dan te pawh hi a awm lawm ni? Hlawh tam tak pek tawh hnua D.A. la pek lehzal chu kan tlin a nih chuan duhtusam a ni a. Amaherawhchu tunah chuan puitlin lam kan inzir tan ve tawh a. State kan duh avangin state kan ni a. Chuvang chuanin puitlin kan zir meknaah hian sorkar hian sorkar hnathawkte an D.A. pek loh ngam te pawh hi puitlinnaah ngai ta ila, tichuan sum leh pai tam tak a kan indaih lohna leh kan harsatna hi a sutkian ka'n ring a ni.

Tichuan, sum leh paiah kan Finance Minister-in a sawi ang khan harsatna tam tak a awm a, a awlsam zawngin a la sawi miah lova. Pawisa a tam pawh a ti lo va, a harsat thu kha a rawn sawi ber a ni a. Pawisa a tam ti a miretheite kuta tlemte kal ai chuan pawisa harsa ti tak chung si a Finance Minister in a NLUP atana vaibelchhe 317.32 lai mai sum min dah sak thei hi lawmawm ka ti hle mai a. Hei pawh hi a Pathian thu hle in ka hria a. Miretheite ngaihtuhtu sorkar vawiinnah hian kan nei niin ka hria a. Pawisa a tam a tam kan tih lai khan kan mipui lama sum dawn MIP ah a tam lo hle mai a. Ka hriat dan chuan ka bialah chuan ₹ 4000/- kha a dawng tam pawl an niin ka hria a. Tun hunah erawh chuan, 'sum a harsa, a awlsam lo a ni,' tia sawi sawi chung a cheng tam tak sem ral a ni tawh hi tun budget a vaibelchhe 317.32 lai mai dah theih a la ni te hi a lawmawm ka ti a. Kan budget ti hlutu ber pawh niin ka hria a, lawmthu ka sawi duh tak meuh meuh a.

Tin, kan Finance Minister thusawia min ti lawmtu hrang hrangte kan sawilan duh chu UNO ngaisang hnam kan ni a, thlawhna var a lo thlawk ringawt te pawh kan lo lawm hle a. Chuvang chuan thlawhtheihna var mai pawh ni tawh lovin tunah chuan kan sorkar ngeiin a nakah a zen ta chat a, thawhdunna tur thuthlung UNO nen kan han ziaak thei ta hi lawmawm hlein ka hria a, lawmthu sawi mawlh mawlh na tham a tlingin ka hria.



Tin, Damdawi In lian State Referral Hospital kan han nei ve a, kan hotute hmalak chhohnaah bul tanna an awm a, chutah a sawngnawi zawngin kan kal leh a, a rek chhum tep tih hnuah kan hotuten hma an han lak chhunzawm leh te hi a lawmawm hlein ka hria a. A thawktu tur ringawt pawh 137 la thei tura sum harsa tak chung si a ruahmanna an rawn nei thei te hi a lawmawm in ka hria a. Tin, khum 150 awm thei tura thu tlukna nghet tak awm tawh emaw kan tih khum 400 awm tura ruahmanna thar an awm leh thei te, chu bakah Medical College atana buatsaih an ni chho ta te hi a ropuiin a lawmawm hle in ka hria a. Tin, RGGVY hnuaiia thingtlang mite eng pekna tur chungchang a rawn sawi te khan min ti lawm hle a. A chhawrtu leh a mamawhtu kan nih avangin kan Finance Minister in budget a rawn pharhah hian lawm tur tam tak a awm in ka hria a, lawmthu kan sawi tak meuh meuh a.

Tin, PHE Department hmanga ram mipuiten tui thianghlim kan in theih nha tur atan a hmalakna hrang hrang leh sum leh pai hman tur te an sawi a, a lawmawm em em a. Hetianga hmun tin, khaw tin mai a ruahmanna kan nei a, khaw tin tui in tur min buatsaih sak lai hian kan ngaihtuahna a la awm leh fo tur chu kan tui tlan mek te hi a kang chat ve zel a. Chuvang chuan khaw hrang hranga hmalakna hi hun rei lo te ah chuan kan mamawh puhruk lo in a awm dawn a. Ka bialah chuan kan House Leader ka rawnna a min ruahmanpui ang in composite water supply scheme, tui pump tur ruahman kan nei tawh a. Khawruhlian atanga New Vervek inkar khua zawng zawng te pe thei tur a ni a. Hei hi tihhlawhtlin ni sela chuan khaw 15 a a hrang neuh neuh a sanction buaipui buaipui ngai thin hi a reh mai dawn a. Chuvang chuan Tuivawl tui Kepran tlanga pump chhoh hna hi buatsaih a tul hle a ni. Chuvangin he ruahmanna hi min tihhlawhtlin sak tur pawhin kan hotute kan ngen a. Kan Finance Minister hi Planning Minister a ni bawk a, a lo hriat tel ngei pawh a pawimawh in ka hria a.

Tichuan, tun kan budget 2014-2015 atana kan Finance Minister in a rawn pharh hi a lawmawm ka ti a. Amaherawhchu ka rilru a la kim loh deuh hlekna chhan pakhat a awm a, miretheite tana luangral thin sorkar, in pe thin sorkar kan nihna, rangva semna tur hi a lang lo tlat mai a. Hei erawh hi chu miretheite a full in an nui thei dawn lo a nih hi maw le tih ngaihtuahna ka nei deuh hlek a. Chuvangin miretheite a full a ti nui theitu kan nih thin kha hre rengin remchang min ngaihtuah sak leh turin ka rawn ngen duh bawk a ni. Pu Deputy Speaker, ka lawm e.

**DEPUTY SPEAKER** : Le, tunge sawi leh ang? Vawiin chu vei lam hian aan la sawi miah lo va, in sawi chhawk deuh te pawh a tha lawm maw ni le. Sawi duh kan awm lo

maw? Awle, sawi duh kan awm loh chuan General Discussion kan duh tawk mai dawn em ni, le, Dr. K. Beichhua.

**Dr. K. BEICHHUA** : Pu Deputy Speaker, ka din loh chuan general discussion kha ti tawp mai tur ang deuh khan i sawi si a. I tih tawp mai chuan kan Member zahawm tak Pu T.Sangkunga te ho ngaihdan a ni lo ang tih ka lo hlau deuh a. Kan sawi ang a, hun pawh kha khawngaihni hei thiam lo takin kan vawikhat full budget general discussion-ah kan participate ve dawn chauh a. Chuvang chuan hun te pawh kha a theih hram chuan min duhsak ve deuh hlek la tih kha ka rawn dil hmasa duh che a.

Pathian leh mipuite zarah hei full Budget general discussion nei thei tura vawiihah kan tel thei hi lawmawm ka ti hle a. Kan Member tam tak te phei hi chu kum 20, 25 te pawh tiang discussion a lo participate tawh te in ni a. Chuvangin helaia kan thil hmuh kan phak ang tawk te te kan rawn sawi te pawh hi kan rawn sawi nawk nawk mai ang a. Kan tih dik loh lai leh a fuh lo lai te pawh kha ngaihtlak dan min lo thiam sak a tha in ka hria a. Tin, kan hriat thiam loh laite pawh kha kan senior te pawhin min hrih a, sawifiah turin a hmasa in ka rawn dil duh bawk che u a ni.

Hei, Budget general discussion ka nei a, tunhma a kan word hman ngai loh leh kan la chin ngai loh Revenue Receipt tih te, Tax Revenue tih te, Non Tax Revenue tih te leh State Own Tax Revenue leh thil dang dang te pawh kan Minister zahawm takin Budget Speech a rawn tih atang khan kan in zir ve a phak ang tawk tawk in. Sharing Tax Revenue tih ang chi kan neih te, Capital Receipt kan tih te. Tin, Consolidated Fund 2014-15 atanga kan sum hmuh dan tur te leh kan Receipt leh Expenditure tur te pawh kha a rawn tarlang a. A figure ang a han sawi chuan hun a chep a, kan sawi hman dawn lo va, a tlangpuiin kan hre vek a. A bik takin kan Member zahawm tak Er.Rinawma khan nimin lamah khan engineer thluak a hmang a niin ka hria a a lo calculate chhuak thlap mai a, a ropui ka ti a. Khatiang dinhmunah khan kan awm a. Keini ang budget discussion a la tel ngai lo tan chuan tun budget hi a tha han ti tur leh a tha lo ve han ti tur, a buk turah hian tuna kan sum dinhmun Mizoram in kan face chhoh mek sum harsatna leh tuna Central atanga kan sum hmuh zat a tlem ang dinhmun te han ngaihtuah chuan kan hma lam kan kal dan tur hi a thim hle in ka hria a ni. Chu chu keiin ka hmuh dan a ni a, mahse hei kan Finance Minister zahawm takin theihtawp chhuahin hma a lo la a, hah pawh a hah viauin ka ring a. An rem hriatna leh hmalak naah mualpho lo turah in ngai ila, Chutiang chuan kan kal chhoh theih beiseina nen kal phawt mai ila tih kha a hmasa in ka sawi duh a.

Kan Plan Fund atanga ka rilrua rawn lang hmasa ber chu keini ang te te chu kan hlawh ang atanga ei leh in hmu mai mai kan ni a, thildang a awm lo va. Chutih laia ka rilru a rawn lang chu tuna Plan hnuai sorkar hnathawk kum hmasa hlawh an lak ni 650 an lak laia kumina 333 rawn lang ta mai kha, engtingge hei hi hlawh kan lak tak ang tih te pawh kha ka rilruah nasa takin a in sual a. Chulai chu kan hotute tih fel turah dah ta ila, chutiang dinhmunah chuan kan awm a. Chuvang chuan kumina keini kan lo tel a hetiang Central atanga sum kan hmuh kum hmasa te ngaihtuah a a tlem deuh ta hi keini vanduai nge nia, Zoram mipui vanduin nge nia, vawiin a sorkarna roreltute vanduin nge nia tih te kan ngaihtuahin kan zavaia vanduin niin ka hria a. Vanduinah hian tumruhna leh tih tak taka thawhna te pawh hi rilruah hian a piang chhuak duh a. Chutiang lampang chu kan rilruah nei ila tih kha ka rilruah lian takin a awm a ni.

Awle, kha kan Finance Minister zahawm takin Plan hnuai hmalak dan tur tam tak a rawn sawi a. Health Care a kan hmalak dan tur te, a bik takin Sport lama kan hmalak dan tur te, Energy Sector a kan hmalak dan tur te leh Human Resources development a kan hmalak dan tur te, transport a kan hmalak dan tur te pawh a rawn tarlang teuh a. Chung laia pakhat te te tlem tlema kan han sawi duh chu, pakhatna ah chuan priority ngaihpawimawh ber chu NLUP a ni tih kha a ni ta a, a lawmawm viauin ka hria a. Kan plan kumin a khatiang dinhmuna kan awm laia 317 crore kha NLUP ah hian kal ta se, engtingge management hi kan tih ang tiin ka ngaihtuah a, kei chuan ka manage tur chu ni ta se chuan a mangan thlak hle in ka hria a. Mahse kan hotute, remhria leh a nachang hria in an manage thei ngei dawn tih pawh ka ring a, hemi han tihpuitlin theihna tur pawh hian kan tawngtaipui nasat a ngaiin ka hria a ni.

Pahnihna ah chuan Human Resource Development ah khan kan hmu a, mihring hi education tello chuan hmasawna a awm thei lova, Education is an all round development tih a ni a, chutih lai chuan tun term hmasa a sorkarna kan han chan phat khan education reform committee kha kan han in din a, chutihlai chuan mipui ina kan lo thlir ber chu world class education kan siam dawn in tih kha a ni a.

Vawiin ah hian World Class Education dawng turin mipuiin kan nghak thup a, kan thlir thup a ni, chutiang kara world class education hmu tura mipui beiseina nena kan thlir lai hian thil inhmeh lo deuh leh mak deuha ka hria chu SSA zirtirtute hlawh engemaw zat, thla engzatnge ni pek theih tawh loh tih chanchinbu a inziak fo te, chulovah Hindi teachers hlawh engemawzat thla engemaw zat pek theih loh tih ang chi te, chulovah RMSA a thawk hlawh thla chuti zat pek theih loh tih te, hengte ka ngaihtuah hian human resource development a kan hmalak danah hian

engtingge ni kan hotute hianin world class education ah hian min hruai luh tih hi keimahah hian nasa takin ka ngaihtuahna a insual thin a ni. Chutih laia thil pakhat ka hlauhthawn em em chu mihring, chhungkaw pa ber chhungkaw hrawk chawm tute thla thum thla li hlauh kan pek loh te hian engang hian nge an rilru hi kan sawisak ang tih hi ka ngaihtuah thin a ni. Mihring thla 2/3 hlauh han lak loha an beidawn tur zia te leh an rilru hah tur zia te hi ka ngaihtuah a, depression nasa taka an neih hi ka ring thin a ni. Tamtak te pheih hi chu depression nasa lutuk vang hian beidawng lutuk in atna, depressive psychosis tih te pawh hi kan nei thei a ni. Chuvang chuan heng depressive psychosis te hi kan zirtirtu duhtak te, tam tak te hi kan vei tir mai lawng maw ? tih te hi ka ngaihtuahna ah a awm a, vei em lo se tih te hi ka duhdan a ni. Chutiang dinhmunah chuan kan awm a, chuvang chuan kan world class education hi mipui hian kan nghak thup a ni tih I ding lama thute hian min hriatsak se a tha hle in ka hria a ni.

Pahnihna ah chuan Health Care Scheme te kha kan lo ti lang a, Health Care Deliveries ah hian kan hotuten kan hmalakna a ropui viau lai hian dukhawp a tlinglo deuh hlekin ka hria a. Health Care system kan han sawi hian a ram mipui rilru ah hian kan ngaihdan hi tlemin a kal sual deuh ta nge ni tihna te hi ka nei a, Health Care Scheme kan neih ang ringawt hi Health care deliveries ah hian tam tak hi chuan health care scheme emaw tih deuhthaw ah kan ngai tawh te pawh niin a lang a, tamtak hi chuan kan hrechiang a, khawvel khawiah pawh hian politics a inbeihna ah hian khawvel sorkar ropui tak tak te pawh hian Health Care Policy nei tha hi a champion an ni duh khawp a ni. Chuvang chuan kan ram Mizoram hi rilrua kan ngaihtuah leh ka suangtuah thinna chu engtingge India ramah hian model state a Health Care deliveries ah hian kan siam theih ang ? siam theih dan kawng hi a awmin ka hre tlat a ni. Chumi kan siam theih dan tur chu hetiang hian ngaihtuah ta ila, Health Care in a concern chu pakhatna ah chuan preventive hi kan nei tur a ni. Pahnihna ah chuan promotive, pathumna ah chuan Curative, a ni ta a ni.

Vawiina kan Health Care kan deliver dan erawh hi chu tlem chuan a letling deuh hlek emaw tih tur te pawh hian a ngaih theihin ka hria a, chutih laia pawimawh em em chu pakhatna ah chuan Primary Health Care, thingtlang lama min lo veng lawktu tur leh kan invenna tur hmanrua PHC tha taka function tirma hnuai Health Worker te tha taka function tir hi kan tih makmawh no 1 a ni tlat a ni. Chumi chu kan fail hlauh chuan kan sawi tawh ang khan indo naa hmelma lo lut tur ramri a lo dan loh nen danglamna hi a awm miah lo a ni. Chuvang chuan vawiin ah hian kan PHC level ah hian PHC tha tak tak hi nei ta ila, thingtlanga PHC level a damlo tamtak hi District Hospital thleng hi an tam vak lovang. Chutiang chuan District Hospital kan neih ang ang te hi kan phak ang tawh leh a nihna tur ang hian function tir thei ta ila, vawiina Aizawla damlo,

thingtlang atanga kan rawn inhnawh rum rum ang hi chu a awm hauh lovang, chung avang chuan kan Health Care Delivery ah hian Primary Health Care ah hian no.1 ah priority pe ila, a pahnihna ah chuan District Hospital te hi kan phak ang tawkin tun kan dinhmun ah pawh hian awmze nei tak hian ti ta ila, tun ai chuan a zia awm ka ring a ni.

Tunhnaiah chuan thingtlang lam atanga refer case tamtak Aizawl ah hian a hnawh in kan inhnawh ta a, hei hi enge a chhan kan tih chuan example ah heng Aizawl dinhmun ah hian ngaihtuah ta ila, sub divisional Hospital kan tih sawlai Kulikawn angah te sawn specialist tamtak kan dah ta a ni, heng specialist kan dah te hi an thawh tur angah hi a awm manglo reng reng. Nikhatah hian case 20 emaw 30 lek emaw an nei a ni. Chutih lai chuan inzai thei dinhmunah pawh an awm lo, henga kan specialist te hi district angah te hian dah ta ila, an van tangkai dawn em tih hi rilru ah a awm ta a. Tin, district a infrastructure an neih theih mai tur, financial implication tam vak lova kan neih theih mai tur awm ang thil te hi Lunglei District Hospital-ah te, Lawngtlai District Hospital-ah te, Mamit District, Serchhip District, hengtiang angah te hian han dah thluah ta mai ila, heng district atanga Aizawl rawn pan tur hi an tlem sawt dawn a ni. Chuti anih chuan a bialtute pawh hi kan lo hahdam ang a, anmahni damlo te tan pawh a zia ang a, An chhungte tan pawh expenditure leh khami a senso tura kha a zia turah ka ngai a, chuvang chuan helam a grassroot, a primary health care atanga ngaihpaawimawh chhoh hi ni ta se, rawn kal chho bek bek in a tawp ah chuan kan thlenna tur chu Aizawl Civil Hospital hi a ni.

Chutiang anih avang chuan Aizawl Civil Hospital pawh hi financial implication tam vak lova tun aia changtlung zawka siam dan tur kawng hi tamtak awm in ka hria a, tun ang dinhmunah hi chuan kan khawngaihthlak viau a ni. Chung avang chuan tuna kan service rules kan hman mek, Health Department ah pawh bifurcation kan ti ta, tamtak helamah Public Health Care lama kan dah tur ang tamtak kan dah thei lo, nimina kan sawi time bound promotion an tih ang te kha tifel thlap ilang chuan, district ah hian an awmna tur hi mi panga theuh hi kan nei ta a ni. Chungcho chu han luah tir thap mai ila, damlo a Aizawl rawn thleng hi kan vang viauin a rinawm a ni. A programme hi ti fel ta i la, chungah te chuan sorkar hian theihtawp chhuah ila, tih kha ka rawtna a ni a. Tin, chu loah chuan kan sawi tawh ang khan kan Zoram hi khawvelah hian engang pawhin in develop tum ila, road communication a that siloh chuan awmzia hi a awmlo tih a hre tute vek kan ni.

Chuvang chuan tuna kan dinhmun, chhim atanga hmar chhak atanga thlang ngaihtuah hian kan road communication dinhmun hi heti hi a ni ta a, chhim lam tak pheisaw chu,

chutiang chuan kan dinhmun hi a chhe viau mai, kan kalkawng hi khawilai mai pawh hi a tha e, tih tur hi a awmin ka hre lova, tunah hian tun sorkar chu in kawng a tha hle mai a, han ti dawn che u ila, min tiel in tih ka ring a ni. Chuvang chuan kan ram a changtlun theih nan leh kan ram a changkan theih nan road communication ah hian kan vai hian kan kut tha ti chak i la, hma ila teh ang u, tih kan in sawmna a ni a. Pu Speaker, Ka lawm e. Khang karawn sawi tak ang te kha kan vai hian nangni keini inti lovin hma i la tlang ang u, tih kha a tawpa ka sawi duh chu a ni e, ka lawm e.

**DEPUTY SPEAKER** : Awle, kan chawl rih ang a, dar 2-ah kan thu khawm leh dawn nia.

### **2:00 PM**

**DEPUTY SPEAKER** : Kan sawihona kan chhonzawm leh ang a. Chawhma lam khan member 5-in kan sawi hman a, phar kha kan awm tawh mang lova, tunge sawi duh kan la awm em? Sawi duh kan awm chuan ti deuh zung zung ila, dar 4 hma hian Finance Minister wine-up tura kan sawm a ngai dawn a. Tunah House Leader in sawi duh a neih chuan sawina hun kan pek a ngai dawn bawka. Chuvang chuan, in khek lovin sawi tur kan awm chuan, kan awm lo maw? A nih leh sawi tur kan awm loh chuan, e...aw...Pu Ruatkima.

**Pu LALRUATKIMA** : Pu Dy.Speaker, ka lawm e. Kan hriat angin Annual Budget 2014-15 chu kan Finance Minister zahawm takin House-ah a rawn pharh a. Kan budget hi a lawmawm khawp mai a, a hre awm deuh te kan zawt vel a, Mizo tawng a Budget pharh a nih vawi 1-na a ni awm e full budget chu. Tin, kan minister inbuatsaihna a lawmawm khawp mai a. Hetah data fel tak te kan hmu a, colour mawi takin kan han hmu thei a. Hei bakah hian hmasawna hrang hrangte pawh kan han hmu a, a inbuatsaihna a lawmawm hlein ka hria a ni.

Chutih lai chuan sawi tur tam tak a awm ang a, kan dan bu, kan rules of procedure and conduct of business bung 143-na ah khan Pu Dy.Speaker, annual financial statement pharh a nih rualin performance budget pharh tur tih a ni a (including performance budget) a ti a, kan hmu ta hauh lo mai a. Tin, detail work programme atia, kan work programme hi a detail lo ang reng khawp mai a, kan hre tlang vek mai a, kan dan bu ah hian. Chu bakah chuan employment data hi kan neih kan ring deuh hlek a, kan en kan en a, ka dawng lo nge ni? Tun tumah hian kan hmu tel ve ta lo va. Chuvangin data han chhutna tur ang chi kha kim lo hret hret kha kan hmu a, chulai te chu kan sawi hmasa ni sela.

Kan Budget pumpui han en hian kan Finance Minister thusawi atanga han lak khawm khan a va chiah ve maw le, sawhchiar Budget ni mai awm a ni kan ti a. A kotlanga awm zawng zawng, CSS kan tih chi te, chi hrang hrang kha Pu Dy.Speaker, a sa belah khan kan rut lut fai vek a, state consolidated fund ah khan chuvangin, kan budget hi a buatsaihtu tan leh a enkawltu tan pawh a har viau ang tih chu ka ring a. Chulaiah chuan a than na te, kum hmasa lama a pun dan te, a pun loh dante pawh khaikhin tur tam tak awmin ka hria a. Chuti kan nih lai chuan kan Finance Minister zahawm tak thusawi atanga kan han hmuh chu chhiah chi hrang hrang atanga sum leh pai a harsatna Zoram in kan tawh dan te, chhiah lak kan uar a tul thu te in tlang a rawn kawm a. A dik vek mai a, sum leh paiah Mizoram in harsatna kan tawh hi namenlo a ni tih chu a hretute kan ni awm e. Chuvang chuan, Budget atanga kan hmuh langsar tak CSS-a khung tel a nih avangin he kan budget sum bawm pawh hi lang lian lurh ang khan a lang a. Amaherawhchu, hmasawna duh thal a kan thawhna tur sum erawh kha chu a beitham dan kha kan hmu tlang vek awm e. Chutah chuan a bul rawn tan nan khan thil 3 a rawn sawi a. Tunah hian sum leh pai min ei hek tu chu buhfai a ni a ti a. Basic needs a mihring tena kan mamawh chu eitur ania, eitur pek kha sorkar mawh a ni si a. Kan lo harsa deuh a nih pawhin helam hi chu pa berin ril a lo tam deuh a harsatna kan tawh chuan thlawhhma a zauh va, nu berin chaw bel a ti lian thin a ni tih ang deuh kan ni a. Chuvangin, khua leh tui te laka eitur a kan lo insengso deuh a nih pawhin hei chu ruahmanna thar, ngaihtuahna thar kan neih si loh kha chuan tun dinhmun ang hian kan kal chu a la ngai hrih a ni mai a.

Tin, mihringte mamawh dang eng leh tui chungchangah te sum hloh a tam thu te kan hmu a. Power project hrang hrang te, energy project te pawh kan hmu a, vawiin thlengin kan state in Power a thawh chhuah chu mega watt 29 vel chauh a la ni bawk a. Chutah chuan, state pawn atangin kan han la lut a, tun dinhmun hi kan thleng a. Hmanni lawkah PRISM te pawhin energy lost a nasat thu te pawh chanchinbu ah an sawi kha kan hmu awm e. Chutiang chuan kan Finance Minister zahawm tak khan kan sum harsat chhan lian berte zing ami chu buhfai man tlawma kan hralh vang te, energy power avang te leh tui bill vang te a nih thu kha a tlangpuiin a rawn sawi a. Chutiang chu kan nih laiin hmasawna hnathawh tur plan fund ah hian cheng vaibelchhe 3140 leh sorkar inrelbawlina tur non-plan kan tih ah hian cheng vaibelchhe 3811.66 a ni a. Kan budget a fun puia hi ti mai teh ang, a vaiin cheng vaibelchhe 6951.06 a nih laiin kan sawi tak ang khan CSS te kum danga kawng hrang hranga helaia tel ve ngai lo, kan plan a kan rin luh ngailoh te kha rinluh a nih tak vek vang a ni a. Chutah chuan scheme of financing Planning Commission in a rawn tihchhuah ah pawh hian chiang takin kan hmu thei awm e. Chutiang te chu kan ni a, ruahmanna fel tak kan sorkar hian kan nei lo a nih phei chuan kumin hei thla 4 chauh awm mahse, sum leh paiah harsatna namenlo tak kan tawh chho mek a ni a. Financial crisis lian tak hi chu tun kan hai lova,

kan tawh a ni ber a. Chutah chuan, state sorkar in chhiah a lak khawm tur hi 270.39 vaibelchhia tling tura ngaih a ni a. Chutiang chu kan nih laiin kan dinhmun te, chhiah kan lak tum dante han en vang vang hian tan lak a ngai khawp mai. Chumi tan lakna tur chu budget speech ah hian a rawn lang lova. Ama'rawhchu, fiscal policies strategies statement ah khan page 4-na ah rawn tarlan a ni a. Chutah chuan, fiscal deficit kan neih a strategy lai takah hian tan kan lak a tul khawp mai a. Tin, 13<sup>th</sup> Finance Commission in rawtna a siam te pawh hi kan bengkhawn lo nge kan ti hlawhtling thei tur a nih laiin kan tihhlawhtlin that loh dan chu khami statement atang khan a lang a Pu Dy.Speaker. Chuvangin, tuman sum harsatna manganthlak tak kan tawh hi kan zep lova, zep tur chi pawh a ni lova. Chutih kawngah chuan sum enkawl na kawngah helaia fiscal strategy policy a an rawn tarlan ang hian sum enkawl ah hi chuan kan hlawhchham tih loh theih loh a ni.

Chumi ah chuan 13<sup>th</sup> Finance Commission in sum indaihlohna fiscal deficit kumtina tih tlak hniam tur rawtna a neih sa fiscal policies strategies statement ah khan 2010-11 ah 7.5% of GSDP tur a nih lai khan a takah chuan 8.25% kan ni a. 2011-12 ah 6.4% of GSDP a nih laiin atakah 3.04% kan ni a. Chutiingin 2012-13 ah khan 5.2% of GSDP a takah chuan 7.21% niin, 2013-14 ah pheih chuan 4.1% of GSDP tur a nih laiin a tak tak ah chuan 18.15% a nih thu kha khami fiscal policies strategies statement ah khan kan hmu a ni. Chutiang chuan, he Finance Commission reports beiseina kan pha lo zel a nih chuan state sorkar hian central atanga kan hmuh tur kan beisei ang hi kan hmuh loh pah mai te pawh thil hlauhawm tak ni te pawhin a lang a ni. Chutih lai chuan zawm thei tur nihna chente pawh kan awm ang a. Kum liam ta figure pheih kha chu kan sawi ang khan a inthlau khawp mai a. 4.1% tur a nih laiin 18.15 a kai dawrh a, hei hi enge a chhan? Sawrkar hian he House zahawmtak ah hian, kan Finance Minister hian min hrilhfhiah a tulin ka hria a, in renchem miah lo a state in sum kan hman vang nge, lirthei leina atan sum kan hman vang, a bik takin kan ngaihthla a, lirthei lei nan kan inseng so nasa a. SAD ah ringawt pawh kumin chhungin VIP te motor lei nan cheng nuai 341 leh a chanve kan hmang a. Tin, Health & Family Welfare ah ringawt pawh IMR sumin cheng nuai 235 leh sing 7 leh sangli leh za 8 vel kha kan hmang bawk a, motor 38 tun hnaiah kan lei thu kan hmu a, khang te kha nge ni a, hnamdang contractor hna revised nasa tak kan hmu a, zawhna a kan han hmuh ang khan New Town, Kolkatta a Mizoram House hnathawhna pheih kha chu kum hnih chhungin revised estimate ah khan nuai 985 zet mai kha a awm hman a ni. Price escalation han chhut vang vang khan thil pawh tak mai a ni a. Chuvangin kum tam tak liam ta ami, IR Battalion lak chungchang te, School up-gradation vang te kha nge? 2009 a kan chhuanlam ngai kha kan la chhuanlam reng mai dawn em ni? Khami chhung khan tihngaihna kan hre lo em ni, tih te ka ngaihtuah a. Kan sum indaihlohna hi a pung zel a, a chhan pui ber hi kan



chhuichhuah thuai a tul a, leiba a tam tawh hi, chuvangin kan budget pumpuiah hian tan kan lak a ngai khawp mai.

Tin, Fiscal strategy mai bakah hian Pu Dy.Speaker, kan sawi belh duh chu, NLUP hi plan sum a ni, a ni lo, tih velin kan inhniai reng a. Plan sum a nih leh nih loh chu vawiin a kan budget sum atang te, kan dinhmun hrang hrang, sum leh pai kan han sawi lan atang te khan kan hmu fiah mai awm e. Chutiang ang te chu kan dinhmun a ni a, kan sum neih angang hi tha tak leh daihzai taka kan hman hi a tul a, kan sum neih ang ang kan renchem a ngai a ni.

Pu Deputy Speaker, tawi te in, minute hnih khat lek, MLA fund hi tihpun a ngai a ni. MLA fund hi hmasawna hnathawh nan bial tinin kan hmang a, keini opposition te phei chu a dang hi kan hmu lo reng reng, Vawkte leh Ar sem thlengin min kan fai vek mai a, kan hman tangkai zia hi a hretute chu kan ni, chuvangin vaibelchhe khat tala min tihpun sak hi a tulin ka hria a. Chulaiah chuan tawi te in Pu Dy. Speaker, Planning hi a pawimawh a, planning tel lo chuan, ruahmanna a fel loh chuan kan kal thei lo a, khawngaihtakin Pu Dy.Speaekr,hei te hi kan sawi lawk ang e, true story IIT Mumbai, 1992 Batch ami ten planning pawimawh zia an rawn sawi lan a chu, College zirlai pali te hi zanrei tak thlengin an infiam a, a tukah khan test nei tura in buatsaih tur an nih laiin, an infiam tlat mai a, a tuka test nei thei ta lo chuan an Dean kha an va hmu dawn ta a, chutah chuan plan an siam a, an plan siamah chuan grease te an in tat a, bawhlhlah an in tat a, Dean hma ah chuan an va kal ta a ni. “Nizanah wedding party ah kan kal a, wedding party-a kan kalna ah chuan motor tyre a puncture a , kan rawn haw hma thei lo a, zankhua in motor kan rawn nawr a, chuvangin khawngaih takin min hrethiam la, retest emaw min phal sak rawh,” an ti a, Dean chuan an ngaihtuah vang vang a, ni thum tuka test leh turin a ti ta a. Nithum tuka test tur chuan an inbuatsaih a, nithum tukah chuan Dean ho chuan an han sawi khawm leh a, test tur chuan an inbuatsaih ta a. Anmahni rem tihna ang in room hrang hrang pali ah an dah ta a. Dean chuan zawhna pahnih chiah a siam a, zawhna pakhatna ah chuan, ‘ Tunge i hming?’ tih a ni a, mark hnih a pu a, zawhna pahnihna ah chuan mark 98 pu in, ‘ Khawi tyre kha nge keh?’ a ti a, zirlaite chu an buai fai ta vek mai a ni. Chutiang deuh chuan ruahman lawkna tel lo chuan thil a fel thei lo a, tahchuan policy planning chungchangah pawh tan kan lak a tul khawp tih kha ka’n sawi tel duh a ni e.

**DEPUTY SPEAKER** : Sawi tur kan awm tawh lo maw. Aw Pu T.Sangkunga.

**Pu T. SANGKUNGA** : Pu Deputy Speaker, nichina kan member zahawm tak Pu Pianmawia sawi ang deuh khan, kan sawi lo mai dawn em maw ni le? Official lo note tur an awm tha lo riau mai a. Detailment kan siam hian Directorate leh Secretariat atang hian kan in awm chhawk thin kha a ni a. Vawiin a general discussion kan neiha hetiang a awm loh vek mai hi chu, naktuk lamah te, thil chi hrang hrang kan tih ah hi chuan a bik kha a lo awm tawh a, general ah hi chuan kan department an sawi ang em tih hriat loh kha a ni a, awm that ni awm tur tak kha a ni a, kan awm tha lo riau a, chuvangin sawi a tui awm loh e, kan member puiten an rawn ti kha a dik hle in ka hria a, hei hi Pu Deputy Speaker, min note sak la...

**DEPUTY SPEAKER** : Hei chu Minister lam te mawhphurhna a ni a, House atang chuan kan ti thei lo a, Department tin aiawh Minister te kan nei a, Minister te mawhphurhna a ni.

**Pu T. SANGKUNGA** : Kan Minister zahawm tak te pawh in min hriatsak se.

Awle, kumin a kan budget hi kum dang lo ang takin department hrang hrang ten an ruahman a, Planning Department in han khaikawm a, Department dangte nen han sawi khawm liam liam a, Planning Commsion-a zu sawi ni lo, min rawn allot tawp mai a ni a, min allot dan lah hi kan ram an hrechiang lo emaw tih turin, kan member zahawm tak tak dinglam a mi leh veilama miten an sawi ang khan, nimin lam atangin, hlawh thu ah pawh plan ah phei chuan hei, kum dang zahve awrh kan nei a ni mai a, kan Finance Minister hi a khawngaihthlak e, an tih ang khan a khawngaihthlak tak tak in ka hria a. Tin, kan pawisa hmuh dan pawh hi han manage tur hi a awm lo reng reng a, manage thiam leh thiam loh tur hi a awm lo in ka hria, manage tham a a awm lo, nikum te kha en ila, thlatina central in pawisa kan hman tur a rawn release kha, hei budget ah te chi hrang hrang han en khan vaibelchhe 260. 13 vel a ni a. Chutah chuan sorkar hnathawk hlawh ringawtah hian 261 a kal tawp mai a ni. A manage tur chu 13 kha a ni ta a, khami manage ngaihna kha a awm tawh lo tawp mai a, motor te, stationery te, furniture te, engkim a lo ngai si a. Tuna kan member zahawm tak ten an lo sawi kan area development fund te pawh kha a tel vek si a, tun dinhmunah hi chuan hlawh ah a kal zo a ni vek mai si a, hei hian kan sorkar ngilneih zia a ti langin ka hria a.

Kan Finance Minister zahawm tak in a thusawi para 9 kha han en ta ila, “Tun dinhmuna kan mamawh ber chu sum leh pai hman kawnga fir taka awm leh huaisen taka sum leh pai hmuh belhna tur kawng thar dap hi a ni,” a ti tawp mai a ni. Huaisen taka pawisa hman huau

huau na lo check kha kan mamawh ber a ni a ti, a hnua a rawn sawi a chu, “ Chutichuan mirethei leh changhai te chawikan hi a ngaih pawimawh ber a ni,” tiin kan sawrkar kha a rawn sawi leh ta a, a bang zawng kha kan farmer leh harsa zawk te tan NLUP ah nuai 317.32 an dah leh bawk si a. Supply te, contract han tih leh na tur, campaigner te hnim phum ve nan i siam ang u tih emaw, zirtirtu 2000 chuang lai ruak a, kan duhsak te han dah ve na tur pawisa bang hi a awm lo reng reng. Sorkar hnathawk te sorkar in a duhsak a, lonei mi te tan vbc 317 lai mai a dah leh bawk si a, chuvangin manage tur pawisa kha a awm lo hrim hrim a. Kan lungrual hle in ka hria a, i vei lam a mite nen pawh chuvangin fimkhur a ngai a ni. A source kan zawn tlan a ngai a ni kan ti vek a, kan in lungrualin kan hrethiam tlang hle in ka hria a, chuvangin kuminah chuan kan Budget han en vang vang hian fimkhur a ngai hle a ni. Chutichuan kan budget pharh hi ropui ka ti a. Ngentiangah YMA rising day ah ka han kal a an lo sawi chu theihai rah hi a duh duh lawh awih a ni, a chhan chu Aizawlah emaw Serchhipah emaw kalna tur kawng a awm lo va, ruah sur laia khitilai kal tur chuan passenger zawng zawng hi an motor nawrna an berh nasa lutuk a, kekawr ha hi an awm lo reng reng a ni. Kan Chief Secretary hlui Pu Manzuala chuan nghawngkaw area a ti thin a ngaihnawm takin a ziak a ni. Kawng a awm loh avangin theihai kha hralhna a awm lo va chuvangin a duh duh in an lo mai a ni. Chuta kan kal chuan, ‘PMGY road kan rawn siam dawn a, Prime Minister in hei hi programme pawimawh takah a nei a, in theihai hi chu a duh duh lawh in awih lo thuai ang,’ ka ti a. Ka han kal leh chuan truck road a lo tlang a, duhtawkin Aizawl lamah an hralh thei tawh a, kawng ropuizia a langin ka hria a. Khawzawla hman kuma ka kalin kan SDO kha ‘Zawngtah min lo lei teh,’ ka ti a, a lo lei teuh mai a, ‘khawi khaw ta nge i lei,’ ka ti a, ‘Leithum,’ a ti a, chu chuan kawng pawimawh zia a ti langin ka hria a. Kan leader te remhriatna ropui tak kan Finance Minister thusawi phek 11-na ah khan a lang a, kawng siamna tur cheng vaibelchhe 252.90 Asian Bank loan leh World Bank loan te chu kan rulh a ngai ta lova, central in interest nen min rulh sak a; chutiang zah chu remhre tak lo tan chuan a tih theih loh. Kawng atan bawk World Bank Road kan tih thin pangngai bakah hian Improvement of upgradation of Chhumkhum tih a crore 270.27 tih te, Improvement and upgradation of Champhai Zokhaw thar ah crore 222.32 tih te, hlawh leh NLUP bak ami tur khatianga World Bank leh Asian Development Bank ringawt maia rawn ti chhuak thei leader kan nei hi kan vannei tak meuh meuh a ni. A vei lam leh dinglam amite chuan lawm mai loh chu hmabak kan nei lo reng reng a ni. NLUP sawi chhuah bakah hetiang India pawisa ni miah lo an sawi chhuak hi amah fak mai lo zawng tih tur hi kan nei lo reng reng.

Tin, Central road fund ah vaibelchhe 8 Tuipui-Biate road tih te hian an chhawr ber tur a ni a, Biate lam chu a rawn pel deuh tawh a, hemi pawh hi a puitu leh Minister of state chungah lawmthu kan sawi duh a ni. Burma border ami te tan hetiang vaibelchhe 8 lai mai an rawn tih chhuah sak te, Aizawl west, Lungdar road lamah te vaibelchhe 11.56 an la ti chhuak te, PMGSY ah vbc 56 te, road and bridges ah vaibelchhe 225.43 tih te, (hetiang zah road kan mamawh em em mai) Changkang tur chuan Tuipui ral ang hian sawhthing te hi ching ngai reng reng suh u, a phurh manah in chawi zoang ka ti thin a. Tunah chuan sorkarin kawng a siamthat tawh avangin sawhthingah hian nuai 5 hlep an tam tawh a ni. Chutiang chuan ram kilkhawr leh hla tan pawh an ruahman dan hi dikin ka hria a, chuvangin kan leader leh PWD changtu hi an fakawm hle in ka hria a ni.

Tin, hriselna lama kan hmasawn dan hi ka zin ve chinah reng reng chuan building thar kan sa deuh vek mai. Heti khawpa sum harsatna karah starred question a kan Health Minister in a chhan ang khan doctor han dah ngheh tlat mai te, hmun tinah a nghet lova lak te a awm ringawt mai a ni. Hrisel lo chuan ram leh hnam a humhalh thei lo, chuvangin hriselna kawnga hma lakna te ropui ka ti hle a ni.

Tin, tui chungchangah kan PHE minister hmalakna ropuizia te kan bial thlalerah pawh tui zem lian pui pui te leh hmun tinah ka kalna ah hian tui lakna hi a awm deuh vek a ni. Hetiang budget bakah project an siam a an zuk nawr chhuak a ni a. Mizoram in sorkar tha thlanna chang an hria hi kan vannei ka ti a. Tui mamawh zia hi Palestina rama 6 days war-ah khan a lang a, Israel sipai te kha thlalera an indo khan an chauh ve theih loh chhan an hmuh chhuah (an lo hriat ve tak chu, Israel sipai te kha chu darkar tin tui liter 1 an in loh chuan thlalerah an chau dawn tih an hria a, tui an pai tir teuh mai a ni. Arab sipai te khan an lo pai tam si lova an chak ta lo a ni. Chuvangin tui hi chaw aiin a tha a ni ang 'chaw nghei aiin tui nghei an dam rei lo zawk' an ti a. Engkim hian tui an mamawh a ni, chuvangin PHE-in hmun tina tui lakna an nei te hi a tha a ni. Ngaw nei tha, kan Home Minister zahawm tak bial Mualpheng chho vela ngaw te khi kan zuah loh a, tun atanga kan humhalh loh chuan Thingsul te, Tlungvel ten tui in tur a nei lo mai ang. Ka bial-ah pawh Sazep leh Samthang Ngaw te khi awm lo se, reilote-ah Bungzung Vanzau-a kan ram tui lakna khi a awm lo mai dawn a ni. Chuvangin, tui lak kawnga kan hma lak dan ropui takte en hian lawmawm ka ti a.

Tin, kan sum harsatna nasat zia han en hian engtinnghe hetiang Power lamah te hian an tih theih aw ka ti a. Governor Speech kum tira ka sawi khan ka sawi tawh a. Tuivai khuahna tur

kan han su chhuak ringawt mai te hi ropui ka ti a. Tuirial te hmana an sutchhuah tawh tunah an han revive leh a. Tun term chhung ngeia han chhit en theih tura Budget tight kara Budget baka an han sawichhuak thei te hi mak ka ti a. Mistiri pawhin power tel lo chuan thing pawh an zai bung peih tawh lo reng reng, thil chhete pawh an zai peih tawh lo. Chuvangin, hetiang remhre tak maia kan sorkar an han hruaite, Law & Order lam ah, tun hma khan hel man thei sorkar kan nei lo reng reng. Khawvela police tlaw ber kan nei emaw tih tur kha a ni a. Sorkar-na a inthlak a, Law & Order chungchangah te leh police force-ah te ngat phei hi chuan thil inang lo hi a ni ringawt mai a ni. Chuvangin, hengah hian, famkim lo theuh mihring an ni chung hian kan sorkar neih tawh zawng zawng en hian tun sorkara, ka pu te pawh hian an fak thlawt a ni. In bulah an sawi duh lo mai mai a. Helaiah hi chuan Opposition role kha an rawn play a ni mai a. Han sawiho hi chuan lungawithlak hi an ti khat em em a ni. A dawta han Sorkar leh pawh an zuam phah sawtin ka hria. Sawi turte pawh hi an rawn khawn peih phah em em a. Chuvangin, sawi sen a ni lo va, darkar khat vel te hi chu awm se, Department hrang hrang hmasawn zia leh ropuizia, kan Budget Sorkar hnathawk hlawn daih awrh nei si a, a bak an ruahman dan ropuizia han en hian, kan lo neitute hlim zia chu, kan Minister Pu Thana sawi ang deuhin a rah zarah an inchuh hi a ni ber mai a. NLUP dawng hnuhnung leh hmasa te, a chi hrang hrang inchuh tur hlir hian, Budget tight tak kara an han siam thiam tlat mai te hi kan va in fin hleih mai mai em aw ka ti a. Chalrangin Khawhai ho an zah deuh si lova, in fin siakah an cho e tih ang deuh hlekin in fin siak leh remhriat siakah hi chuan tuna kan pu-te hi chu an chhuanawm thlawtin ka hria. Pu Deputy Speaker, ka lawm e.

**DEPUTY SPEAKER** : Aw le, sawi tur in la ngah hmel hle mai a, Vote on Demand lamah in la sawi leh thei ang. Tichuan, kan Group Leader kha a ding dawn maw? Aw le, Pu Vanlalzawma.

**Pu VANLALZAWMA** : Pu Deputy Speaker, lawmthu ka sawi a. Vawiinah, he MLA term chhunga Budget puitling kan neih hmasak ber a ni a, tin, a hrim hrimin Assembly-ah ka tel ve vawikhatna a ni a. A tir atang khan kan ruling lam te, a bik takin kan House Leader leh a thawhpui dang ten rilru inhawng tak leh pa chan chang takin min ngaithla chho thin a. Kan thu han sawite pawh a hnial zawng leh ilo zawng ringawt ni lovin min lo dawngsawng thin a, a hmasa-in lawmthu ka'n sawi duh a. Chuvangin, thu te pawh hi mahni thiam ang anga sawi te pawh a chakawm thin a. Kan thiante ho pawhin phur takin zawhna leh chhanna-te leh Bill sawiho te pawhin kan ti den den a. Kan sawi kim vek zel a. Heng-ah te hian a hminga Opposition lama hotupa ka nihna angin lawmthu ka sawi a. Thusawite a nuam a, sawi vek kan duh thin a ni tih te pawh kan hre tlang vekin ka ring a. Chu chu ka'n sawi hmasa duh a.

Tin, nichina kan sawi tak ang khan tum hnih Vote on Account-a kan kal tawh hnu-ah Budget puitling ka pharh e kan ti a, ti mai ila, ka sawi nep-na ni lovin, a harsa viau ang tih chu a rin theih a ni. A tir ah chuan Vote on Account-a tum hnih kal tawh hnu-a Budget puitling han pharh leh kha chu thil nih phung pawh hi a ni ngawt emaw ni ka'n ti deuh a. Mahse, kan ti ta a, a tha em em tho a, tih tur takte pawh a ni tho ang a. A har viau ang tih hi chu a rinawm a, kan hmang teuh tawh a. Tun financial year ah pawh hei thla 8 dawn a liam tawh a, thla li emaw chauh kan hmabak tawh a, a harsa em em ang tih kha a ngaihtuah theih a. Kan Finance Minister zahawm takin a present lai pawh khan ka rilru a lo awm mai mai chu, Governor Republic Day Speech a ang lek lek lo thei lo a nih hi maw le, thil tih tawh a tam si a, Budget pharh dan pangngai nen a inang em aw te ka lo ti rilru deuh mai mai a. A chhan chu a kal teuh tawh vangte a ni a. Tih danglam leh theih tawh loh, kan hman liam si te pawh kha a han reflect lo thei lova. Tichuan, vawiina ka'n lawmna em em pakhat erawh chu, kan sawi reng a, tunhma atangin kan sawi thin a. Buhfai man kan thawh belh a, kan sen hnem thin zia te, khangte kha chiang deuh maiin thlakhata kan chawibelh ngai zat nen, kumkhata kan chawibelh ngai zat te a rawn ti lang a.

Tin, power ah pawh hian kan chawi belh teuh a ni, state fund kan pe teuh kan ti a. Mahse, chiang fek fawka kumin kan Budget-a tih ang hian a la awm lo em maw ni aw ka ti a. Thla khatah chuti zat chu kan chawi belh a, kumkhatah hetiang tih te, tin, tui-ah pawh a ni tho a. Heng thil pathum hi nitina a lo va kan awm theih si loh sorkar tana lu tihai ber mai leh sum leh pai tam tak kan sen ralna a ni a. Bill han tih san ngawt te, buhfai man han tih san ngawt te, tui bill han tih pun vak ringawt te rem bawk si lo. Khanga sorkarin tunhma atanga harsatna kan lo neih thin, vawiinah hian chianguang deuha kan Finance Minister zahawm tak in a rawn pharh kha a lawmawm hle-in ka hria.

Tichuan, rawtna leh ka lo chhinchhiah ve point hrang hrang han sawi ta ila. A hmasa berah chuan chhiah pek dan awlsam zawk hi kan ngaihtuah a tulin ka hria a. Chhiah pek hi kan ramah hian rin aiin a buaithlak khawp mai a. Lei man pawh hi pe tur chuan tih fe hi a ngai a. A changin Thuampui-ah AMC Office-ah pek tur tih te, a chang leh hmun dangah te pawh pek theih, Revenue Directorate-ah pek theih te an han ti kaw i a. Tlema buai deuh tan phe i chuan pek ngaihna hi a awm mang lo va, a buaithlak em em a. Helam tih awlsam dan hi kan Finance Minister leh a changtu lam, entirnan, Revenue lam te leh midang te pawh khan ngaihtuah ta ula. Chhiah pek awlsam dan hi hna puiah nei ta ila, hei aiin kan pe tha-in ka ring a. Mizo-te hi chhiah pek hreh lem lo hnam ni awm-in ka in ngai a. Kan IRS officer, Taxation te pawh engemaw chen enkawl tawh a, chhuahsan leh ta in a sawi chu "Mizoram ka'n awm tir kha chu mak hi ka ti khawp mai a,

sumdawngte leh engemaw te hi an lo kal a, ‘chhiah helaiah hian engzatnge kan pek ve tur’ an ti a, an chhiah pek zat tur hi minrawnrawn thin a, vairamah hetiang hi kan tawng ngai lo reng reng. Chhiah pek zat tur min zawttu leh engzatnge ka pek ang tihrawn ngaihventu hi kan tawng ngai lo reng reng,” a ti a. Mizo-te hi chuan kan pek ngei tur si, pek lova engemaw a pungte pawh awm thei tih hria-in pek hi kan hreh lo khawpin ka hria a. Ama’rawhchu, a pek dan awlsam deuh chu kan ngaihtuah a ngai a. Veng thenkhatah tlawmngai pawl thenkhat ten MUP tih leh a dang dang in tui bill leh electric bill an han khawn khawm a, an han pe mai te pawh hi a nuam em em mai a ni. ₹ 10 emaw lo chawi belh a kan electric bill min pek sak mai chuan, kan hun sen leh a kal vel nana kan hman zawng zawng pawh kha a uiawm reng reng lo a ni, bill pakhat min pek sak dawn avang khan. Chutih lain sum tuakna te pawh a lo ni ve bawka. Chhiah leh bill pek awlsam dan lam hi tih tak tak leh zual deuha ngaihtuah hi a thamang e awka ti a. An sawi thin pakhat ka hriat chu a rei ve leh deuh hlek tawh a German ramah te khu chuan chhiah leh hetiang bill vel te hi chu a awl khawp tih sawi nana an hman chu mahni chauha awm pa pakhat hi a thi a. A thih hnu kum thum velah khan an va hre chhuak chauh mai a, a lo chhe vek tawh a. A chhan chu, chhungte a contact ngai lo va, chhungte a nei mumal lo te pawh a ni thei a. Amaherawhchu, a pek ngai electric bill leh thildang zawng zawng kha automatic-in a account atanga cut zel tura tih a ni. Chuvangchuan, khang zawng zawng pawh kha a pe zel bawksi a, tin, a sum lak luhte pawh khatiang tur khan a dah a niang. Chuvangin, a thih hnu kum thum velah an hrechhuak chauh a ni an ti a ni. Bill kha pe lo se chuan anrawn zawng chhuak thei mai ang an ti a. Chutiangte chu mi rama chhiah pek awl dan an sawi hi ka hria a. Chutiang khawp chuan mi ramah chuan electric bill, tui bill leh thildang te pawh kha awlsam tea pek theih dan an lo siam a. Hei hi Mizoramah pawh hian kan sorkar hian ngaihtuah leh zual ta ila, thiltih theih ni turin kan ngai deuh a. Helai tak hi uar leh zual atan kan rawt ni sela.

Tin, sawi deuh zawr zawr ta ila, chhiah lak tamna tur te pawh hi kan ngaihtuah a ngai kan Finance Minister-in a ti a. Hemi Aizawl leh Lunglei World Bank Road kan hawn khan toll tax(chhiah) lak nan hian ka’n lo it khawp mai a, Toll a theih hian ka hria. A chhan chu, heta kal duh lo chhiah chawi duh lo hi chu kawng dang kan nei tho va, Serchhip to Hnahthial lamah an kal daih thei tho va. 1999 kum tir te khan chhungkuain Kolkata-ah kan zin a, chutih lai chuan second bridge an tih Howrah thlang deuh leihlawn an dawh thar hlim hian a ni a. Taxi-in kan tlan tlang pawrh a, cheng 15 kan chawi a ni. Khatih lai kha chuan a va tam e kan ti a. Mahse, min hrilhfiah ta a, he leihlawn hi Japan ho dawh a ni a, kum 20-ah chuan a man hi chhuak turah an ngai a an ti. Kha leihlawn lama tlan duh lo kha chu Howrah bridge-ah an kual mai, chhiah pek a ngai lo. Mahse, han

ngaihtuah khan Howrah bridge-a kual ai chuan khulai hnaitea kal a an hun sen leh petrol an hman ngaihtuah khan a tlawm daih zawk a ni. Chutiang deuh chiah chuan helai World Bank Road te pawh kha khatiang khan lo ti ila chuan chhiah pe hreh deuh kha chu an duh leh kawng dangah an kal ang a, chhiah an chawi lo vang a a ni mai. Mahse, he kawngah hian ₹ 200 pawh chawi se a hla lama kal ai chuan cheng 200 chawia kal hi kan duh vek dawn. Chuti zawng chuan thil an lo ngaihtuah a. Chungte chu vawiinah kan sawi chak nachhan a awm a. Sum lakna tur kan ngaihtuah mek lai khan, khati zawng khan a man zawk dan zia te, khati zawngah han sawi khan a fiah kuar kuar thei a. Chutiang deuh chuan kawng dangte pawh kha a ngaihtuah theih deuh kan ring a, chu chu kan sawi lang leh lawk duh a.

Tin, kan ram tana thil tha em em a ka ngaih Health Care Scheme hi, tunah hian tlema buaithlak ta chu in ziahluh te hi a lo buaithlak em em mai hi a lo ni a. Damlo mangang thenkhat kan hnen lo thleng ve te pawh kan zawt thin a. 'In inziak lut lo em ni' kan tih chuan, ... 'a buaithlak lutuk a, a hun lai khan kan hman mang si lo va,' an ti a, chu chu a dik tho vang tih ka ring. Hei hi hei aia awlsam zawka tih a, inziahluhna hi awlsam zawka siam a, mipui tam zawk te pawh hi cover tura tih a dik mang e aw tih hi ka ngaihtuah a, hman deuh khan ka sawi zuai tawh a. Sorkar hnathawkte chuan kan bill leh thei mai a. Sorkar hnathawk bawk si lo, nitin eizawna chawl bawk si, a hlawh chan bawk, damdawi man chawi bawk, na tuar bawk kha a ni Health Care Scheme-a kan ziah luh chiah lo bill thei ta lo hi. Chuvangchuan, hei hi ngaihpawimawh leh zual a tun aia awlsam zawka pawisa pek chhuah leh inziahluh awlsam zawka kan siam hi a bik takin sorkar hnathawklo Zoram mipui tan hian a tul mang e aw tih vawiinah ka'n sawi lang leh duh a. Kan Budget speech-a khan sawi lan chi a ni a, amaherawhchu, khati zawng khan a awm chiah lo deuhin ka hria a.

Tin, Health Department sawi lai mekin ka rilrua lo lang leh lawmawm ka tih lamte kan sawi kai chho leh ang a. Medical College chungchang hi kan House Leader leh kan Health Minister ten an buaipui em em a, a lawmawm hlein ka hria. Medical College hi chu kan nei ve tur a ni ti tawng mai ila. Engtingge kan tan ang tih lam kha chu engpawhnisela, neih ve hi a ngai a ni. 1928-ah Durtlang-ah khatih laia an infrastructure leh an sum leh pai dinmun chu a chhe hle ang tih ka ring. Khatah khan Nursing School hi an lo din a. Chumi in a hrin chhoh zel, a kal zelah chuan tun thleng hian Mizo hian hnam dang nurse hi kan la mamawh lovin ka hria. Mizo nurse-in min enkawl theih chhung chuan



kan duh zawk vekin ka hria. Tawng thiam vang pawh a ni lo, min enkawl thiam a. Khilayah Pathian thu nen an lo inzirtir a, khami kal zelin a hrin chhoh zel nursing-ah hian tun thleng hian khawvelah hian hnamdang hi kan la awt lovin ka hria a. Chu chu 1928 bawr chhoh a harsa chung chung kan missionary sap ten Nursing School min lo din sak ina a rah chhuah a ni. Doctor-ah erawh chuan ti ta ila, (kan Doctor te hi an tha em em), hnamdang Doctor te hi kan la ngai ngawih ngawih a ni tunah hi chuan damloh hlek chuan. Chumi tidanglam thei tur chuan Medical College hi nei ta ila tih ka ngaihtuah a. Tunah hmalakna a kal mek a, hei hi chak leh zuala nawr a, mahse han en hian sum leh pai lam dah kha a awm chiah lo emaw ni chu aw ka ti a. Hengte pawh hi sum leh pai dahna tur a ni dawn lawm ni aw tih ka ngaihtuah a, Medical College tha deuh kan din theihna tur ang chi te pawh kha tam zawk te pawh dah ila a tha hlein ka ring a.

Tin, ki dangah han kai dawr dawr ila, Oil leh Gas chungchang lam te kha a rawn sawi lang a. ONGC-in block hnih an buaipui a, Oil India Limited-in pakhat. Thil pakhat hriat sual hret a nei em ni aw ka ti a. Kan Finance Minister hian a thil ziaakah hian Reliance Natural Resources chuan state chhung chhim lamah an dap mek a ti a. Hei hi ka hriat sual loh chuan anni hi chu an awm tawh lo in ka hria. Chutih mek lai chuan nakinah an chhan theih chuan ka zawh duh nghal chu hengho hian an awm chhung khan Licencing Fee hi an pe em? Hengho lo luh dan hi a dang daih a. Entirnan – sq Km. 1-ah a kum hmasa ber ah licencing fee cheng 50 an chawi a ngai a, a kum leh ah 100, a leh pek ah 200, 400 a double zel a ni. Chu chu midang luh ve theih lohna turin kha licence kha an hum tlat avang khan kha kha a agreement-ah khan a awm vek a ni. Kha an chhun luh tur kha kan sorkarah hian an chhung lut em aw tih ka ngaihtuah a. Tunah hian Reliance-ho hi chu an cancel sak tawh niin ka hria a, Lunglei atanga chhim lam pang block dap tura an tih kha. Chungte chu en chian deuha an lo pe lo a nih phei chuan pek tir leh theih a nih ka ring a. Thil harsa lutuk a nih ka ring lova, a chhan chu agreement-ah a awm vek a ni, an pe lo a nih chuan pek tir leh theih a nih ka ring a ni. A chhan chu khatia an awm mai mai chuan midang lo luhna an dal si a, han zawn vel theihna license kha an hum that bawk si a. Khatiang dan kha heng Company ho hian an nei a. Chu chu en chian deuh te pawh a tha awm mang e aw kan ti a. Helaiah hian a rawn ziaak Chiang viau nachung khan an kal tawh niin ka ring heng company ho hi. Chu chu kan sawilan leh duh pakhat a ni a.

Tin, ka sawi tum tak MLA Fund kha an rawn sawi a, hetah hi chuan kan inthural dawn hlein ka hria a. Chuvangin a rawn lang lo mai pawh a, za em em kan tih

theih loh pawhin sawmnga te kha chu ti ta ila. Kan hotute pawh in an hre vek a, tin, kan hotute, kan Minister te pawh a hrechiantu tho in ni. Porfolio in a zir loh phei chuan bialte tana thil han tih hi a theih bik tlat lo mai a ni. Chuvangchuan, ka hma a mite sawi ang khan mipuiin an chhawr theih leh an ngaih pawimawh ve ti teh ang, MLA ngaih pawimawh pawh ni chiah lo, bial mipuite ngaih pawimawh tak mai siam nana remchang em em mai hi a ni a. Chuvangchuan, helam tihpun hi chu a tha a nih ka ring a. India sorkar lam pawh khuan a tan tirah MP Fund hi nuai 100 in an tan a. Kan awm ve lai khan nuai 200 a ni a, tunah chuan nuai 500 in an kal tawh a ni. Khung Delhi-ah te pawh khuan ka hriatsual loh chuan MLA te khuan nuai 400 vel an neiin ka hria.

**DEPUTY SPEAKER** : Ngawi rawh aw lawk. Minute 15 hun i hman tawh a. Amaherawhchu, Opposition Group Leader i ni a, minute 5 ka pek belh ang che.

**Pu VANLALZAWMA** : Pu Deputy Speaker, ka lawm e. Chuti em em sawi tur pawh ka hre tawh lo, ka tawp tep, min lo hrethiam dawn nia. Kan zavaia kan lungual tlanna tur han telh leh kha chu a tha mang e aw ka ti a, telh leh ta ila kan lawm tlang phian dawnin ka hria a. A tak taka mipuiten an chhawr tur a nih dan kha a awm a. Mipuiin an ngaih pawimawh, MLA ngaih pawimawh pawh nilo, bial mipui te hnenah a lut chat chat zel te hi tihpun atan a tha mang e kan ti a.

Pu Deputy Speaker, ka lawm hle mai a. Thil pakhat chauh han sawi leh ka duh lai chu Trade & Commerce chungchang hi a ni. Kan Minister ten hma an la tha em em mai a. Term hmasaa kan Trade & Commerce Minister te nen pawh chhim tawpah kan va zin a. Burma ram, Myanmar ram te pawh kan va thleng zuai zuai a. Ka sawi ve thin dan hi a awm a helaiah hian. Tum khat North East M.P. min kohkhawm pawh in ka sawi vak a, khatih laia Home Minister chu L.K.Advani a ni a. A ngaihdan a ni vak lo emaw ni chu aw ka ti deuh a. Mizoram te chu tun 1947 hmalam in self sufficient kan ni, kan intodelh a ni. A chhan chu kan mamawh kan thenawm atangin kan la nghal thei a, Burma lam atanga lak tur chu kan la nghal mai a, khawthlang lam atanga lak tur chu Tlabung atangin kan la nghal mai a, Silchar lama lak tur pawh hnaivai te in kan la vek thei a ni. Mahse 1947-ah independence kan han hmu ta a, kaw khat ah chauh kan chhuak thei ta a ni. Kan thlang lawk a chiseh pawh kan zuk la hlei thei ta lo a ni. Sahbawn man tlawm pawh kan zuk lei hleithei lo, khawchhak atangin decron puan pawh dan lo a kan lakluh avangin kan nei thei hram hram. Chung zawng zawng chu an maite pawh kan la lut hlei

thei lo, vawkte pawh tunah chuan kan la lut leh thei ta mek a. Chutih lai chuan kan thil neih ve pawh kha kan hralh ve thei lo reng reng. Lawngtlai-a sawhthing thar chhuah pawh Vairengte-a phurh chhuah ngar ngar a ngai a ni. Tlabung-ah te phurh thlak mai theih nise, chhim lamah chuan nawr liam mai theih chu nise kan la hlawk leh zual tur a ni a. Chuvang chuan 1947 atang khan international boundary in min hual ta a, kaw khatah chauh kan chhuak thei ta a, Vairengte-ah chiah, chutah chiah chuan kan economy a tlahniam hret hret a tun hi kan thleng a ni ka ti a. In ngaihnan chu a ni chiah lo maithei a, mahse a dik a ni. Dik tak chuan kan mamawh zawng zawng pawh Kolkata ami pawh nise hetah kan la lut a. Guwahati ami rod kan phur a, cement kan la lut a, engatinge kan kawmthlang lawk ami kan lak mai theih loh? Bangladesh atang te in la lut ta ila chuan Lunglei te leh Lawngtlai lam te tan chuan a awl lutuk, khami avang khan kan economy a hniam a ni ka ti a. Chu chu tun thlengin ka ngaihnan a la ni reng a. Kan duh angin ban thei in kan mamawh la thei ila, kan neih ang pawh hralh chhuak mai thei ila chuan kan economy chu tunai chuan a hniam lo deuh ang. Chu chu wawiin ah hian Trade and Commerce chungchang kan sawi ah hian uar deuh hlekin ka'n sawi duh a. Kan hotuten in hmu thiam em em a, hmalakna pawh a tha chho viau a, hei hi chak leh zual a nawr te pawh a tha in ka hria a. Ka MP ve lai khan tum 2 Champhai-ah khian custom duty te ka ko a, ka sawipui chu 'silai leh drugs tih ho hi chu lo strict viau rawh u, amaherawhchu heng hairep leh slipper tih ang vel te hi chu lo strict vak suh u. Champhai ah hian Delhi tlanga cheng zaa kan lei theih cheng 150 a kan lei thil a tam lutuk, khulam atanga lo kal a nih vang mai mai a ni. Border area a kan awm avangin henge te hi chu kan advantage a ni ve mai lo strict vak teh suh u.' te ka lo ti a. Khatia kan han in tih deuh nawk nawk kha chuan khalaia duty te pawh kha an lo tawm ve deuh chuan ka hria a, mahse an lo la tam lo va an sum hmuh ve na te ania an ti leh ta vak mai thin a. Chu chu ka'n sawi duh na lai tak chu hemi Border Trade kan tih hi a pawimawh lutuk a he ram leh hnam tan hian, kan hnam dam leh dam lohna ni te pawhin ka hria a. Chuvang chuan chak deuh a hmalak nise tih te kha ka'n rawt ve leh duh a ni Pu Deputy Speaker, hun min pek belh avangin ka lawm e.

**DEPUTY SPEAKER** : A lawmawm e, hun i hmang thiam khawp mai. Awle, general discussion chu titawp ta mai ila. Engemaw sawi hmaih kan nei a nih pawhin nakinah Demand lamah te kan la sawi thei tho a. Tunah kan Finance Minister in kan debate te a wind-up hma in kan House Leader in sawi tur a neih te sawi turin, lo sawm hmasa ila. House Leader zahawm tak i lo sawm ang.

**Pu LAL THANHAWLA, CHIEF MINISTER** : Pu Deputy Speaker, sawi tur tam tak ka nei hran lova. Amaherawhchu lawmthu sawi lo thei lovin ka in hria a. Kan Finance Minister zahawm tak khan a Budget a rawn present kha a ropui khawp mai a, tunhma te pawhin kan lo ti ve thin a thiam leh thiam lo in. Tun tum ami hi chu a changlung hle a, a lawmawm ka ti takzet a, kan Finance Minister hnenah lawmthu ka sawi duh a. Tin, chumi rual chuan a puibawmtu te hnenah pawh lawmthu ka sawi a ni. Tin, chung aia pawimawh mah chu kan opposition lam te thusawi hrim hrim kha ka lo ngaithla deuh vek a, a tir atang khan a pawimawh thenkhat phei chu ka chhinchhiah a, mahse helaia a tifaitu ten ka note a ni tih hre lo in an lo paih a, a pawu khawp mai a. Mahse lawmthu sawi tham awm in ka hria a, thahnem an ngaihna hi a der lo a ni tih a hriat a. Kan member thenkhat te leh Pu Sangthuama phei chuan tawngtai a tanrual te leh tawngtaipui kan ngai a ni tih thleng a an han sawi te kha ka thinlung a khawih takzet a. A chhan chu kan thutna a hran avangin mimal interest pawh nisela kan hnam interest leh kan ram interest hi kan zavaia he House-a kan awm chhan a ni a. Chumi kan han sawiho na ah chuan kan member zahawm tak te approach hi a positive ka ti a a lawmawm takzet a ni. Engemawti zawnga rem leh rem lo a han in tih mualpho tumna emaw, engemaw han hriatthiam loh der emaw khatiang zawng awm miah lo in mahni ngaihndan dik tak ram leh hnam tana tha tur kan hriat ang te kan han sawi tlang a.

Tin, party hrang na na na chu kan thlirna tlang te pawh a dang a, mahse chuti chungin kan ram tana pawimawh ber ber sum tam zawk kan haichhuah dan tur kawngah te leh a hman dan tur kawngah te thahnem kan ngaihndan a in ang tlang hle mai a, a lawmawm takzet a. Vawiin ah hian sum tam zawk haichhuah a intodelhna kawng chak zawka kan pan loh chuan ringlo mi kan tih vai ho, a chang phei chuan nuihsawh deuha kan han tih thin te buh leh bal leh sum leh pai ngenchhan lova ding thei lo, khawsa thei lo a kan awm hi a ropui hranpa lova. Chuvangin a theih ang chin chinah chuan keimahni lam pawh inhrek leh tlema a harsa deuh a nih pawha tih hram hram kan tum a pawimawh a. Chuvangin kan hotuten ngun takin an ngaihtuah a, buhfai man chungchangah te, chhiah to zawka lak chungchangah te leh kha tuna Opposition Group Leader in an han sawi tak Toll Tax thleng pawh hian kan ngaihtuahna ah hian a awm a. Amaherawhchu mipui ngaihndan tur engtinngge ni ang? Tin, kan thawhpui lehlam party te ngaihndan engtinngge ni ang tih te ngaihtuah loh theih a ni lo va. Vawiina kan discussion atang hi chuan a lo a luakchhuak lutuk te a nih loh chuan hnam zahawm deuh kan nih ve

theihna tur atan intodelhna kawngah chuan chhiah pun danah te leh thil dang dangah pawh kan inlungual tlang hle in ka hria a, hei hi thil lawmawm tak a ni.

Ram leh hnam siam tura phak tawh ang a kan ngaihtuahna kan hmanna kawngah thil lawmawm tak a nih rualin keini a hminga sorkara thu te tan pheih chuan fuihna ropui tak, encourage na tha tak a ni a, a lawmawm tak zet a ni. Tun ang zela kan kal chuan ram ropui tak kan siam ngei ngei ang tih ka ring a. Chuvangin tun ang zela kan kal theihna tur leh keini lamah pawh insiam thatna awm apiangah kan insiam tha ang, a theih ang chin chinah inrawn tlanga kan kal chhoh a pawimawh hle dawn a ni tih hi keini pawhin kan hriat a pawimawh khawp mai. Han sawi tur diat diat engemaw chu ka nei ve nachungin kan Finance Minister zahawm takin a rawn wind-up hunah a rawn tih chhoh turah ka ngai a. Chuvangin a nazawng chu ka sawi lo vang a. Amaherawhchu hei Education Reform chungchangah te theihtawpa hmalak an tum a. Kan Finance Minister-in Education Department a enkawl lain a ngaihtuahna thui tak hmangin Education Reform Commission te a din hial a, vanneihthlak takin India rama Eminent Educationist an tih pathum lai kan chhawr thei nghe nghe a thil ropui tak a ni. Tin, Education Reform Commission han din hrim hrim pawh kha India independent hlim hnu lawka Education Reform Commission an din bak kha chu Education Reform Commission education pumpui thlithlai tura din hi a lo la awm reng reng lo a lo ni a. Khatiang kawngah pawh khan a din nachang hria state kan han ni ringawt pawh kha thil ropui tak a niin Central India lamah te pawh an ngaisang hle a. Tin, uluk taka ngaihtuah niin tualchhunga kan educationist te pawh kan han sawm a, tlawmngaih chhuahin an han tawiam a. An recommendation pawh kha a chhiar apiangin tha an tih tham a ni. Recommendation a tha hle a, amaherawhchu tun thleng hian a pawimawh zual priorities a han kalpui te pawh tih theih loh tam tak kan la nei a, a chhan chu sum vang a ni a. Khatiang a pawimawh zual priority zawnga han kalpui tur awm anga kan ngaih, kan mithiamte pawhin an han dahkhawm ang kalpui tur khan a lo berah cheng vaibelchhe 700 chuang kan mamawh a. Chu chu engtinngan kan tih ang tiin kan ngaihtuah a. Planning Commission kal ta pawh khan kha recommendation hrim hrim kha tha an tih avangin tih puitlin dan an ngaihtuah hle a ni. Planning Commission-in chuti zat chu thawh ta ila, Human Resource Development Ministry-in chuti zat chu thawh se la ti te pawh khan rawtna te pawh an siam mek a. A puitlin hmam tiang kha a lo ni ta a. Engpawhnise, kan sawi duh chhan chu Education hi kan priority zing ami a ni a, Education a that loh chuan hnam a tha thei lova. Chuvangin, kan priority a ni zel a ni, kan kalpui theih dan chin chu engpawhnise la tih hi kan sawi duh hrim hrim a ni.

Tin, Health Care hi a pawimawh khawp mai a. Vawiinah hian sum harsatna avangin kan tum angin kan kal hleithei lo va, kan ngaihthlak tawh ang khan kan District Hospital te tal hi thum tha ila. Mi tam tak tan chuan Aizawla han in refer pawh hi kal harsa tak a ni a. Chuvangin, in refer buai in refer buai ngai lo turin kan doctor te an thiam ve tho si a tih te pawh hi ngaihtuahna kan nei a. A theih chin chinah hmanrua te pawh hi neih ve zung zung ni se tih te pawh kan ngaihtuah a. Chungte tan pawh chuan sum hai chhuah dan te kan ngaihtuah a. National Health Mission atang te pawhin engtingge tam zawk leh tha zawk kan hai chhuah theih ang tih te ngaihtuah a ni a. Tin, vanduaithlak takin cancer ngah pawl tak hnam kan nih avangin cancer lamah hian kan insengso nasa em em a, chuvangin tualchhungah enkawlna hi tha zawka buatsaih hi tha zawkin kan hria a. Chuvangin, Cancer Hospital kan neih pawh khum awm zat te pawh theihtawpin kan ti sang tawh a. Tin, a enkawlna chungchangah pawh a hmanrua pawimawh zual te kan nei in la lei belh zel kan tum a, enkawltu Doctor te pawh tha tak tak kan nei a. Chuvangin phai lama kal duh te chu kal tho mahsela, kal hlei thei lo te pawh helaia muanawm taka inenkawl dan te ngaihtuah chhoh a ni a. Khang kha Education leh Health Care chungchangah thil awmdan a ni a.

Tin, RSBY hnuai in register hi awlsam thei ang berin kan tih tir a. Chutichungin, a tak takah chuan kan mipuite zawk hian an ngaihthah mah mah niin ka hria a. Kei min rawn approach tu interview nikhua te, tanpui ngai ngawih ngawih an ni tih an hmel en pawh a hriat; tin, an damdawi lehkha atang pawhin an serious tih a hriat theih a. 'In in-register em' ? han tih hian in-register hi ka la tawng mang reng reng lo a ni. Chuvangin, kan Health Department lamah pawh, 'in register dan hi inti harsa lutuk em ni?.' ti te pawhin ka zawt tawh a. Tih awlsam dan te a awm a nih chuan tih awlsam deuh te ni se te pawh kan ti tawh a, mahsela a tlangpuiin mipui lam hian kan ngaihven tawh lo niin a lang. Hengte pawh hi keimahni bial lam theuhah pawh mipuite hmangaih avang pawhin tan la turin hrih ta ila thil tha tak a nih ka ring a. Nuai thum lai thlenga intanpui theihna awm reng kan avail lo te pawh hi a lehlamah chuan thil pawl tak a ni a, avail theih dan ngaihtuah ngei ngei chi niin ka hria.

Tin, hetih rual hian kan sum nei tawh tawkin Referral Hospital hi kan tichanglung ve zel a. Tin, Medical College tur atan ruahman a ni a. Tunah hian nakum September thla chhung hi chuan hawn hman ngei kan tum a, a tirah chuan zirlai 50 vel ni se, a kum leh ah 2<sup>nd</sup> year an awm leh ang a, pung chho zel turin kan mithiam ten an hisap a. A Director neih hmasak hi a ngai a, sum te pawh a awm tawh a. A Director hi kan zawng a, kan hmu tawh tlukah ka in ngai a, uluk deuh a ngaih avangin chutiang chuan a step hmasa apiang a tul ang kha chu

ngaihtuah chhoh a ni a. Tin, a rawn en tawh expert team reng reng hian Falkawn leh a chheh vela hmun awm reng reng saw tha an ti viau zel a. Chuvangin, sawlaih sawn kan inngat ta deuh ber a. Chu chu kan memberte hriat atan ka han sawi a ni.

Tin, Border Trade hi kan ngaipawimawh khawp mai a. Burma nena kan border trade te pawh kan la formalize thei lo va, a chhan chu Land Custom Station khi commission a la ni lova. Commission turin UPA sorkara an Commerce Minister te kan sawm thin a, 'kan lokal ang,' an ti a, a hunte pawh an rawn bithliah thin a, an thulh leh thin a. A hnuhnung ber inthlan dawn tepah pawh khan Pu Sharma kha lokal turin ka ti a, a ni te nen lam kan sawidun a, a han ti ve ngial a, a lokal leh lova, khi khi kan mu tan a la ni a. Tun tumah pawh hian a theih anga commission rang turin, kan in nawr leh mek a. State hrang hrang inthlan lo awm leh thin hian minister lo zin tur te pawh an rawn zin theih loh phah a. State hrang hrang inthlan zawh veleh a rang thei ang bera commission tir a kan border trade pawh hi formalize kan duh a ni.

Tin, chhiah pawh hi a pek dan mumal hlei thei lo hi kan hotute'n an vei khawp a. Chhiahte pawh hi kan hmuh chhiat phah deuh angem tih thlenga ngaihtuah theih a ni a. Tunah hian sumdawngte hi chu Taxation department hian online a pek dan te a ngaihtuah sak tawh a. Tunah hian online a pek theih dan kan ngaihtuah nasa a, kan Revenue Minister hian DC te khawmin mipui tana awlsam zawk turin engtia tih tur nge ni ang tih te ngaihtuahna a nei a, koh khawm te pawh a lo tum tawh a. Mahse, Session laiin DC te station chhuahsan lo tura tih an nih avangin a ko thei lova. Session zawh lamah chuan ko khawmin ICT lama kan mithiamte nen engtingge zangkhai thei ang bera kan tih ang tih ngaihtuah a ni dawn a, method tha tak an ngaihtuah chhuah theih ka beisei a ni. Chutiang chuan mipui zangkhaina tur ang chi hi kan hotuten an zawng mek zel a.

Tin, Hindi teacher hlawh pek theih loh tih te, SSA teacher hlawh pek theih loh tih te hi, heng sum hi kan state sum a ni lova, central lam atanga a lo kal a ngai a kan chhuah thin a. Nikum lam lawkah te pawh khan Hindi teacher te pawh hian thla 8, thla 9 thla 10 dawn lai lai hlawh an la thei lova, an khawngaih thlak in a buaithlak hle a, nasa takin kan innawr thin a, nawr ngailo turin advance te pawhin in rawn ti thei lawm ni ti te hialin kan in nawr a ni. Chungte avanga a hun taka hlawh an la thei thin lo hi pawh kan ti a, tun hnu zelah pawh regular taka an lak theihna turin central lamah pawh kan in nawr ve reng a ni tih ka'n sawi duh a.

Tin, a tawpna atan chuan hei NLUP kan tih hi kan zavai hian tui tlang ila tha ka ti a, a chhan chu NLUP kan tih ang ai hian kan kut hnathawktute, inhlawhfa te, huan nei mi te, lo nei

mi te, hmeithai te, pachhia te han in khaichhuah theihna tur hi a awm lo ang tih ka hlau a, chutiang tak chu a nih avangin leh NLUP kan tih hian mihausa te, mi lian te a zawng lo va, hmeithai te, pachhia te, Lal Isuan heng,' ka unau mi te ber chung a in tih hi ka chung a ti in ni ,' a tih ang chi hlir kha a zawna te hi an ni a. Chuvang chuan amah Pathian nung ngei pawh hian hemi kal tlang hian a mi te hi malsawm a duh a niang tih hi ka ngaihtuah hial thin a. A chhan chu thiam leh thiamlo in kan mithiam ten central lamah scheme an han thethla ve a, khulam ami ten an lo en a, tha an ti em em mai a, changtlung zawk a siam an duh a. Chuvangin , 'kan sorkar veleh kan sem ang,' kan tih pawh kha kan sem theih loh phah ta a, kum hnih lai min kawl sak a, Cabinet Secretary Level ah te, mi chi hrang hrang mithiam te, economist te, Prime Minister Economic Adviser te thlang khan an buaipui hlawm ani.

Tichuan, kei nin inthlahrung tak leh mawl taka kan hisapah chuan kum nga chhungin kut hnathawktute leh hmeithai te, chhungkaw 120000 vel, nuaikhat hisapa kan tuam chuan kan that phah viau ang kan ti a, chutiang atan chuan kan hotuten cheng vaibelchhe 1500 lai an dil a. Mahse engkim ti thei an central hotute rilruah a lo thawk a niang , a hnamthlan Lo nei mi, huan nei mi, hmeithai te, pachhia ten lei rem an rah a khaw eng an hmuh a, anmahni khawbu zawlah thlamuang taka an awm a, mi lian leh mi hausa tlawng reng reng a khawsa lo a an awm ve theihna turin a lo ngaihtuah sak a niang cheng vaibelchhe 1500 vel dilah khan 2800 chuang an lo ruahman a ni. Chumi kal zelah chuan tunah hian kan la tichho mek zel a, chhungkaw 25000 vel lai kan belh chuan kan zo thei thawkhat mai awm mang e aw kan ti. Tunah hian a hmangtha te chuan an hmang tha viau a, dinchhuahpui tawhte pawh an awm a, hlawkpui tawhte pawh an awm a. Tin, hmangtha mumal lo tam tak an awm a ni. Nichin maiah khan NLUP a kan information officer te leh journalist MJA hnuai amiten District hrang hrang an fang a, an tih that leh that loh te an enfiah a, a zawng a za chu an tlawh thei miah lo nain a tlangpui in an ti tha a. A titha lo leh hmang diklo te hnenah pawh an kal a, chungho hnenah chuan lo hmang dik leh lo hmang tha turin an chah nual a.

Tin, thenkhat chu an hmuhna chhan, entir nan thir deng an hmuhna chhan neitupa a lo thih tak avanga kal ngaihna hre lo te khatiang te kha an awm a. Chungte pawh chu advise pe in a hman that dan tur, a hman dik dan tur thurawn te pe zelin tunah hian District dang an la tlawh lohte thlawhkual turin hma an la a. Heng journalist te leh Officer te ho hnenah hian lawmthu kan sawi a, chak leh zual leh thahnemngai zawka hma la turin kan in chah a ni. Hei hi party programme a ni lo a, sorkar programme a ni a, a tum hi hmeithai te, pachhia te, kut hnathawk mi, lo nei mi te, huan nei mite eizawna ngeinghet an neih theihna tur atan leh lei rem an rah a kha eng an hmuh a, mahni



khawbu zawlah thlamuang taka an awm theina tur atana ruahmanna a nih avang hian kan zavai hian tan la tlang ila tha ka ti a. Khawilaiah emaw official te lo tihsual palh leh lo inthlahdah leh zawmthawt avang te pawhin harsatna a awm thei a, hrem ngai ang chi te pawh hreh tak chungin a tul si avangin kan in hrem chho a, pek zawm tawh loh tur te pawh an awm nual a. Tin, thenkhat chu insiamthat tiam a dik taka hman tumte pawh an awm chho zel a. Tiang chuan kan zavai hian ta neih ila thain ka hria a. Tin he thilah hian thleibik neilo turin a tir atangin kan in hrilh nasa a ni. Eng party ami pawh ni se, khawi ami pawh ni sela in party zawm tho hlawhtlinpui lo turte ai chuan tu party pawh nisela hlawhtlinpui turte kha kan tanpui tur a ni tih hi helai atanga kan thuchhuak a ni reng a. A ler lamah duh anga kal lo a awm a nih chuan pawh kan ti a, chungte pawh chu tihthat kan tum chho zel a engpawhnisela hun kan la neih leh sum kan la neih hian a mamawh tute chu a daih chho vek turah kan beisei a. Chutiang chuan kan ruahman a ni. Chuvangin vawiin ah hian he programme ah hian kan tui vek a keimahni bial interest la in tunge hmang tha, tunge hmang tha lo tih ang chi te pawh hi kan en chhoh chuan tun ai hian kan hlawkpui zawk thei ang tih ka ring a.

Tin, thenkhat chu mahni remchan dana an thil dawnte pawh lo hralh ta mai an awm a, entir nan hmanni a member zahawm tak Pu Ruatkima'n a sawi Lengpui pa te ang te pawh kha a scooter kha a hralh a, kha kha a tangkaipui em em mai a. Tunah chuan taxi te pawh a nei tawh a, khatia a lo rik takah chuan Officialte kan chhuahchhalh tir a, 'scooter chu nei leh se min tih chuan ka lei leh mai ang; mahse tunah chuan Auto rickshaw ngai tawh lo in a aia tha taxi, chutiang khatianga chu ka nei tawh a,' a ti e, an ti a. Engpawhnise khatianga dik lo taka tite kha chu an dinchhuahpui tho chuan dik lo deuh pawh nisela ngaihnathiam turah ka ngai a. Amaherawhchu dik lo a ti kan bial ve Serchhipah te hralh ru an awm a, chungte pawh chu tunah hian chawitir dan te an ngaihtuah mek a ni. Congress mi a ni leh nghal a, Congress atangin an hnawtchhuak tawh nghe nghe a ni. Chutiang deuh thaka kan kal chhoh hi a tha in ka hria a, chuvangin hengte pawh hi kan zavaia kan tui chuan kan kut hnathawktu te, lo nei mi te, huan nei mi te leh hmeithai te, pachhia ten leirem an rah a khaweng an hmuh phawt chuan he ram leh hnam hi kan him dam dawn tih kan hria a. Chutiang tur chuan mahni programme ang theuha nei turin kan in sawm duh a ni.

Tin, Hydel project chungchang kha kan sawi ang a hun te a awm lo palh thei lo a. Hydel project hi tunah hian kan lui neih zawng zawng hi survey investigation tih zawh tawh te, tih mek te a ni a. Chung atan chuan company tu tu te emaw assign fel deuh vek a ni, mahse a zawng a zaa khuah loh theih dan hi kan hotuten an ngaihtuah nasa a, a chhan chu a zawng a zaa kan khua hian kan environmental biodiversity a tih chhiat theih avangin a zawng a za khuap lo turin kan nam nasa a, kan natural resources zawng tu te, a bik takin kan natural gas zawngtute hi nasa zawka tan la

turin kan ti a. Maubuang ah chuan drilling an ti mek tawh a, Keifang ah tih leh an duh a, mahse Seling atanga Saitual thleng kawng hi a chhia a border road ho hnuai ami a ni. Chuvangin anmahni Oil India Limited te pawh hian border road ah rang tak a kawng an siam theihna turin cheng vaibelchhe ruk chuang an deposit tawh a, kum 2 deuh thaw a ni tawh a, hma an la la lova, hmanni khan an chief engineer te leh Oil India ami te kan thu khawm a, rang tak a hma la turin kan in nawr mek a. Chutiang chuan oil company lam te pawh kan nawr hmanhmawh avangin an hmanhmawh rilru ve riau a ni. Heng ka'n sawi chhuah na chhan hi natural gas te hi tam tawh kan neih theih chuan kan neih zawng zawng khuah ngai lo in kan environment te tichhe lovin natural gas zawh hian thermal power te kan siam theih kan beisei a. Kan thenawm Tripura te pawhin an ti thei tawh a, chuvangin helam zawng hi kan hman hmawh a. Gas cylinder pawh mahni tapchhak zawla han herh haw te hi kan chak ve khawp mai a, chutiang kawngah te pawh hma kan sawn theih nan chak zawkin kan la a. Tin, Meghalaya ram chhungah National highway chhiat lutuk avangin thla hmasa kha Oil India Limited-a an hotute an lo leng a, 'central ministry ah helai chhe lutuk hi siam tha thuai thuai se, chutiang a nih loh chuan kan equipment kan la chho thei lo va, chu chu min lo ziah sak la. Tin, an ti thei dawn lo a nih chuan keimahni pawn kan ti mai ang,' an ti a. Ministry ah ka ziak a chhanna ka hmu tawh a, 'a rang lama lo tih that kan tum ang e,' an ti a, muan pheih chu a muang hle mai. Chutiang khawpa kan in nawr nasat avangin company lam pawhin hma an la ve a nih tih kan hotute hriat atan ka'n rawn sawi ve a ni.

Tin, a tuikhuah lama kha eco- tourism kan tihna tur atan a tangkai tur ang chi ah chuan kan la khuap chho zel turah ka ngai a. Tin, mini hydel project hi hun hmasa lam atang te pawh khan engemaw zat kan siam a, heng kan han siam kan han tih ve te pawh hi tangkaina tak a awm a, kan engineer te in tahhriam na atan te leh engemaw chhiat rup hun te a lo awm a, khami an hman tangkai nan te pawh khan a tha ve hrim hrim a. Tin, heng hi kan sum a tih a ni lo va, new and renewable ministry atangin sum a hmuh theih a, chung atang chuan hma kan han la chho a ni. Helai ah kan Finance Minister zahawm tak budget chungchang sawi ho na ah kan member zahawm tak te a bik tak in Opposition lam atanga member te participate na ah a lawmawm ka ti a, lawm thu sawi pahin khang tlem te kha Pu Dy. Speaker, ka'n sawi ve duh a ni e. Ka lawm e.

**DEPUTY SPEAKER** : Tunah chuan Finance Minister zahawm takin kan debate te kha rawn windup sela. i lo sawm ang.

**Pu LALSAWTA, MINISTER** : Pu Deputy Speaker, ka lawm e, House Leader tiamin member 15 in an sawi a, sawi tur ngah tak tak te pawh an in sumin ka hria a, mahse sawitu a

ten an sawi tha a, tah hian point tam tak chhinchhiah tur leh kan han bawhzui chi tur tam tak a awm a, a lawmawm khawp mai. A bik takin a hmasa in Pu Deputy Speaker, kan hmachhawn kan ram in kan mamawh bawk si in renchem chungchang te, chhiah lak belh chungchang te kan han sawi a, opposition lam atanga rilru ngil tak leh tha tak leh phur tak a min han sawi phur thin phehi hi chuan sorkar anga kan mawh phurhna kan han thlirin a lawmawm kan ti a.

Helai House ah ber kan lungrual chuan mipui lamah pawh kawhmawh bawl leh engeamaw zawng, a sawisel ringawt zawng kha chu an tlem sawt te pawh kan ring a. Chuvangin opposition lama kan member zahawm tak tak te, kan leader pawhin a sawi tawh ang khan an chungah a bikin lawmthu kan sawi duh a. Tin, State budget hi kan hriat theuh angin Union budget te a ang ve lo va, Union budget ah chuan a tlangpui thu in plastic lam hmanna chi a tlawm dawn a, computer lam leh thil dang a to dawn motor lam a to dawn, a tlawm dawn, thir hmanna chi a tlawm dawn, a to dawn, tih lo hriat lawk theihna a ni a. State-ah hi chuan chutianga excise duty la ve lo, corporate tax-te la ve lo kan nih avangin kan budget hian confidentiality thleng pawh hian chuti tak chuan Union Budget te hi chu a pha lo hrim hrim mai a, confidential han vawn vak lutuk pawh, mahse kan vawng reng thin a. Hmanni 11.11.14-a ka sawi tawh ang khan hmalak a tul zia ka sawi viau na in hmalakna tur a sawi vak lo a ni tih ang deuh kha chanchinbu lamah te pawh ka lo hmu a. A dik a, hmalak a tul thu te leh hetia kan han sawi khawm a lungrual taka kan han tih tawh hi chuan state sorkar hian chhiah pun a ni emaw, fee tih pun emaw a nih hi chuan session pawh a tul vak chuang lova kalpui theih a nih tawh avangin state leh Union budget danglamna kha kan hre theuh tho a, chutiang chu kan lo beisei dan pawh a ni a.

Tin, kan statistic hi a ngaihnaawm viau lo na in tawi te in kan sawi ang a. Sorkar hnathawk post kan neih zawng zawng hi 62829 a nih laiin a hnawhkhah mek hi 51177 a ni a. Chutichuan, vacancy hi 11652 a ni bawk a, hei hi kan salary leh detail budget a documents kha a ni a. Hemi kan sawina chhan kher chu khawvel thar lo awm zelah hian sorkar tih len tual tual aiin sorkar hnathawh tih tam tial tial hi an tuipui tlat tawh a, chuvangin “Minimum government, Maximum governance” an tih ang hi India ramah pawh an tum nasa em em a. Kan Prime Minister zahawm tak pawhin a buaipui ber a ni a Keini pawh hian chutiang rilru chu sorkar hmasa atang pawh a kan lo tum chhoh zel tawh a nih avangin vacancy hnawhkhah zung zungte hi sum harsat vang ngawr ngawr ni lovin kan ram tana tha ber tur kan ngaihtuahnaah hnathawh tur tam takah hian private players, service providers ho hman tam leh zual zawk hi tha te pawhin kan hre ve a ni. Keimahni zingah kan fa te, kan tu

te engineer thiam tak tak, doctor thiam tak tak an awm a, chung te chu vawiinah hian sorkar in hnathawh tur tam tak kawnglahi a ni emaw, leihlawn siam a ni emaw, in sak a ni emaw, Hospital siam a ni emaw, nurse training chungchangah te pawh competent taka an tih theih zel kha chuan sorkar “Minimum government” mahse, “Maximum governance” ni thei kha kan tum a lo ni ve zel a.

Tin, Mizo hian kan tlin tih a chiang em em a, Aizawl Hospital & Research Centre an tih saw Dr. Rinawma'n a buaipui a, Dr. Mawitea ten an lo tawiawm bawk a, an thiamna hi a rintlak a ni. Mi tam takin kan bawr a, anni pawhin service tha tak an lo provide thei a, chuvangin hetiang lam hi kan hawi zel dawn avangin kan budget pawhin chutiang lam chu a hawi ve a ngai tlat mai a. Chungte avang chuan sorkar hna tihpun zel, Driver tihpun zel, M.R. tihpun zel lam kha a ni vak lo tih Pu Dy. Speaker, kan hriat tlan atan kan sawi nawn leh hrim hrim a.

Tin, an sawi tawh atangin, opposition lam atang leh helam atang pawhin 'huaisen takin' tih kha a lo ri fo mai a, a ngaihnawm ka ti a Pu K. Sangthuama, member zahawm tak pawh khan chutiang tak chuan a rawn sawi tawh a, helamah pawh a ri tho a. Huaisen taka kal hi kan duh a, kan kal dawn ni pawhin ka hria a, kan House Leader-in a rilru leh min tum pui dan ang vawiina ruahmanna zawng zawng ka en hian he ram hi huaisen takin hmalam panin kan kal dawn a ni. Kan harsa tih hi thudik a ni, tunah hian kan harsa tih hrechiang em em a harsat loh tum a kan sorkar-in ke a han pen ta hi a lawmawm in ka hria, Japan ram te chu Indopui hmasaa an tlawmnaah nasa takin an tuar a, an leiba rulh tur tam lutuk avangin second world war a rawn chhuak a, second world war a an han tlawm leh chiah mai 1947 chho atang khan an in hmuchhuak a, chu chuan khawvel ram ropuiah economic power ah a siam chhuak ang khan keini pawhin vawiina kan harsatna zawng zawng te hi kan din chhuah theihna tur atana bul tanna a niin ka hria a.

Kan member zahawm tak tak ten an han sawi atanga ka lo lak khawmah chuan Singapore ah te kan kal kan ti a, khawvel ram nuamah leh khawpui nuamah te, mahse khang tena khawpui nuam leh ram nuam an neih theihna chhan chu a mi cheng ten an in huam tlat a ni. Thla hmasa a Pu K.S. Thanga, Parliamentary Secretary zahawm tak hi Singapore-a a kal chuan a rawn hawn pakhat hi remchang apiangah ka sawi thin a. Singapore ah chuan car lei dawn in car lei permit kha US Dollar 92,000 tluk a ni. Car man aiin a let sarh in a to tihna a nih chu. Chungte avang chuan a ram a nuam em em

a, churang chuan vawiin ah hian kan ram hi ram nuam a siam tur hian helaia mi 40 lek awmkhawm hian kan thei lo, mahse heta tanga in hlawmkhawma kan ram pum kan tum tlat chuan Mizo mipuite hian hmalam pan chu kan duh a, kan in huam bawk a ni. Kohhran thawhlawm kan han thawh theih dan em em ah hian Mizo te hi chuan chhiah pek leh midang pek hi kan harsat lo lutuk tih hi a chiang a. Pu Deputy Speaker, LPS-a Samari mi tha hi ka hman chang chuan ka thlir ve ziah a, Mizo hi mi tha an lo va han tam em em, an hmang seng lo a ni, dik tak chuan an hmang seng ngang lova, chuti khawp chuan pawisa hi an rawn thawh tling khawm a ni. Chuvangin, kan ram siam tur hian tling ber ber ni lo mah ila Pathian remruat a nih avangin helai mi 40 ten lungrual taka kan tih chuan kan House Leader in min hrui ang a kan ti thei em em ang.

Chhiah lak chungchang ah chuan hmanni ah kan Principal Secretary pakhat hi a hlauh zat SAD ah ka va zawh tir a, ₹ 1,92,625/- a lo hlauh reuh a, vai a ni a, mahse “thla tin income tax engzatnge i pek,” kan ti a, thla tin ₹ 40,000/- a lo pe a. Chuvangin Mizoram-a IAS ni thei si income tax pe lo si tan hi chuan vanneihna hi a van double tak em ka ti a; tin, anmahni pawh hi an in huam viau a ni. IAS Association ang pawh a kan hnenah te an rawn sawi ve chu, ‘kan chawi ve ang tur chu Dan in a remtih theih ang chu min rawn ti ve ula kan hreh miah lo.’ tih te hi an rawn sawi a, a lawmawm tak zetin ka hria.

Demand sawi ang a member sawi zawng zawng te hi rawn sawi ve kha Pu Deputy Speaker, a ngaih loh avangin vawiin a a tawp kharna tur atana kan sawi duh, hrilhfiah ngai deuh chu thil 2/1 awmin ka hria a. Pakhat ah chuan fiscal correction parts chungchanga kan member zahawmtak Pu Ruatkima’n a rawn sawi, ‘percent te hi a va sang ta em em ve,’ tih a rawn sawi kha A.G lamin an la tih loh vang mai a ni a. Nikum hmasa 2012-2013 ah khan khami ang 7.21 percent ai hian kan chhiat kan ring lo a ni. Tuna mi sang tak hi chu tun ami figure an han neih a engemaw ti a neih loh ai chuan ti a an han fawmkhawm mai a ni a, kha kha chu CAG lampang ten an rawn tihfel chuan fel mai turah ka ngai a.

Tin, kan Chief Minister in a ngaihpawimawh em em, keini zawng zawng pawhin a kan ngaih pawimawh chu kan hmalakna turah hian mipui ngaihdan hi a pawimawh a, mipui ngaihdan hi he House atanga piang thei a ni tih ka hriat avangin vawiin ah hian han sawi ka duh a. Mipui ngaihdan ka lo thlir danah chuan ram nuam leh

ram tha leh sorkar tha neih hi kan chak vekin ka hria, chumi chu kan duh a ni. Chumi ti tur chuan huam pawh kan inhuam a ni. Chutah chuan keini veilam a mawhphurtute chuan kan theih ang tawkin kan ti ngei ngei ang tih hi ring mai a, kan Leader in min hruai ang a, kan tih tur tam tak hi tunah hian chhekkhawl sa kan ngah mai a, inrenchemna tur atan leh additional resource mobilization tur ARM kan tih a kan paper neih sa hi lehkha pheh in pheh 58 zet kan kawl tawh a. Tin, tun Pathianni thleng a rawtna lo lut belh hi a tam viau bawh a. Tin, kan Chief Minister in ama pual ngei a an sawi ve turin Minister-te leh Commissioner te, Secretary te nena engtinng e kan ram ah hian economy measures tha tur atan kan tih theihna tura rawtna leh khatiang kha a hranpa in Chief Minister Office ah buatsaih mek a ni bawh a. Khang kha kan han tuai hlawm ang a, tun Financial Year chhung hi chuan Pu Dy. Speaker, kan ram hian kan kal dan tur kawng mumal tak, kan Chief Minister-in a rawn sawi bawh Education Reforms chungchangah khan theihtawp kan chhuah a, tuna kan Chief Minister zahawm tak pawhin theihtawp a chhuah a. Amaherawhchu, House member ten min hriat sak atan a pawimawh ka tih thin chu, a pawisa lam kha chu a pawimawh thin khawp mai, Building te, quarters te sak kan duh a, mahse chumi tluk zeta pawimawh chu a kalphung, a system, education kalphung kan kalpui dan kha a ni a. Bye-heart system ringawt ang te hian mihringah thiamna a pe tawh lo tih kan hria a. Examination-ah chuan mark a hmuh theih khawp mai, mahse a tak taka hriatna hi Education lamah an ngai pawimawh em em a. Higher & Technical Education lamah pawh an ngai pawimawh em em a.

Tin, vawiinah hian kan member zahawm tak ten an rawn sawi te zinga pah phal rual loh chu thalaite hi kan tibeidawng thiang lova, thalaite hian gainful employment an hmu tur a ni. Zir san vang ringawt pawh ni lo in kut themthiam vang, thluak themthiam vang, ke themthiam vang ringawt pawhin employment tha hi an hmu thei tlat a ni. Mizo fa hi kan duai lo, sport lam a ni emaw, thiamna lam a ni emaw, technology engpawhnise remruat sak kan nih phawt chuan Mizo fa te hi kan tling a, chumi tur zawng chuan kan kal thei a ni.

Tin, Pu Deputy Speaker, pawimawh tak sawi hmaih phal rual loh chu mi in chhiah kan pe chak em em a, pe tur pawhin kan inring a, pek tur pawh kan nei a, mahse a pek danah harsatna, pek hleih theih loh khatiang kha a lo awm leh zauh thin kha chu sorkar ang pawhin department tam takah Tax Revenue a ni emaw, Non Tax Revenue a ni emaw, Fee a ni emaw, khar fo a nih kha chuan ruahmanna fel tak kan neih a ngai a ni.

Vawiina Budget kan sawinaa pawimawh ber nia ka hriat chu Budget kan nei tam lo khawp mai, a quantity chuan a tam lo khawp mai, hei ai hian tam se pawh kan duh, mahse chu aia pawimawh chu kan neih ang ang dik tak leh tha tak leh tangkai taka helaia mawhphurtutena hman a nih theihna tur atana hma kan lak hi a niin ka hria a. Officer rual ten chung ang chu chu thlarau chu chang ve se kan duh bawh a ni. Chutiang chuan vawiina kan Budget discussion kan kharna chu nimin lamah sawi an lo awm tawh a, vawiinah kan sawi ang khan House Leader tiamin 15 zetin an sawi a, sawi lo tam tak mi inthlahrung te an awm a, mi dawhthei tak tak te, chutichung chuan kan hunin a phal chin tawh a nih avangin he kan general discussion hi chutiang taka khar tur chuan he House zahawm tak hi ka rawn dil a. Hei hi kan General Discussion-ah chuan a tawpna a ni ang a, naktuk lam atang chuan Demand wise in kan kal tawh tur niin ka ngai. Pu Deputy Speaker, ka lawm e.

**DEPUTY SPEAKER** : Awle, kan duh tawh tawh ang a, naktuk lam atang chuan Demand wise lamah kan kal tawh ang a, naktuk ni 19.11.2014 Nilaini zing dar 10:30 ah kan thu khawm leh dawn nia.

Sitting is adjourned.